

Honos
Erit huic quoque
Luto.



ANDREA FELICIS OEFFE :
L. Y.
Monacensis.

403.

403

P. Lat. 310.

Latres latini

Bernardus Caracvall.

Sec. XII. flor. 1115.

pag. 2070.

SANCTI
BERNARDI

ABBATIS
DE CONSIDERATIONE
AD EUGENIUM PAPAM
LIBRI V.

Nova Editio

SANCTISSIMO D. N.
CLEMENTI XI.
PONTIFICI OPT. MAX.
DICATA.




PARISIIS

MDCCI.

BIBLIOTHECA
REGIA
MONACENSIS.





BEATISSIME PATER,



ET SI novo Pontifici
nihil forte convenien-
tius, quam SANCTI
BERNARDI libri de
Consideratione, offerri possit; quod-
dam tamen temeritatis genus esse
a ij

videretur, aureos ceteroquin hosce
commentarios, quos Bernardus ipse
EUGENIO III. filio quondam
suo, nonnisi timidiuscule scripsit,
nova luce novaque forma donatos,
SANCTITATI VESTRÆ
nuncupare, nisi eosdem ipsi non
ingratos, immo acceptissimos fore
nobis constaret. Cum vero hos libros
in promptu, veluti quoddam enchi-
ridium, se habere velle nobis inno-
tuerit; nihil magis honorificum no-
bis contingere posse duximus, quàm
ut tam piæ ac justæ voluntati quàm
primum obsequeremur. Nec est quod
cuiquam mirum videatur, hoc
opusculum ceteris ejus generis à
tanto Pontifice prælatum fuisse. In-
telligis quippe, SANCTISSIME
PATER, auctore sapientissimo,
eodemque consiliario, fideli quidem
& benevolo, in suprema ista di-

gnitate opus esse, cui incumbit tanta
negotiorum, officiorumque moles ac
multitudo; nec fieri posse, ut multa
vel nolenti non excidant, nisi adsit
vigil & incorruptus monitor, qui
vel remissius agentem excitet, vel
in rebus agendis ferventio-rem mo-
deretur: qui innumeris distractum
curis identidem ad seipsum revocet,
& ad externa & longe posita ex-
tentum ad sibi proxima & do-
mestica recolligat: qui rerum par-
ticularis immorantem applicet ad
universa: qui curarum pondere
pressum relevet, & partem officio-
rum ad fidos ministros referre sug-
gerat: qui summis occupatum ad
inferiora quoque aliquando descen-
dendum esse pro loco & tempore
suadeat: qui denique modum inter
hac omnia tenere doceat, & in seipso
consistere: non infra dejici, non

„ attolli supra ; non evadere in lon-
„ gius , non extendi in latius. Et ad
hac præstanda quis magis idoneus ,
quam divinus ille tam multiplicis
officii & considerationis interpretes ?
Merito itaque hunc ceteris præfe-
rendum censes , SANCTISSIME
PONTIFEX , ejusque libros fa-
miliares habere cupis , exemplo
sanctissimorum decessorum tuorum ,
in primis PII V. sanctæ memoriæ
Pontificis , ejusque successoris GRE-
GORII XIII. qui eorum lectionem
etiam ad mensam adhibebant. Eos-
dem terere in episcopatu & in car-
dinalitia dignitate solebat URBA-
NUS VII. idem in summo Pon-
tificatu facturus , nisi mors brevi
subsecuta obstitisset. Denique his
libris non minus tribuit CLEMENS
VIII. qui novam eorum editionem ,
Romanis typis factam , probavit.

sibi que dicari pergratum habuit.

Tantum Pontificum vestigiis
insistere properas, BEATISSIME
PATER, teque iis non imparem
fore facile auguramur, cum voca-
tionis & exaltationis tue modum
insolitum consideramus. Quid enim
sperandum non sit ab eo Pontifice,
qui non ambitu, sed gemitu &
lacrymis; non cupiditatis instinctu,
sed sola Divina vocationi parendi
necessitate summum istud fastigium
subiit? Quem non conspiratio hu-
mana, sed celestis quaedam inspira-
tio novo quodam & insueto mira-
culo ad istam dignitatem adduxit?
An vero miraculo proximum non
est, tot Cardinales, tam diversa-
rum passim sententiarum & par-
tium, sola boni publici habitatione,
repente in Te unum, florentissima
etatis, creandum Pontificem con-

venisse? At quale est illud, quod
protracta in totum triduum electio-
ne, nemo unus ab unanimi ceterorum
consensu recesserit, sed electioni facta
toto illo intervallo constanter omnes
adhaerint, Te uno reclamante, Te
uno, gratulantibus & plaudentibus
cunctis, ingemiscente, & in lacry-
mas pene usque ad morbum effuso?
Hæc certe nostrorum non sunt, sed
primorum illorum temporum, quan-
do Pontificatum desiderare non
aliud erat, quam optare martyrium.
Sic Cornelium extollebat Cyprianus,
quod non, ut quidam, vim fecisset,
ut episcopus fieret; sed vim passus,
ut episcopatum acceptaret. Hæc
jucunda sunt præludia novi hujus
seculi, quod sub felicibus auspiciis
tuis, SANCTISSIME PATER,
ingredimur. Hæc optatissima initia
fortunatissimi & maxime diuturni,

ut speramus, tui Pontificatus, ad
quem natura & gratia dotes eximia
Te jam dudum aptaverant: acre
scilicet & ad summa natum inge-
nium, incorrupti mores, modestissi-
ma vita constans & equabilis ubi-
que tenor, praeclara rerum omnium
cognitio, probata in rebus publicis
singularis prudentia & sagacitas,
laboris indefessa patientia, plurima
denique humanitas & benignitas
in omnes: quæ omnia id efficiunt,
ut jam pene non recordemur, nos
amisisse Romani, immo & Christia-
ni orbis delicias, optimum scilicet
Pontificem, beatæ memoriæ INNO-
CENTIUM XII. cum singulari
divinæ providentiæ beneficio CLE-
MENTEM XI. ejus successorem
dignissimum, ac virtutum æmulum
sortiti simus. Supereſt, ut pro virili
conſtitantur omnes ad reſpondendum

sanctissimis consiliis tuis , ad fortunandum , illustrandumque istum Pontificatum , quocum salus reipublica Christiana conjuncta est.

Nos vero , id est humilis sancti Mauri Congregatio , tantilla portio Benedictini Ordinis , qui Sedi Apostolicae ab incunabulis semper addictissimus fuit ; nos certe praeter vota & preces , quas Deo Opt. Max. pro SANCTITATIS VESTRAE incolumitate & felici Pontificatu fundere non desinemus ; quod unum insuper nobis in praesens occurrit , novam hanc sancti Bernardi librorum editionem , quanta licuit diligentia à nobis curatam , SANCTITATI VESTRAE in perenne observantiae & venerationis nostrae monumentum offerimus , certi & alacres , hoc munusculum ei non displiciturum , qui istos libros adop-

*tavit in exemplum sui Pontificatus,
in quo eorundem absolutam ideam
felicius, quam in ipsis libris, jam
factis reviviscere cœpisse gratula-
bundi accepimus. Felices nos, quo-
rum tempore id cernere datum
est! iterumque felices, si Apostolicam
vestram benedictionem & tutelam,
BEATISSIME PATER, quam
ad vestros pedes demissis animis
provoluti exposcimus, obtinere possi-
mus.*

SANCTITATIS VESTRÆ

*Parisiis è monasterio
S. Germani à Pratis
15. Januarii, ipso
die festo S. Mauri
an. 1701.*

Humillimi & obsequentissimi
servi & filii, SUPERIOR
GENERALIS & Monachi
Benedictini Congreg. S.
Mauri.

SPECIMEN
S. BERNARDI
LIBRORUM

DE CONSIDERATIONE.

S Equentis Opusculi argumen-
tum est, Pontifici sic mode-
randam esse actionem, ut identi-
dem ad se redeat, & furtivas
saltem horas considerationi ac
meditationi subinde impendat.
Primus liber considerationis ejus-
modi necessitatem & utilitatem
demonstrat: quatuor alii ejus ma-
teriam & objectum. Et in secundo
quidem considerantur ea, quæ sunt
in Pontifice, seu Pontifex ipse:
*quis, quid, & qualis sit: quid in
natura, quis in persona, qualis in*

moribus. In tertio, quæ sub ipso, id est orbis universus. In quarto quæ circa ipsum, domestici, Cardinales, Episcopi. In quinto denique, quæ supra ipsum, Deus scilicet atque Angeli.

Hos libros scripsit Bernardus ad Eugenium III. suum olim discipulum, & sub nomine Bernardi, abbatem sancti Anastasii ad Tres-Fontes, qui ad summum Pontificatum anno MCXLV. assumptus est.

Non continuo tenore, sed diversis temporum intervallis hi libri compositi fuere. Primus anno MCXLIX. Secundus aliquanto post, ut ex ejus initio intelligitur, & quidem anno sequenti, scilicet post infelicem expeditionis Jerosolymitanæ successum, de quo se ipse initio hujus libri purgat. Tertius anno MCLI. quarto scilicet

anno post concilium Remense,
ut in capite V. legitur, anno
MCXLVIII. celebratum. Quartus
denique & quintus paulo post, si
non statim cum tertio absoluti.

De horum librorum dignitate
& præstantia dicere superfluum,
quam ipsa lectio amplius persua-
debit, quàm quævis oratio. In aliis
scriptis Bernardus ubique singula-
rem pietatem spirat, doctrinam
non vulgarem, acre & facile in-
genium, stilum sale conditum &
scripturarum succo plenum: at
his in libris seipso superior, conciso,
presso & admirabili dicendi gene-
re, summo omnium mortalium sic
sua præscribit officia, quasi ipse
summum pontificatum gessisset;
sic totam Canonum doctrinam in
compendium redigit, quasi id
unum toto vitæ suæ tempore didi-

cisset. Immo tamquam à Deo inspiratus Doctor , cælestis sapientiæ tot fere oracula fundit , quot versus. Hinc quidam non malus auctor , Bernardo suppar , hos libros non incongrue DEUTERONOMIUM SUMMORUM PONTIFICUM appellavit.

Sane eorum utilitatem cum dignitate conjunctam agnoverunt sanctissimi quique Pontifices : in primis NICOLAUS V. qui quantum eisdem libris tribuerit , re ipsa ostendit , cum eos , ante inventam typographicam artem , elegantissimo caractere seorsim pro suo aliorumque usu describendos curavit. Eodem consilio Antonius Carafa , magni nominis Cardinalis , ipsosmet libros recognovit , atque Antuerpiæ formis Plantinianis separatim imprimi fategit , PIO V. sanctæ

memoriæ Pontifice : qui eorum
lectionem ad mensam lubens ad-
hibebat. quod itidem à GREGO-
RIO XIII. ejus successore facti-
tatum legimus. Nec omittendus
paucorum dierum Pontifex UR-
BANUS VII. qui & in episcopatu,
& postea in cardinalatu eos mul-
tum sibi familiares habuisse dicitur,
eosque in conclave tulisse, in quo
summus Pontifex renuntiatus est.
Consimilis quoque affectus fuit
GREGORIO XIV. ejus succes-
soris, qui novam horum librorum
editionem fieri adhuc Cardinalis
peroptabat. Quod postea exsecu-
tus Gerardus Vossius præpositus
Tungrensis, eosdem libros ab se
recognitos, seorsimque editos,
CLEMENTI VIII. nuncupavit.
Hinc, quasi hereditario jure, aurei
hujus Opusculi amor transmissus
est

est ad Sanctissimum D. N. CLEMENTEM XI. modo feliciter
sedentem, sub cujus auspiciis nova
hæc editio (quod bene ac feliciter
Deo favente vertat) commodiori
forma , elegantioribusque typis ,
novo hoc sæculo ineunte , facta
est.





INDEX

CAPITULORUM.

LIBRI PRIMI.

P	<i>Rologus.</i>	Pag. 1.
CAP. I.	<i>Pontifici, tam variis occupationibus presso, condolet.</i>	4
II.	<i>Vis consuetudinis ad inducendos pravos mores, & duritiam cordis.</i>	6
III.	<i>Indignum proceribus Ecclesiæ, continue causis litigantium audiendis & decidendis incumbere.</i>	9
IV.	<i>Quæ servitus digna, quæ indigna servorum Dei.</i>	12
V.	<i>Non gerendam aliorum curam cum sui ipsius incuria & neglectu.</i>	15
VI.	<i>Non tam episcopis, quam principibus judiciariam potestatem competere.</i>	18
VII.	<i>Pietati & rerum æternarum considerationi in primis vacandum esse.</i>	21
VIII.	<i>Ex pietate & contemplatione pulcherrimam quatuor primarum virtutum harmoniam & connexionem oriri.</i>	24

IX. *Recentia Pontificum exempla paulatim corrigenda, vetera imitanda.* 30

X. *Abusus Advocatorum, Judicum, Procuratorum, eorumque fraudes graviter perstringit.* 31

XI. *In Advocatos & Procuratores, qui ex iniquitate quæstum faciunt, graviter animadvertendum.* 34

LIBRI II.

CAP. I. *A* *Pologiam instituit, ob infelicem successum expeditionis in Terram-sanctam susceptæ.* 37

II. *Considerationis à contemplatione distinctio.* 44

III. *Considerationis quatuor puncta designat.* 45

IV. *Notitiam sui ipsius triplici consideratione sui complectitur; & primum quidem considerationis membrum hic exsequitur.* 47

V. *Alterum membrum considerationis sui proponit: nempe, quis sit, & unde.* 48

VI. *Quale debeat esse Procerum Ecclesiæ studium.* 50

VII. *Resumens priorem quæstionem, quis sit, diligentius expendit.* 60

VIII. De Pontificiae dignitatis & potestatis excellentia differit. 63

IX. Propriae naturae considerationem commendat. 67

X. Tertium membrum considerationis sui, nempe Qualis sit, exponit. 70

XI. Serium examen sui Pontifici serio commendat. 73

XII. Neque in prosperis animum nimis laxandum, neque in adversis deficientium. 75

XIII. Ab otio & nugis, vanisque sermonibus Pontificem dehortatur. 77

XIV. Personarum acceptionem in judiciis summopere vitandam. 78

LIBRI III.

CAP. I. **P**ontificis esse, non tam ut omnes suo dominio subjiciat, quàm ut omnes, quantum fieri potest, ad Ecclesiae gremium perducatur. 80

II. Quis modus in appellationibus ad Sedem apostolicam. 88

III. Praesules Ecclesiae non tam ut praesint, ac semetipsos pascant, quàm ut aliis prosint, constitutos esse. 99

IV. Gradus Ordinum ac dignitatum, quae in Ecclesia sunt, non temere confundendos ac perturbandos. Hinc

*abusum quærendi Privilegia ac
Exemptiones perstringit.* 103

V. *Summo Pontifici incumbere curam
de apostolicis decretis, & majorum
institutis per totum orbem servan-
dis.* 113

LIBRI IV.

CAP. I. *D*E iis quæ sunt circa Ponti-
ficem. 118

II. *De cleri & populi Romani moribus
agit, ac de veterum Pastorum cura
ac vigilantia.* 120

III. *De vestium pompa ressecanda, &
zelo Pontifici necessario.* 128

IV. *Quales collaterales & coadjutores à
Pontifice adhibendi: ubi de virtu-
tibus Prælatorum.* 132

V. *Exemplis commendatur abstinencia
munerum: & arrogantia ministro-
rum Papæ perstringitur.* 140

VI. *Pontifici non convenire, utpote gra-
vioribus intento, rei domesticæ cu-
ram: proindeque alteri potius Oeco-
nomo committendam.* 146

VII. *Epilogus seu summa eorum, quæ in
Pontifice requiruntur.* 155

LIBRI V.

CAP. I. ***D**E his quæ supra nos sunt, id est, de Deo rebusque divinis, considerationem instituit, ad quas modo per creaturas erigimur.* 158

II. *Assignat varios considerationis gradus.* 161

III. *Ea quæ supra nos sunt, Deum scilicet & Angelos, investigari opinione, fide & intellectu.* 164

IV. *Angeli quomodo considerandi.* 167

V. *Gratias ac dotes Angelorum à Deo in ipsos derivari.* 176

VI. *Principii & essentiae rationem proprie soli Deo convenire.* 180

VII. *Deum & simplicem, & trinum esse.* 184

VIII. *Personarum pluralitatem in Deo consurgere ex proprietatibus; essentiam tamen unam & simplicem esse.* 190

IX. *Uti in Deo simplex natura est in tribus personis, sic contra in Christo plures naturas in unam personam coalescere.* 196

X. *Parabola, quæ est apud Matthæum de tribus satis, Christi personæ accommodatur.* 198

XI. Continuatio considerationis de Deo.

202

XII. Deum & bonorum operum pium remuneratorem, & scelerum æquissimum vindicem esse. 203

XIII. De longitudine, latitudine, profunditate & sublimitate Dei profunde & eleganter differit. 209

XIV. Modum, quo prædicta secundum Apostolum comprehendere possimus, ostendit. 214



X. I. Consequens confiderationis de Deo.

202

XII. De Deo & hominibus operum suorum.

203

XIII. De hominibus & hominibus, profan-

204

XIV. De hominibus & hominibus, profan-

205

XV. De hominibus & hominibus, profan-

206

XVI. De hominibus & hominibus, profan-

207



SANCTI



SANCTI
BERNARDI
ABBATIS
DE CONSIDERATIONE
LIBRI QUINQUE
AD EUGENIUM TERTIUM.
PROLOGVS.

SUBIT animum dictare
aliquid, quod te, Papa
beatissime Eugeni, vel ædi-
ficet, vel delectet, vel consoletur.
Sed nescio quomodo vult, & non
vult exire læta quidem, sed lenta
oratio: dum certatim illi contraria
imperare contendunt majestas,

* *al.* non
saltem.

atque amor. Nempe urget ille, inhibet illa. Sed intervenit tua dignatio, qua hoc ipsum non * præcipis, sed petis, cum præcipere magis te deceat. Majestate igitur tam dignanter cedente, quidni cedat pudor? Quid enim si cathedram ascendisti? Nec si ambules super pennas ventorum, subduceris affectui. Amor dominum nescit, agnoscit filium & in infulis. Per se satis subjectus est, obsequitur sponte, gratis obtemperat, libere reveretur. Non sic aliqui, non sic: sed aut timore ad ista impelluntur, aut cupiditate. Hi sunt qui in facie benedicunt, mala autem in cordibus eorum; blandiuntur coram, in necessitate deficiunt.

1. Cor. 13. 8. At caritas numquam excidit. Ego, ut verum fatear, matris sum liberatus officio, sed non deprædatus

affectu. Olim mihi invisceratus es, non tam facile erueris. Ascende in cælos, descende in abyssos: non recedes à me, sequar te quocumque ieris. Amavi pauperem, amabo pauperum & divitum patrem. Non enim, si bene te novi, quia pater pauperum factus, ideo non pauper spiritu es. In te hanc mutationem factam esse confido, non de te; nec priori statui tuo successisse promotionem, sed accessisse. Monebo te proinde, non ut magister, sed ut mater: plane ut amans. Amens magis videar, sed ei qui non amat, ei qui vim non sentit amoris.



LIBER PRIMUS.

CAPUT I.

*Pontifici, tam variis occupationibus
presso, condolet.*

Pontifici
condolet.

I. **U**NDE ergo jam incipiam?
Libet ab occupationibus
tuis, quia in his maxime condoleo
tibi. Condoleo dixerim, si tamen
doles & tu. alioquin doleo magis di-
xisse debueram: quia non est condo-
lere, ubi nemo qui doleat. Itaque si
doles, condoleo: si non; doleo tamen,
& maxime, sciens longius à salute ab-
sistere membrum quod obstupuit; &
ægrum sese non sentientem periculo-
sius laborare. Absit autem ut de te id
suspicer. Novi quibus deliciis dulcis
quietis tuæ non longe antehac frue-
bare. Non potes his dissuevisse tam
cito, ita subito non dolere nuper sub-
tractas. Plaga recens dolore non caret.

De Consideratione Liber I.

Neque enim jam occalluit vulnus,
nec in tam brevi versum in insen-
sibile est. Quamquam, si non dissi-
mules, non deest tibi jugis materia
justi doloris à quotidianis * jacturis.
Invitus, ni fallor, avelleris à tuæ Ra-
chel's amplexibus; & quoties id pati
contigerit, toties dolor tuus renove-
tur necesse est. At quando non con-
tingit? Quoties vis, & incassum? quo-
ties moves, nec promoves? quoties
conaris, & non datur ultra; eniteris,
& non paris? tentas, & abriperis; &
ubi incipis, ibi deficis; & dum adhuc
ordiris, succidunt te: *Venerunt filii*
usque ad partum, ait Propheta, &
vires non habet parturiens. Nosti hoc?
nemo te melius. Attrita frontis es,
& instar vitulae Ephraim doctus dili-
gere trituram, si, pace tua *, sic se
habent res tuæ. Absit: hæc est pars
illius, qui datus est in reprobum sen-
sum. Ab his sane cupio tibi pacem,
non cum his. Nihil plus metuo tibi
pace ista. Miraris si umquam possit

A religiosæ
vitæ deliciis
abstrahi,
grave &
dolendum.

* *al.* dam-
nis & jactu-
ris.

4. Reg. 19. 3.
Osee 10. 11.

* *al.* quod
pace tua lo-
quar.

accidere? Etiam, dico tibi, si res, ut
 affolet, per consuetudinem in incu-
 riam venerit.

C A P U T I I.

*Vis consuetudinis ad inducendos prae-
 mores, & duritiam cordis.*

2. **N**Oli nimis credere affectui
 tuo qui nunc est. Nil tam
 fixum animo, quod neglectu & tem-
 pore non obsolescat. Vulneri vetusto
 & neglecto callus obducitur, & eo
 insanabile, quo insensibile fit. Deni-
 que dolor continuus & acerbus, diu-
 turnus esse non patitur. Nam si non
 aliunde extunditur, necesse est cedat
 vel sibi. Enimvero cito aut de reme-
 dio consolationem recipiet, aut de
 assiduitate stuporem. Quid non in-
 vertat consuetudo? quid non assidui-
 tate duretur? quid non usui cedat?
 quantis quod prae amaritudine prius
 exhorrebant, usu ipso male in dulce

conversum est? Audi justum quid lamentetur super hujuscemodi. *Quæ*

prius tangere nolebat anima mea, nunc

præ angustia cibi mei sunt. Primum tibi

importabile videbitur aliquid: processu

temporis, si assuescas, judicabis non

adeo grave; paulo post & leve senties,

paulo post nec senties; paulo post

etiam delectabit. Ita paulatim in cor-

dis duritiam itur, & ex illa in aver-

sionem. Sic gravis & continuus dolor

citum, ut dixi, habiturus est exitum,

aut sanitatem profecto, aut insensibi-

litem.

3. Hinc prorsus, hinc tibi timui

semper, & timeo, ne dilato remedio,

dolorem non sustinens, periculo te

irrevocabiliter desperatus immergas.

Vereor, inquam, ne in mediis occu-

pationibus, quoniam multæ sunt,

dum diffidis finem, frontem dures;

& ita sensim te ipsum quodammodo

sensu prives justis, utilisque doloris.

Multo prudentius te illis subtrahas vel

ad tempus, quam patiare trahi ab

Job 6. 7.

Gradus in
duritiam
cordis.

V. serm. II.

in Psal. 90.

num. 5.

ipsis, & duci certe paulatim quo tu
 non vis. Quæris quo? Ad cor durum.
 Nec pergas quærere, quid illud sit: si
 non expavisti, tuum hoc est. SOLUM
 est cor durum, quod semetipsum non
 exhorret, quia nec sentit. Quid me
 interrogas? Interroga Pharaonem.
 NEMO duri cordis salutem umquam
 adeptus est, nisi quem forte miserans
 Deus, abstulit ab eo, juxta Prophe-
 tam, cor lapideum, & dedit cor car-
 neum. Quid ergo cor durum? IPSUM
 est quod nec compunctione scindi-
 tur, nec pietate mollitur, nec move-
 tur precibus: minis non cedit, fla-
 gellis duratur. Ingratum ad beneficia
 est, ad consilia infidum, ad judicia
 sævum*, inverecundum ad turpia,
 impavidum ad pericula, inhumanum
 ad humana, temerarium in* divina;
 præteritorum obliviscens, præsentia
 negligens, futura non providens.
 Ipsum est, cui præteritorum, præter
 solas injurias, nihil omnino non præ-
 terit; præsentium nihil non perit;

Ezech. 36.

26.

Cor durum
describitur.

* al. fur-
dum,

* al. ad.

De Consideratione Liber 1. 9

futurorum nulla, nisi forte ad ulciscendum, prospectio seu præparatio est. Et, ut brevi cuncta horribilis mali mala complectar, **I P S U M** est quod nec Deum timet, nec hominem reveretur. En quo trahere te habent hæ occupationes maledictæ: si tamen pergis, ut cœpisti, ita dare te totum illis, nil tui tibi relinquens. Perdis tempus: si licet nunc alterum me tibi exhibere Jethro, tu quoque in his stulto labore consumeris, quæ non sunt nisi afflictio spiritus, evisceratio mentis, evacuatio gratiæ. Nam fructus horum quid, nisi aranearum telæ?

Occupationes eorum trahunt.

Exod. 18.
18.

C A P U T I I I.

Indignum Proceribus Ecclesiæ, continue causis litigantium audiendis & decidendis incumbere.

4. **Q**Uæso te, quale est istud, de mane usque ad vesperam litigare, aut litigantes audire? Et uti-

nam sufficeret diei malitia sua ! non sunt liberæ noctes. Vix relinquitur necessitati naturæ , quod corpusculi pausationi sufficiat ; & rursus ad iurgia surgitur. Dies diei eructat lites , & nox nocti indicat malitiam. usque adeo non est respirare in bonis , non est alternam capeffere requiem , non vel rara interferi otia. Non ambigo te quoque ista deplorare : at frustra istud, si non & emendare studueris. Interim tamen sic semper facias hortor, nec te umquam ad ista duraveris quolibet usu vel assiduitate. *Percussi eos, et non doluerunt*, ait Deus *. Nihil tibi , & illis. Iusti potius tibi aptare curato & affectionem , & vocem , qui ait : *Quæ est enim fortitudo mea ut sustineam ? aut quis finis * meus , ut patienter agam ? Nec fortitudo lapidum * fortitudo mea , nec caro mea ænea est.* Magna virtus patientiæ : sed non hanc tibi ad ista optaverim. Interdum impatientem esse , probabilius. Tunc approbes illorum patientiam , quibus

Strepitus
litium Pon-
tifici vitan-
dus.

Jerem. 5. 3.

* al. Pro-
pheta.

Job 6. 1.
* al. quæ fi-
ducia.

* al. late-
rum.
Non omnis
patientia
probanda.

Paulus dicebat: *Libenter suffertis insipientes, cum sitis ipsi sapientes?* Ni fallor, ironia erat, & non laus, sed sugillatio quorumdam mansuetudinis, qui quasi datis manibus pseudoapostolis, à quibus & seducti erant, ad quæque ipsorum peregrina & prava dogmata trahi se patientissime ferrent. Unde & subdens, *Sustinetis enim, inquit, si quis vos in servitutem redigit.* Non bona patientia, cum possis esse liber, servum te permittere fieri. Nolo dissimules servitutem, in quam certe in dies, dum nescis, redigeris. Hebetati cordis indicium est, propriam non sentire continuam vexationem. *Vexatio dat intellectum auditui*, ait Is. 28. 19. quidam. Verum est; sed si nimia non fuerit. Nam si sit, non plane intellectum dat, sed contemptum. Denique impius cum in profundum malorum venerit, contemnit. Expergiscere ergo, & pessimæ servitutis jugum jam jamque imminens, immo jam non modice premens, non tan-

2. Cor. 11.
19.

Ibidem 20.

Is. 28. 19.

Prov. 18. 3.

tum cave, sed horre. An ideo non servus, quia non uni servis, sed omnibus? Nulla turpior servitus graviorve, quàm servitus Judæorum, quam quocumque ierint post se trahunt, & ubique dominos offendunt suos. Tu quoque dic, quæso, ubi umquam sis liber, ubi tutus, ubi tuus? Ubique strepitus, ubique tumultus, ubique jugum tuæ servitutis te premit.

C A P U T I V.

Quæ servitus digna, quæ indigna servo servorum Dei.

* al. oppo-
nas.

1. Cor. 9.

19.

B. Pauli
servitus
qualis.

5. **N** Ec mihi reponas * nunc Apostoli vocem, qua ait: *Cum essem liber ex omnibus, omnium servum me feci.* Longe est istud à te. Numquid hac ille servitute hominibus inserviebat in acquisitione turpis quæstus? Numquid ad eum de toto orbe confluebant ambitiosi, avari, simoniaci, sacrilegi, concubinari, incestuosi, & quæque istiusmodi mon-

stra hominum , ut ipsius apostolica auctoritate vel obtinerent honores ecclesiasticos , vel retinerent ? Ergo servum se * fecit homo , cui vivere Christus erat , & mori lucrum , ut plures lucrifaceret Christo , non ut lucra augeret avaritiæ. Non est igitur quod de sollertissima Pauli industria, & caritate tam libera quàm liberali, servili conversationi * tuæ patrocinium sumas. Quàm tuo dignius apostolatu , quàm salubrius tuæ conscientiae , quàm fructuosius Ecclesiae Dei audias potius ipsum alibi dicentem : *Pretio empti estis , nolite effici servi hominum.* Quid servilius indigniusque, præsertim summo Pontifici , quam, non dico omni die , sed pæne omni hora , insudare talibus rebus , & pro talibus ? Denique quando oramus ? quando docemus populos ? quando ædificamus Ecclesiam ? quando meditamur in lege ? Et quidem quotidie perstrepunt in palatio leges , sed Justiniani, non Domini. Justene etiam

Servitus
indigna
Pontifice.
* *al. te fecit.*

* *al. conditioni.*

1. Cor. 7.
23.

Pf. 18. 8.
Prælati
potius cu-
randæ leges
Dei, quam
Justiniani.

Psal. 118.
85.

istud ? Tu videris. Nam certe lex Domini immaculata, convertens animas. Hæ autem non tam leges, quàm lites sunt & cavillationes, subvertentes iudicium. Tu ergo Pastor & Episcopus animarum, qua mente, obsecro, sustines coram te semper filere illam, garrere istas ? Fallor, si non movet tibi scrupulum perversitas hæc. Puto quod & interdum compellat clamare ad Dominum cum Propheta : *Narraverunt mihi iniqui fabulationes, sed non ut lex tua.* I ergo, & te aude liberum profiteri sub tam gravi mole inconvenientiæ hujus, & cui fas non sit cervicem subducere. Nam si potes & non vis, multo magis servus es hujus ipsius tam perversæ voluntatis tuæ. An non servus, cui dominatur iniquitas ? Et maxime. Nisi tu forte indignius iudices hominem tibi, quàm vitium dominari. Quid interest, volens servias, an invitus ? Nam etsi coacta servitus miserabilior, sed affectata miserior est. Et quid vis me

facere, inquis? Ut tibi ab his occupationibus parcas. Impossibile fortasse respondebis, facilius cathedræ valedicere posse. Recte hoc, si rumpere, & non magis interrompere ista hortarer.

C A P U T V.

Non gerendam aliorum curam cum sui ipsius incuria & neglectu.

6. **A** Udi ergo quid redarguam, quid suadeam. Si quod vivis & sapias, totum das actioni, considerationi nihil: laudo te? in hoc non laudo. Puto quod & nemo, qui à Salomone audierit: *Qui minoratur actu, percipiet sapientiam.* Certe nec ipsi actioni expedit consideratione non præveniri. Si item totus vis esse omnium, instar illius qui omnibus omnia factus est; laudo humilitatem, sed si plena sit. Quomodo autem plena, te excluso? Et tu homo es. Ergo ut in-

Eccli. 38.

^{25.}

Non totum dandum actioni, & aliorum curæ.

1. Cor. 9.

^{22.}

tegra sit & plena humanitas, colligat
& te intra se sinus qui omnes recipit.

*Matth. 16.
26.*

Alioquin quid tibi prodest, juxta verbum Domini, si universos lucreris, te unum perdens? Quam ob rem cum omnes te habeant, esto etiam tu ex habentibus unus. Quid solus fraudaris munere tui? Usquequo spiritus vaudens, & non rediens? Usquequo non recipis te & ipse inter alios vice tua?

*Psal. 77.
39.*

Sapientibus & insipientibus debitor es; & soli negas te tibi? Stultus & sapiens, servus & liber, dives & pauper, vir & femina, senex & juvenis, clericus & laicus, justus & impius, omnes pariter participant te, omnes de fonte publico bibunt pectore tuo;

*Caritas à se
ipsa incipit.*

V. Bern.

*epist. 2. ad
Brunonem*

*Colon. &
infra lib. 2.*

cap. 2.

& tu seorsum sitiens stabis? Si maledictus qui partem suam facit deteriorem, quid ille qui se penitus reddit expertem? Sane deriventur aquæ tuæ in plateas; homines & jumenta & pecora bibant ex eis, quin & camelis pueri Abrahamæ potum tribuas: sed inter ceteros bibe & tu de fonte

putei

putei tui. *A alienus*, inquit, *non bibat ex* Prov. 5.17.
eo. Numquid tu alienus? Cui non alie-
 nus, si tibi es? Denique qui sibi ne-
 quam, cui bonus? Memento proin- Eccli. 14. 5.
 de, non dico semper, non dico sæpe,
 sed vel interdum reddere te ipsum tibi.
 Utere tu quoque te inter multos, aut
 certe post multos. Quid indulgentius?
 Hoc enim dico secundum indulgen-
 tiam, non secundum iudicium*. Puto * al. im-
perium.
 & ipso Apostolo indulgentiorem me
 in hac parte. Ergo plus quàm oportet,
 inquis. Non inficior. Quid, si ita opor-
 tet? Nam tu (ut confido) nostra non
 eris meticulosa informatione conten-
 tus, sed abundabis magis. Sane sic
 decet, te scilicet abundantiorē,
 quàm me audaciorē esse. Ego quo-
 que mihi tutius iudico apud majesta-
 tem timiditate, quam temeritate pe-
 riclitari. Et fortassis non secus moneri
 sapientem oportuit, ut sit quod scri-
 ptum est: *Da occasionem sapienti, et* Prov. 9.9.
sapientior erit.

CAPUT VI.

*Non tam Episcopis , quàm Principibus
judiciariam potestatem competere.*

1. Cor. 6. 5. 7.

ibid. 4.

* al. judi-
cium.

2. [Tim. 2.
4.

A Udi tamen Apostolum , quid
de hujusmodi sentiat. *Sic non
est inter vos sapiens , ait ille , qui judicet
inter fratrem & fratrem ? Et infert : Ad
ignominiam vobis dico : contemptibiliores
qui sunt in Ecclesia , illos constituite ad
judicandum.* Itaque secundum Aposto-
lum , indigne tibi usurpas tu Aposto-
licus officium * vile , gradum con-
temptibilium. Unde & dicebat Epif-
copus , Episcopum instruens : *Nemo
militans Deo implicat se negotiis sæcu-
laribus.* Ego autem parco tibi. Non
enim fortia loquor , sed possibilia. Pu-
tasne hæc tempora sustinerent , si ho-
minibus litigantibus pro terrena he-
reditate , & flagitantibus abs te judi-
cium , voce Domini tui responderes :
Luc. 12. 14. O homines , quis me constituit judi-

cem super vos ? In quale tu iudicium mox venires ? Quid dicit homo rusticanus & imperitus, ignorans primatum suum, inhonorans summam & præcellam sedem, derogans Apostolicæ dignitati ? Et tamen non monstrabunt, puto, qui hoc dicerent, ubi aliquando quispiam Apostolorum iudex federit hominum, aut divisor terminorum, aut distributor terrarum. Stetisse denique lego Apostolos judicandos, sedisse judicantes non lego. Erit illud, non fuit. Itane imminutor est dignitatis servus, si non vult esse major Domino suo : aut discipulus, si non vult esse major eo qui se misit : aut filius, si non transgreditur terminos, quos posuerunt patres sui ? *Quis me constituit iudicem ?* ait ille Dominus & magister : & erit injuria servo discipuloque, nisi iudicet universos ? Mihi tamen non videtur bonus æstimator rerum, qui indignum putat Apostolis seu apostolicis viris non judicare de talibus, qui-

Apostoli à
iudiciis &
rebus terrenis alieni.

Act. 5. 17.

Luc. 12. 14.
Non decet
Pontifices
de terrenis
judicare,

bus datum est iudicium in majora. Quidni contemnant iudicare de terrenis posselliunculis hominum, qui in cælestibus & angelos iudicabunt? Ergo in criminibus, non in possessionibus potestas vestra: quoniam propter illa, & non propter has, accepistis claves regni cælorum, prævaricatores utique exclusuri, non possessores. *Ut sciatis*, ait, *quia filius hominis habet potestatem in terra dimittendi peccata*, &c. Quænam tibi major videtur & dignitas, & potestas, dimittendi peccata, an prædia dividendi? Sed non est comparatio. Habent hæc infima & terrena iudices suos, reges & principes terræ. Quid fines alienos invaditis? Quid falcem vestram in alienam messem extenditis? Non quia indigni vos, sed quia indignum vobis talibus insistere, quippe potioribus occupatis. Denique ubi necessitas exigit, audi quid censeat

2. Cor. 6. Apostolus: *Si enim in vobis iudica-*

Matth. 9.
6.

Sed Principes
sæculares.

bitur hic mundus , indigni estis , qui de minimis judicetis.

C A P U T V I I .

Pietati & rerum æternarum considerationi in primis vacandum esse.

8. **S**ed aliud est incidenter excurrere in ista , causa quidem urgente : aliud ultro incumbere istis , tamquam magnis , dignisque tali & talium intentione rebus. Itaque hæc & innumera talia dicerem , si fortia dicerem , si recta , si sincera. Nunc autem quoniam dies mali sunt , sufficit interim admonitum esse , non totum te , nec semper dare actioni : sed considerationi aliquid tui & cordis , & temporis sequestrare. Hoc autem dico necessitatem intuens , non æquitatem. quamquam non sit præter æquum , necessitati cedere. Nam si liceret quod deceret, absolute per omnia & in omnibus præferendam , &

*Ephes. 5.
16.*

Considerationi aliquid dandum.

Id est pie-
tati.

* Job 28.
v. 28. juxta
LXX.

* al. licet
ex parte.

Psal. 45.
II.

* al. deinde.

vel solam, vel maxime colendam
eam, quæ ad omnia valet, id est pie-
tatem, prorsus irrefragabilis ratio
monstrat. Quid sit pietas quæris? Va-
care considerationi. Dicas forsitan in
hoc dissentire me ab illo *, qui pie-
tatem definit cultum Dei. Non est
ita. Si bene consideras, illius sensum
meis expressi verbis, etsi * tamen ex
parte. Quid tam pertinens ad cultum
Dei, quam quod ipse hortatur in Psal-
mo: *Vacate, et videte quoniam ego sum
Deus*? quod sane in partibus confi-
derationis præcipuum est. Quid deni-
que * tam valens ad omnia, quam
quæ ipsius quoque actionis partes be-
nigna quadam præsumptione suas fa-
cit, præagendo quodammodo, &
præordinando quæ agenda sunt? Ne-
cessario sane; ne forte quæ & præ-
visa & præmeditata poterant esse pro-
ficuo, præcipitata magis periculo
fiant. quod tibi met, si recordaris, in
ipsis actionibus causarum, & in ma-
gnis quibusque negotiis, magnarumve

consiliis rerum frequenter accidisse non ambigo. Et primum quidem ipsum fontem suum, id est mentem, de qua oritur, purificat consideratio. Deinde regit affectus, dirigit actus, corrigit excessus, componit mores, vitam honestat, & ordinat, postremo divinarum pariter & humanarum rerum scientiam confert. Hæc est quæ confusa determinat, hiantia cogit, sparsa colligit, secreta rimatur, vera vestigat, veri similia examinat, ficta & fucata explorat. Hæc est quæ agenda præordinat, acta recogitat, ut nihil in mente resideat aut incorrectum *, aut correctione egens. Hæc est quæ in prosperis adversa præsentit, in adversis quasi non sentit: quorum alterum fortitudinis, alterum prudentiæ est.

Considerationis effectus & utilitates.

* *al. incorruptum aut corrept.*



CAPUT VIII.

*Ex pietate & contemplatione pulcherri-
mam quatuor primarum virtutum har-
moniam & connexionem oriri.*

Inde qua-
tuor virtu-
tes cardini-
ales.

Fortitudo
ex pruden-
tia, quid.

9. **I**Bi etiam advertere tibi est sua-
visimum quemdam concen-
tum complexumque virtutum, atque
alteram pendere ex altera; sicut hoc
loco vides, Fortitudinis matrem esse
prudentiam: nec fortitudinem, sed
temeritatem esse quemlibet ausum,
quem non parturivit prudentia. Hæc
item est, quæ inter voluptates & ne-
cessitates media, quasi quædam arbi-
tra sedens, utrimque certis limitibus
determinat fines, istis assignans &
præbens quod sat est; illis quod ni-
mis est demens; & sic ex alterutro ter-
tiam formans virtutem, quam dicunt
Temperantiam. Nempe intemperan-
tem ipsa consideratio censet, tam
eum, qui necessariis pertinaciter de-

mit, quàm qui indulget superfluis.

Non est ergo temperantia in solis re-
secandis superfluis: est & in admit-
tendis necessariis. Hujus sententiæ Tempe-
rantia ex
fortitudine
quid.

Apostolus non fautor tantum, sed
auctor esse videtur, qui curam car-

nis nostræ docet non perfici in desi-

derio. Dicens siquidem *curam carnis* Rom. 13. 14.

non perfici, superflua cohibet: addens,

in desiderio, necessaria non excludit.

Unde mihi videtur non omnino ab-

surde definire Temperantiam, qui

hanc nec præcidere necessitatem, nec

excedere dicat, juxta illud Philosophi;

Ne quid nimis.

10. Jam de Justitia, quæ una ex

quatuor est, nonne constat conside- Justitiæ
perfectio
in quo.

ratione mentem præveniri, ut se for-

met in ea? Se enim necesse est prius

cogitet, ut ex se normam ducat ju-

stitiæ, nec factura utique alteri, quod

sibi fieri nolit; nec quod sibi velit

fieri negatura. In his nempe duobus

liquet integrum esse justitiæ statum. Connexio
justitiæ
cum aliis.

Sed nec ipsa solitaria est. Intuere

etenim nunc mecum etiam hujus pulcræ connexionem & cohærentiam cum temperantia, & item ambarum cum duabus superioribus, id est prudentia & fortitudine. Nam cum justitiæ dicatur portio, quod sibi non vult fieri quis, alii non facere; porro perfectio, quod ait Dominus, *Quæcumque vultis ut faciant vobis homines, & vos facite illis*: neutrum horum erit, nisi ipsa voluntas, de qua tota ducitur forma, sic ordinata fuerit, ut nec velit aliquid superfluum, nec necessarium quid superstitiose nolit: quod quidem temperantiæ est. Denique & ipsi justitiæ, ut justa sit, temperantia modum imponit. *Noli nimium esse justus*, ait Sapiens, ostendens per hoc minime approbandam justitiam, quæ temperantiæ moderamine non frenetur. Quid quod & ipsa sapientia hoc temperantiæ frenum non respuit? dicente Paulo secundum sapientiam à Deo sibi datam, *non plus sapere, quàm oportet*

Matth. 7.

12.

Eccles. 7.

17.

Rom. 12. 3.

sapere, sed sapere ad sobrietatem. Sed & è converso, quod temperantiæ necessaria justitia sit, ostendit Dominus, arguens in Evangelio illorum temperantiam, qui abstinebant ut viderentur hominibus jejunantes. Erat in cibo temperantia, sed non justitia in animo: quia non Deo placere, sed hominibus intendeabant. Quomodo rursum vel ista, vel illa sine fortitudine? cum constet fortitudinis esse, & non mediocris, cohibere velle & nolle suum inter angustias, parum & nimis; ut sit contenta voluntas modo illo medio, nudo, puro, solo, constante sibi, æquali undique sui, utpote ex omni parte pariter circumciso, quem solum constat esse virtutis.

Temperantiæ justitia necessaria.

Matth. 6.
16.

Utrique fortitudo.

II. Dico mihi, quæso, si potes, cuinam potissimum trium harum virtutum meditullium hoc dandum censeas, quod ita cunctis conterminum est, ut videatur esse proprium singularum? An ipsum virtus est, & nihil

Medium quî competat virtutibus cardinalibus.

* al. perinde.

aliud ? Sed sic virtus non esset multiplex, sed essent omnes una. An potius, quia sine eo virtus non est, omnium quodammodo intima vis una est & medulla virtutum, in qua sic uniuntur, ut proinde * una videantur omnes ? præsertim quod non illud participando communicant, sed totum à singulis atque integrum possidetur. Verbi causa, quid tam iustitiæ, quàm modus ? Alioquin si quid extra modum relinquit, non plane cuique tribuit quod suum est. quod tamen suum ipsius est facere. Quid tam rursus temperantiæ, quæ non aliunde profecto temperantia est, nisi quod nil immoderatum admittit ? Sed, puto, fatebere etiam non minus esse fortitudinis, cum vel maxime ipsa sit, quæ ab irruentibus vitiis, & quasi hinc inde suffocare conantibus, purum illud potenter eruit & vindicat in quoddam stabile fundamentum boni, sedemque virtutis. Ergo modum tenere iustitia est, temperantia

est, fortitudo est. Sed vide ne in hoc differant, ut iustitiæ quidem in affectu res sit; à fortitudine autem efficacia ejus; porro possessio atque usus apud temperantiam. Restat ut doceamus ab hac communione prudentiam non excludi. Nonne ipsa est, quæ modum, diu animi neglectu posthabitu, & vitiorum invidia quasi in abditis reclusum, & coopertum quadam vetustatis caligine, prior reperit & advertit? Propterea dico tibi: à paucis advertitur, quia paucorum prudentia est. Itaque iustitia quærit, prudentia invenit, vindicat fortitudo, temperantia possidet. Non mihi hoc loco propositum est de virtutibus disputare: sed hæc dixerim hortans ad vacandum considerationi, cujus beneficio hæc & similia advertuntur. Cui tam pio, tamque utili otio nullam in vita operam dare, nonne vitam perdere est?

CAPUT IX.

*Recentia Pontificum exempla paulatim
corrigena, vetera imitanda.*

Contraria
exempla ut
ferenda.
V. lib. 4. c.
2.

12. **Q**uid tamen, si te philoso-
phiae huic totum repente
devoveris? Prædecessores tui non ita
confueverunt: eris molestus quam
pluribus, quasi qui à patrum vesti-
giis subito deviaris. nempe id vide-
beris agere in suggillationem illorum.
Sed & notabere vulgari Proverbio:
Qui hoc facit quod nullus, miran-
tur omnes. veluti qui cupias admi-
rationi fore. Nec potes eorum omnia
simul & subito vel errata corrigere,
vel excessus redigere in modum. Erit
cum acceperis tempus, ut secundum
sapientiam tibi à Deo datam paula-
tim & opportune id studeas. Inte-
rim sane malo alterius utere in bo-
num quod potes. Quamquam si de
bonis, & non de novis sumamus

exempla, non defuere Romani Pontifices, qui sibi otia inter maxima negotia invenirent. Obsidio urbi, & barbaricus ensis civium cervicibus imminebat: numquid tamen istud terruit beatum Papam Gregorium, quominus sapientiam scriberet in otio? Eo nempe temporis (quod ex ejus præfatione * liquet) obscurissimam & extremam partem Ezechielis tam diligenter, quàm eleganter exposuit.

Gregorii
exemplum

* *al. verbis.*

C A P U T X.

Abusus Advocatorum, Judicum, Procuratorum, eorumque fraudes graviter perstringit.

13. **S**ed esto: alius inolevit mos, dies alii sunt, & alii hominum mores; & tempora periculosa non instant jam, sed exstant. Fraus, & circumventio, & violentia invalere super terram. Calumniatores multi, de-

* *al.* judi-
care quis.

Advocato-
rum frau-
des & abu-
sus.

* *al.* dece-
ret.

* *al.* mali-
loquas.

fenfor rarus, ubique potentiores pau-
periores opprimunt: non possumus
deesse oppressis, non negare injuriam
patientibus judicium. Nisi agitentur
causæ, audiantur partes, inter partes
judicari * quid potest? Agitentur cau-
sæ, sed sicut oportet. Nam is modus,
qui frequentatur, execrabilis plane;
& qui non dico Ecclesiam, sed nec
forum deceat *. Miror namque quem-
admodum religiosæ aures tuæ audire
sustinent hujusmodi disputationes Ad-
vocatorum, & pugnas verborum, quæ
magis ad subversionem, quàm ad in-
ventionem proficiunt veritatis. Cor-
rige pravum morem, & præcide lin-
guas vaniloquas *, & labia dolosa
claudere. Hi sunt qui docuerunt linguas
suas loqui mendacium, disertis adver-
sus justitiam, eruditis pro falsitate. Sa-
pientes sunt ut faciant malum, elo-
quentes ut impugnent verum. Hi sunt
qui instruunt à quibus fuerant in-
struendi; adstruunt non comperta,
sed sua; struunt de proprio calumnias
innocentiæ;

innocentiæ ; destruunt simplicitatem
veritatis ; obstruunt iudicii vias. N I-
H I L ita absque labore manifestam
facit veritatem , ut brevis & pura nar-
ratio. Ergo illas quas ad te necesse
erit intrare causas (neque enim om-
nes necesse erit) diligenter velim , sed
breviter decidere * assuescas , frustra-
toriasque & venatorias præcidere di-
lationes. Causa viduæ intret ad te ,
causa pauperis , & ejus qui non habet
quod det. Aliis alias multas poteris
committere terminandas,quàm plures
nec dignas audientia judicare. Quid
enim opus est admittere illos , quo-
rum peccata manifesta sunt præce-
dentia ad iudicium ? Tanta est impu-
dentia nonnullorum , ut cum mani-
festæ ambitionis prurigne scateat tota
facies causæ eorum , non erubescant
audientiam flagitare , publicantes se-
metipsos ad multorum conscientias,
in quo vel suæ solius satis poterant
confundi iudicio. Non fuit qui retun-
deret attritas frontes ; & ideo plures fa-

Causæ bre-
viter deci-
dendæ.

cti sunt, & magis induruerunt. Sed & NESCIO quomodo vitiosus conscientias vitiosorum non refugit: & ubi omnes fordent, unius fœtor minime sentitur. Quis enim umquam, verbi causa, avarum avarus, immundum immundus, luxuriosum luxuriosus erubuit? Plena est ambitiosis Ecclesia: non est jam quod horreat in studiis & molitionibus ambitionis, non plus quam spelunca latronis in spoliis viatorum.

Ambitiosis
plena Ec-
clesia.

CAPUT XI.

In Advocatos & Procuratores, qui ex iniquitate quæstum faciunt, severe animadvertendum.

14. **S**I Christi discipulus es, ignescat zelus tuus, exsurgat auctoritas adversus impudentiam hanc & generalem pestem. Intuere Magistrum sic facientem, & audi dicentem: *Qui mihi ministrat, me sequatur.*

Non parat aures ut audiat, sed flagellum quo feriat. Verba nec facit, nec recipit. Nec enim sedet judicans, sed insequitur puniens. Causam tamen non tacet, quod videlicet domum orationis, negotiationis fecissent. Ergo & tu fac similiter. Eru-
bescant vultum tuum istiusmodi ne-
gotiatores, si fieri potest: si non; ti-
meant. Et tu flagellum tenes. Timeant
nummularii, nec fidant in nummis,
sed diffidant; abscondant æs suum à
te, scientes effundere, quàm accipere
paratiorem. Hoc studiose & constan-
ter agendo, multos lucri facies, tur-
pium sectatores lucrorum honestiori-
bus officiis vindicando: multos, ne
vel audeant huiusmodi attentare, ser-
vabis. Adjice illud, quod non parum
proficiet & ad ferias quas tibi suadeo.
Ita nempe non pauca tibi momenta
temporum redimes ad vacandum
considerationi, quædam (ut dixi) ne-
gotia nec audiendo, quædam aliis
committendo: quæ tua digna puta-

Vult Pontificem non esse facilem nundinatoribus, sed terribilem.

Quomodo circa judicia se gerat.

veris audientia, fideli quodam & accommodo ipsi causæ compendio terminando. De qua consideratione his addere aliqua cogito, sed sub alterius sane principio libri: atque hic fit finis istius, ne duplo te oneret minus suavis oratio, si longa fuerit.



LIBER II.

CAPUT I.

Apologiam instituit ob infelicem successum expeditionis in Terram-sanctam susceptæ.

i. **M**emor promissi mei, quod ecce jam aliquamdiu teneor apud te, vir optime, Papa Eugeni, volo ipso absolvere me vel fero. Puderet dilationis, si mihi conscius forem incuriæ, aut contemptus. Non ita est: sed incidimus (ut ipse nosti) in tempus grave, quod & ipsi pæne vivendi usui videbatur indicere cessationem, nedum studiis; cum scilicet Dominus provocatus peccatis nostris, ante tempus quodammodo visus sit judicasse orbem terræ, in æquitate quidem, sed misericordiæ suæ oblitus. Non pepercit populo suo, non suo nomini. Nonne dicunt in gentibus,

Expeditionis sacræ infelix successus.

Psal. 113. 2.

Ubi est Deus eorum? Nec mirum. Ecclesiae filii, & qui Christiano censentur nomine, prostrati sunt in deserto, aut interfecti gladio, aut fame consumpti. Effusa est contentio super principes, & Dominus errare fecit eos in invio, & non in via. Contritio & infelicitas in viis eorum; pavor, & mæror, & confusio in penetralibus regum ipsorum. Quàm confusi pedes annuntiantium pacem, annuntiantium bona! Diximus, Pax, & non est pax: promissimus bona, & ecce turbatio. Quasi vero temeritate in opere isto, aut levitate usi simus. Cucurrimus plane in eo, non quasi in incertum, sed jubente te, immo per te Deo. Quare ergo jejunavimus, & non aspexit? humiliavimus animas nostras, & nescivit? Nam in his omnibus non est averfus furor ejus, sed adhuc manus ejus extenta. Quàm patienter interim adhuc audit voces sacrilegas, & Ægyptios blasphemantes; quia callide eduxit eos, ut occideret

Exod. 32.

12.

in deserto? Et quidem judicia Domini Pf. 118. 10.
vera: quis nesciat? At iudicium hoc
abyssus tanta, ut videar mihi non im-
merito pronuntiare beatum, qui non
fuerit scandalizatus in eo.

2. Et quomodo tamen humana
temeritas audet reprehendere, quod
minime comprehendere valet? Re-
cordemur supernorum iudiciorum,
quæ à sæculo sunt, si forte sit conso-
latio. Nam quidam ita dixit: *Memor* Pfal. 118.
fui iudiciorum tuorum à sæculo Domine, 52.
& consolatus sum. Rem dico ignotam Exemplis
nemini, & nunc nemini notam. Nem- se tuetur à
pe sic habent mortalium corda: calumnia.
quod scimus cum necesse non est,
in necessitate nescimus. Moyſes edu-
cturus populum de terra Ægypti,
melioſem illis pollicitus est terram.
Nam quando ipsum aliter sequeretur Exod. 3. 8.
populus, solam sapiens terram? Edu-
xit; eductos tamen in terram, quam
promiserat, non introduxit. Nec est
quod ducis temeritati imputari queat
tristis & inopinatus eventus. Omnia

faciebat Domino imperante, Domino cooperante, & opus confirmante sequentibus signis. Sed populus ille, inquis, duræ cervicis fuit, semper contentiose agens contra Dominum, & Moysen servum ejus. Bene: illi increduli & rebelles; hi autem quid? Ipsos interroga. Quid me dicere opus est, quod fatentur ipsi? Dico ego unum. Quid poterant proficere, qui semper revertebantur, cum ambularent? Quando & isti per totam viam non redierunt corde in Ægyptum? Quod si illi ceciderunt & perierunt propter iniquitatem suam; miramur istos eadem facientes, eadem passos? Sed numquid illorum casus adversus promissa Dei? Ergo nec istorum. Neque enim aliquando promissiones Dei justitiæ Dei præjudicant. Et audi aliud.

Malos mo-
res cruce-
signatorum
causatur.

Judic. 20. 1.

3. Peccavit Benjamin: accinguntur reliquæ tribus ad ultionem, nec sine nutu Dei. Designavit denique ipse ducem præliaturis. Itaque præliantur,

freti & manu validiori, & causa potiori, & (quod his majus est) favore divino. At quàm terribilis Deus in *Ps. 65. 5.* consiliis super filios hominum ! Terga dedere sceleratis ultores sceleris, & paucioribus plures. Sed recurrunt ad Dominum. & Dominus ad eos : *Ascendite*, inquit. Ascendunt denuo, denuoque fusi & confusi sunt. Ita Deo primum quidem favente, secundo & jubente, justi justum certamen ineunt, & succumbunt. Sed quo inferiores certamine, eo fide superiores inventi sunt. Quid putas de me facerent isti, si meo hortatu iterato ascenderent, iterato succumberent ? quando me audirent monentem tertio repetere iter, repetere opus, in quo semel jam, & secundo frustrati forent ? Et tamen Israëlitaë unam & alteram non reputantes frustrationem, tertio parent, & superant. Sed dicunt forsitan isti : Unde scimus quod à Domino sermo egressus sit ? Quæ signa tu facis, ut credamus tibi ? Non est quod ad ista

ipse respondeam : parcendum verecundiaē meae. Responde tu pro me & pro te ipso, secundum ea quae audisti, & vidisti; aut certe secundum quod tibi inspiraverit Deus.

4. Sed forte miraris me prosequi ista, qui aliud proposueram. Facio non oblitus propositi, sed quod à proposito non iudicem aliena. Nempe de consideratione (ut memini) sermo mihi ad tuam dignationem. Et sane magna ista res, & egens consideratione non minima. Quod si res magnas à magnis considerari oportet, cui aequae, ut tibi, id studii competit, qui parem super terram non habes? Sed tu secundum sapientiam & potestatem datam tibi desuper, facies de hoc. Non est meae humilitatis dictare tibi sic vel sic fieri quicquam. Sufficit intimasse oportere aliquid fieri, unde & Ecclesia consoletur, & obstruatur os loquentium iniqua. Haec pauca vice apologiaē dicta sint, ut ipsa qualiacumque habeat conscientia tua ex

Papa hīc
parem non
habet.

Bona con-
scientia,
optima
apologia.

me, unde habeat me excusatum, & te pariter, etsi non apud eos qui facta ex eventibus æstimant, certe apud teipsum. PERFECTA & absoluta cuique excusatio, testimonium conscientia suæ. Mihi pro minimo est ut ab illis judicer, qui dicunt bonum malum, & malum bonum; ponentes lucem tenebras, & tenebras lucem. *Isa. 5. 20.* Et si necesse sit unum fieri è duobus, malo in nos murmur hominum, quàm in Deum esse. Bonum mihi, si digne- *Bern. ma- vult se peti maledictis quàm Deū.* tur me uti pro clypeo. Libens excipio in me detrahentium linguas maledicas, & venenata spicula blasphemorum, ut non ad ipsum perveniant. Non recuso inglorius fieri, ut non irruatur in Dei gloriam. Quis mihi det gloriari in voce illa: *Quoniam* *Pf. 68. 3.* *propter te sustinui opprobrium, operuit confusio faciem meam?* Gloria mihi est consortem fieri Christi, cujus illa vox est: *Opprobria exprobrantium tibi ceciderunt super me.* *Pf. 68. 10.* Nunc jam recurat stilius ad suam materiam, & in ea

quæ proposueramus, suo tramite gradiatur oratio.

C A P U T II.

Considerationis à contemplatione distinctio.

5. **E**T primo quidem ipsam considerationem quid dicam, considera. Non enim idem per omnia quod contemplationem intelligi volo; quod hæc ad rerum certitudinem, illa ad inquisitionem magis se habeat. Juxta quem sensum potest contemplatio quidem definiri, verus certusque intuitus animi de quacumque re, sive apprehensio veri non dubia. Consideratio autem, intensa ad investigandum cogitatio, vel intentio animi vestigantis verum. Quamquam soleant ambæ pro invicem indifferenter usurpari.

Quid sit
Contem-
platio.

Quid Con-
sideratio.

C A P U T I I I.

Considerationis quatuor puncta designat.

6. **J**Am quod ad considerationis at- Quatuor
consideran-
da,
tinet fructum, quatuor ut occur-
runt, tibi considerata reor: te, quæ
sub te, quæ circa te, quæ supra te
sunt. A te tua consideratio inchoet,
ne frustra extendaris in alia, te ne-
glecto. Quid tibi prodest si univer- Matt. 16.
26.
sum mundum lucreris, te unum per-
dens? **E T S I** sapiens sis, deest tibi ad
sapientiam, si tibi non fueris. Quan-
tum vero? Ut quidem senserim ego,
totum. Noveris licet omnia mysteria,
noveris lata terræ, alta cæli, profunda Cognitio
& cura sui
quam ne-
cessaria.
V. sup. lib. I.
cap. 5.
maris; si te nescieris, eris similis ædi-
ficanti sine fundamento, ruinam, non
structuram faciens. Quidquid extru-
xeris extra te, erit instar congesti
pulveris, ventis obnoxium. **N O N**
ergo sapiens, qui sibi non est. Sapiens
sibi sapiens erit: & bibet de fonte

* *al. ex se
emittente.*

putei sui primus ipse. A te proinde incipiat tua consideratio ; non solum autem, sed & in te finiatur. Quocumque evagetur, ad te revocaveris eam cum salutis fructu. Tu primus tibi, tu ultimus. Sume exemplum de summo omnium Patre, Verbum suum * & emittente, & retinente. Verbum tuum, consideratio tua : quæ si procedit, non recedat : sic progrediatur, ut non egrediatur ; sic exeat, ut non deferat. In acquisitione salutis nemo tibi germanior unico matris tuæ. Contra salutem propriam cogites nihil. Minus dixi, contra : præter, dixisse debueram. **Q U I C Q U I D** se considerationi offerat, quod non quoquo modo ad tuam ipsius salutem pertineat, respuendum.



CAPUT IV.

Notitiam sui ipsius triplici consideratione sui complectitur ; et) primum quidem considerationis membrum hic exsequitur.

7. **E**T hæc tui consideratio in tria quædam dividitur , si consideres quid , quis , & qualis sis. Quid in natura , quis in persona , qualis in moribus. Quid , verbi gratia , homo. Quis , Papa vel summus Pontifex. Qualis , benignus , mansuetus , vel quicquid tale. Quamquam primum illud , philosophicum sit magis , quàm apostolicum vestigare ; attamen est in definitione hominis , quem dicunt animal rationale , mortale , quod diligentius intueri si libet , licet. Non est quod tuæ in eo aut professioni obviet , aut dignitati : est vero quod saluti afferre queat. Nam consideranti duo hæc simul , rationale ,

Consideratio sui tripartita.

Homo quid.

mortaleque ; is tibi exinde occurrit fructus , ut & mortale , quod in te est , rationale humiliet ; & rursus rationale , mortale confortet. quod neutrum neglectui erit homini circumspecto. Si qua adhuc præsens consideranda requirit locus , tractabuntur infra , & forte utilius ex partium collatione.

C A P U T V.

Alterum membrum considerationis sui proponit : nempe , Quis sit , & unde.

8. **N**unc quis sis , & de quo sis factus advertendum. Quamquam quod dixi , de quo , id mihi prætereundum putem , tuæ potius relinquendum agnitioni. Illud dico indignum tibi , citra perfectum agere de tanta assumpto perfectione. Quidni erubescas minimus inveniri in magnis , qui te recordaris magnum in minimis exstitisse ? Non es oblitus primæ * professionis : non excidit menti

Monastica
professionis
ei memo-
riam revo-
cat.

* al. primæ
tuæ.

menti quæ subducta est manui, sed ne affectui quidem. Ipsam ad singula tua imperia, judicia, instituta, habere præ oculis non erit inutile. Hæc te consideratio facit honoris contemptorem in honore ipso. Atque id magnum. Non recedat à pectore: clypeus est tibi vel à sagitta illa, *Homo* Psal. 48. 13. *cum in honore esset, non intellexit.* Loquere ergo tibi: Abiectus eram in domo Dei mei. Quale est hoc, de paupe & abjecto levare super gentes & regna? Quis ego, aut quæ domus patris mei, ut sedeam excelsis sublimior? Sane qui dixit mihi, *Amice, ascende superius*, Luc. 14. 10. amicum fore fidit. Si minus inveniar, non expedit quidem. Qui elevavit, & dejicere potest. Sera querela: *Quoniam elevans assisti me.* Psal. 101. 11. Non est quod blandiatur celsitudo, ubi sollicitudo major. Illa discrimen intendit, hæc amicum probat. Huic accingamur, si nolumus tandem cum rubore novissimum locum tenere.

CAPUT VI.

*Quale debeat esse Procerum Ecclesie
studium.*

9. **F** Actum superiorem dissimulare nequimus ; sed enim ad quid, omnimodis attendendum. Non enim ad dominandum opinor. Nam & Propheta, cum similiter levaretur, audivit : *Ut evellas & destruas, & disperdas & dissipes, & ædifices & plantes.* Quid horum factum sonat? Rusticani magis sudoris schemate quodam labor spiritualis expressus est. Et nos igitur, ut * multum sentiamus de nobis, impositum senserimus ministerium, non dominium datum. Non sum ego major Prophetâ ; & si forte par potestate, sed meritorum non est comparatio. Hæc loquere tibi, & doce te ipsum, qui alios doces. Puta te velut unum aliquem ex prophetis. An non satis ad te ? & nimium. Sed

*Jerem. i.
10.*

*Prælati est
ministe-
rium, non
dominium.*

** al. ut non
multum.*

gratia Dei es id quod es. Quid ? Esto quod Propheta. numquid plus quam propheta ? Si sapias , eris contentus mensurâ , quam tibi mensus est Deus. Nam quod amplius est , à malo est. Disce exemplo prophetico præfidere non tam ad imperitandum , quàm ad factitandum quod tempus requirit. Disce sarculo tibi opus esse , non sceptrō , ut opus facias prophetæ. Et quidem ille non regnaturus ascendit , sed extirpaturus. Putasne & tu invenias * aliquid elaborandum in agro Domini tui ? Et plurimum. Non plane totum quivere emundare * Prophetæ : aliquid filiis suis Apostolis quod agerent reliquerunt ; aliquid ipsi parentes tui tibi. Sed nec tu ad omne sufficies. Aliquid profecto tuo relicturus es successori , & ille aliis , & alii aliis usque in finem. Circa undecimam denique horam operarii otii arguuntur , & mittuntur in vineam. Antecessores tui Apostoli audierunt , quia *messis quidem multa , operarii vero pauci*. Paternam

Prælato
sarculus
convenit ,
non scep-
trum.

* *al.* non in-
venias.

* *al.* emen-
dare.

Laboris
materia ei
non deerit.

Matth. 9.
37.

Galat. 4.7.

tibi vindicato hereditatem. Nam si filius, & heres. Ut probes heredem, evigila ad curam, & non otio torpeas, ne & tibi dicatur: Quid hic stas tota die otiosus?

Matth. 20.
6.

10. Multo minus inveniri oportet aut deliciis resolutum, aut resupinum pompis. Nihil horum tibi tabulæ testatoris assignant. Sed quid? Si illarum tenore contentus sis, curam potius hereditabis & operam, quam gloriam & divitias. Blanditur cathedra? Specula est. Inde denique superintendis, sonans tibi Episcopi nomine non dominium, sed officium. Quidni loceris in eminenti, unde prospectes omnia, qui speculator super omnia constitueris? Enimvero prospectus iste procinctum parit, non otium. Quo-
* al. quan-
do.
M O D O * libet gloriari, ubi otiari non licet? Nec locus est otio, ubi sedula urget sollicitudo omnium ecclesiarum. Nam quid tibi aliud dimisit sanctus Apostolus? *Quod habeo*, inquit, *hoc tibi do*. Quid illud? Unum scio:

Episcopus
est nomen
officii, non
dominii.

Act. 3.6.

non est aurum neque argentum, cum ipse dicat : *Argentum & aurum non est mihi*. Si habere contingat, utere non pro libitu, sed pro tempore. Sic eris utens illis, quasi non utens. Ipsa quidem, quod ad animi bonum spectat, nec bona sunt, nec mala : usus tamen horum bonus, abusus mala ; sollicitudo peior, quæstus turpior. Esto, ut alia quacumque ratione hæc tibi vindices : sed non apostolico jure. Nec enim tibi ille dare quod non habuit potuit. Quod habuit, hoc dedit, sollicitudinem, ut dixi, super ecclesias. Numquid dominationem ? Audi ipsum. *Non dominantes*, ait, *in clero, sed forma facti gregis*. Et ne dictum sola humilitate putes, non etiam veritate, vox Domini est in Evangelio : *Reges gentium dominantur eorum, & qui potestatem habent super eos, benefici vocantur*. Et infert : *Vos autem non sic*. Planum est : Apostolis interdicitur dominatus.

Opes quatenus habeat Pontifex.

1. Pet. 5. 3.

Luc. 22.

25.

II. I ergo tu, & tibi usurpare aude

D iij

aut dominans apostolatum, aut Apostolicus dominatum. Plane ab alterutro prohiberis. Si utrumque simul habere voles, perdes utrumque. Alioquin non te exceptum * illorum numero putes, de quibus queritur Deus

* al. exemplum.

Osea 8. 4. sic: *Ipsi regnaverunt, & non ex me; principes exstiterunt, & ego non cognovi.* Jam si regnare sine Deo juvat, habes gloriam, sed non apud Deum. At si interdictum tenemus, audiamus

Luc. 21. 26. edictum: *Qui major est vestrum, fiat sicut junior; & qui praeceptor est, sicut qui ministrat.* Forma apostolica hæc est: dominatio interdicitur, indicitur ministratio. quæ & commendatur ipsius exemplo Legislatoris, qui secutus adjungit: *Ego autem in medio vestrum sum, tamquam qui ministrat.* Quis se

Christi exemplo gloriosius est ministrare quam dominari.

2. Cor. 11. 23.

jam titulo hoc inglorium putet, quo se prior Dominus gloriæ præsignivit? Merito Paulus gloriatur in eo, dicens: *Ministri Christi sunt, & ego.* Et addit: *Ut minus sapiens dico, plus ego. In laboribus plurimis, in carceribus abun-*

dantius, in plagis supra modum, in mortibus frequenter. O præclarum ministerium! Quo non id gloriosius principatu? SI GLORIARI oportet; forma tibi sanctorum præfigitur, Apostolorum proponitur gloria. Parvane tibi illa videtur? Quis mihi tribuat similem fieri in gloria sanctorum? Clamat Propheta: *Mihi autem nimis honorificati sunt amici tui Deus, nimis confortatus est principatus eorum.* Clamat Apostolus: *Mihi autem absit gloriari, nisi in cruce Domini nostri Jesu Christi.*

Apostolorum gloria, crux & labores.

Psal. 138.

17.

Gal. 6. 14

12. Hoc glorieris opto semper optimo genere gloriæ, quod Apostoli, quod Prophetæ delegere sibi, trans-misere * tibi. Agnosce hereditatem tuam in Christi cruce, in laboribus plurimis. Felix qui dicere potuit: *Plus omnibus laboravi.* Gloria est, sed nil in ea inane, nil molle, nil resupinum. Si labor terret, merces invitet. Unusquisque enim secundum suum laborem mercedem accipiet. Et si ille plus

* *ab. reli-quere.*

1. Cor. 15.

10.

Exhortatio ad sollicitudinem atque laborem.

omnibus laboravit, non tamen totum elaboravit: & adhuc locus est. Exi in agrum Domini tui, & considera diligenter, quantis hodieque de veteri maledicto silvescat spinis ac tribulis. Exi, inquam, in mundum: ager est enim mundus, isque creditus tibi. Exi in illum, non tamquam dominus, sed tamquam villicus, videre & procurare unde exigendus es rationem. Exi*, dixerim, quibusdam tuæ passibus intentæ sollicitudinis, & sollicitæ intentionis. Neque enim ipsi qui iussi sunt ire in orbem universum, orbem circumierunt præsentia corporis, sed mentis providentia. Et tu leva oculos quosdam considerationis tuæ, & vide regiones, si non sunt magis siccæ ad ignem, quàm albæ ad messem. Quàm multæ, quas putaveras fruges, diligenter inspectæ, vepres potius apparebunt? Immo ne vepres quidem: annosæ & veterinosæ arbores sunt, sed non profecto fructiferæ: nisi forte glandium aut filiquarum, quas porci

* *al.* Exi
autem quibusdam.

manducant. Quousque occupant terram? Nonne, si exis & cernis ista, pudebit otiosam jacere securim; pudebit sine causa falcem apostolicam accepisse?

13. In hunc quondam agrum Isaac patriarcha exierat, cum primo Rebecca occurrit ei: &, ut Scriptura habet, *Exierat ad meditandum*. Ille ad meditandum, tu ad extirpandum egrediariis necesse est. Tibi jam præcessisse meditatio debet: tempus faciendi præ manibus. Si nunc hæsitare* incipias, id quidem fero. Ante, juxta consilium Salvatoris, sedisse debueras, ante æstimasse opus, metiri vires, ponderasse sapientiam, merita comparasse, sumptus computasse virtutum. Age ergo, puta tempus putationis adesse, si tamen meditationis præiuit. Si cor movisti, movenda jam lingua, movenda est & manus. Accingere gladio tuo, gladio spiritus, quod est verbum Dei. Glorifica manum & brachium dextrum in faciendo vindictam

Genes. 24:
62.

* *al.* cogitare.
Luc. 14. 28.
Ante dignitatem metiendæ vires.

Ephes. 6.
17.

Pastorum
est domare
lupos, non
dominari
ovibus.

Jacob. 4.

17.

Luc. 12. 47.

* al. fa-
ciens di-
gna.

Qualis no-
bilitas quæ-
renda Præ-
latis Eccle-
siæ.

Heb. 11. 33.

in nationibus, increpationes in popu-
lis, in alligando reges eorum in com-
pedibus, & nobiles eorum in manicis
ferreis. Si hæc facis, honorificas mi-
nisterium tuum, & ministerium te.
Non mediocris iste principatus. Ex-
turbare est hoc malas bestias à termi-
nis tuis, quo greges tui securi in pas-
cua educantur. Domabis lupos, sed
ovibus non dominaberis. Pascendas
utique, non premendas suscepisti. Si
bene considerasti, quis sis; hæc te
oportere facere non ignoras. Porro
scienti & non facienti, peccatum est
tibi. Non es oblitus ubi legeris: *Ser-
vus sciens voluntatem domini sui, &
non faciens* *, *plagis vapulabit multis.*
Sic Prophetæ, sic Apostoli factita-
bant. Fortes fuere in bello, non mol-
les in sericis. Si filius es Apostolorum
& Prophetarum, & tu fac similiter.
Vindica tibi nobile genus similibus
moribus; quod non aliunde nobile,
quàm morum ingenuitate, & fidei
fortitudine fit. Per hanc vicerunt re-

gna , operati sunt justitiam , adepti
sunt repromissiones. Hoc chirogra-
phum paternæ tuæ hereditatis , quod
tibi evolvimus , ubi inspicias portio-
nem * quæ te contingit. Induere forti-
tudinem, & hereditasti. Posside fidem,
posside pietatem, posside sapientiam,
sed sapientiam sanctorum : (ipsa est ti-
mor Domini) & habes quod tuum
est. Habes sine defraudatione inte-
grum paternum fundum. Pretiosissimus
fundus virtus est. **BONUS FUNDUS**
humilitas , in quo omne ædificium
spirituale constructum crescit in tem-
plum sanctum in Domino. Per hanc
nonnulli possedere etiam portas inimi-
corum. Quæ enim virtutum æque po-
test dæmonum omnem debellare su-
perbiam , tyrannidem hominum ?
Ceterum cum omni indifferenter per-
sonæ hæc sit quædam turris fortitudi-
nis à facie inimici ; nescio quo pacto
tamen vis ejus major in majoribus ,
& in clarioribus clarior comprobatur.
Nulla splendidior gemma , in omni

* *add. sub-*
stantiæ.

Qualis fun-
dus.

Humilita-
tis com-
mendatio
in magna-
tibus.

præcipue ornatu summi Pontificis. Quo enim celsior ceteris, eo humilitate apparet illustrior & seipso.

C A P U T VII.

Resumens priorem questionem, quis sit, diligentius expendit.

14. **A**Rguar forsitan, quod non satis primis explicitis partibus, in secundas nescio quomodo stilius excurrerit, describere inchoans qualem te oporteat esse, cum necdum, quis sis, plenius expressisset. Credo erubescens in summo positum apice videri hominem nudum, festinavit induere insignibus suis. Absque his nempe eo deformior, quo illustrior pares. Numquid potest abscondi civitatis supra montem positæ desolatio; aut latere fumus lucernæ extinctæ super candelabrum? Simia in tecto, rex fatuus in folio sedens. Et nunc audi canticum meum, & quidem

Indignum
dignitates
ab indignis
occupari.

minus suave , sed salutare. M O N S-
T R U O S A res , gradus summus , &
animus infimus : sedes prima , & vita
ima ; lingua magniloqua , & manus
otiosa ; sermo multus , & fructus nul-
lus ; vultus gravis , & actus levis ; in-
gens auctoritas , & nutans stabilitas.
Admovi speculum : fœdus se in eo
vultus agnoscat : tu tuum gaude dissi-
mitem inveniri. Inspice tamen & tu,
ne forte , etsi sit unde merito placeas
tibi , etiam in quo debeas displicere ,
non desit. Volo glorieris testimonio
conscientiæ tuæ , sed non minus ut
eodem ipso humilieris. Rara vox ,
Nihil mihi conscius sum. Cautior in
bonis ambulas , si & mala non lateant.
Quamobrem , ut dixi , noveris te , ut
inter angustias quæ non desunt , frua-
ris conscientiæ bono ; magis autem ut
scias quid desit tibi. Nam cui non
desit ? Omnia illi desunt , qui nil sibi
deesse putat. Quid si summus Ponti-
fex sis ? N U M Q U I D quia summus
Pontifex , ideo summus ? I N F I M U M

Ex testi-
monio con-
scientiæ
gloria &
humiliatio.

1. Cor. 4. 4.

Nihil ha-
bet , qui se
omnia pu-
tat habere.

* *al. divis.*

Unde Romanus Pontifex dicitur Summus.

Non est perfectus, qui non cupit esse perfectior.

noris esse, si summum putas. Quis summus? Cui addi non possit. Gravi-
ter erras, si te illum existimes. Absit.
Non tu de illis es, qui dignitates
virtutes putant. Tibi ante experta
virtus, quàm dignitas fuit. Augustis
relinquito illam sententiam, aliisque,
qui divinis * coli honoribus non ti-
muerunt: verbi gratia, Nabuchodo-
nosor, Alexandro, Antiocho, Herodi.
Tu vero considera, non consumma-
tione summum te dici, sed compa-
ratione. Nec me putes comparatio-
nem dicere meritorum, sed ministe-
riorum. Sic te existimet homo, ut
ministerium Christi, & (quod absque
præjudicio sanctitatis cujuscumque di-
xerim) summum plane inter ministros.
Alias niti te ad summum velim, non
putare summum, aut velle putari ante-
quam sis. Nam quomodo proficis, si
jam sufficis tibi? Non sit proinde tibi
aut pigrum vestigare quid desit, aut
fateri quod desit verecundum. Lo-
quere & tu voce antecessoris tui:

Non quod jam acceperim, aut jam perfectus sim. Et rursum: Ego me non arbitror comprehendisse. Hæc scientia sanctorum: hæc longe ab illa quæ inflat. Hanc qui apponit, apponit & dolorem: sed dolorem hunc nemo umquam sapiens subterfugit. Est quippe medicinalis dolor, per quem stupor ille letalis animi duri & impœnitentis extunditur. Et ideo sapiens, qui dicere potuit: *Et dolor meus in conspectu meo semper.* Nunc jam repetendæ reliquæ, si quæ sunt, loci illius, à quo paulo ante divertimus.

Philip. 31. 2.

Ibid. 13.

Eccl. 1. 18.

Psal. 37.
18.

CAPUT VIII.

De pontificiæ dignitatis & potestatis excellentia differit.

15. **A**Ge, indagemus adhuc diligentius quis * sis, quam * al. qui. geras videlicet pro tempore personam in Ecclesia Dei. Quis es? Sacerdos magnus, summus Pontifex. Tu prin-

Summi
Pontificis
elogia.

ceps Episcoporum, tu heres Aposto-
 rum; tu primatu Abel, gubernatu
 Noë, patriarchatu Abraham, ordine
 Melchisedech, dignitate Aaron, auc-
 toritate Moyſes, iudicatu Samuel,
 potestate Petrus, unctione Christus.
 Tu es cui claves traditæ, cui oves cre-
 ditæ sunt. Sunt quidem & alii cæli
 janitores, & gregum pastores: sed tu
 tanto gloriosius, quanto & differen-
 tius utrumque præ ceteris nomen he-
 reditaſti. Habent illi sibi assignatos
 greges, singuli singulos: tibi universi
 crediti, uni unus. Nec modo ovium,
 sed & pastorum tu unus omnium pas-
 stor. Unde id probem quæris? Ex
 verbo Domini. Cui enim, non dico
 Episcoporum, sed etiam Apostolorum,
 sic absolute & indiscrete totæ com-
 missæ sunt oves? *Si me amas, Petre,
 pascere oves meas.* Quas? illius vel illius
 populos civitatis, aut regionis, aut
 certi * regni? *Oves meas*, inquit. Cui
 non planum, non designasse aliquas,
 sed assignasse omnes? Nihil excipitur,
 ubi

Pastor pas-
 torum.

Johan. 21.
 15.

* al. certe.

ubi distinguitur nihil. Et forte præ-
sentes ceteri condiscipuli erant, cum
committens uni, unitatem omnibus
commendaret in uno grege & uno
pastore, secundum illud: *Una est co-*
lumba mea, formosa mea, perfecta mea.
Ubi unitas, ibi perfectio. Reliqui nu-
meri perfectionem non habent, sed
divisionem, recedentes ab unitate.
Inde est quod alii singuli singulas for-
titi sunt plebes, scientes sacramentum.
Denique Jacobus, qui videbatur co-
lumna Ecclesiæ, una contentus est
Jerosolyma, Petro universitatem ce-
dens. Pulcre vero ibi positus est susci-
tare semen defuncti fratris, ubi occisus
est ille. nam dictus est frater Domini.
Porro cedente Domini fratre, quis
se alter ingerat Petri prærogativæ?

16. Ergo, juxta canones tuos, alii in
partem sollicitudinis, tu in plenitudi-
nem potestatis vocatus es. Aliorum
potestas certis arctatur limitibus: tua
extenditur & in ipsos, qui potestatem
super alios acceperunt. Nonne, si

Cant. 6. 8.

Galat. 1. 19.

Petrus A-
postolis su-
perior.

Papæ po-
testas in E-
piscopos.
V. Cyprian.
lib. 3. ep. 13.

* *al. ipsum.**Johan. 21.**Apoc. 17. 15.*

causa exstiterit, tu Episcopo cælum claudere, tu ipsum ab episcopatu deponere, etiam & tradere satanæ potes? Stat ergo inconcussum privilegium tuum tibi, tam in datis clavibus, quàm in ovibus commendatis. Accipe aliud, quod nihilo minus prærogativam* confirmat tibi. Discipuli navigabant, & Dominus apparebat in littore; quodque jucundius erat, in corpore redivivo. Sciens Petrus quia Dominus est, in mare se misit, & sic venit ad ipsum, aliis navigio pervenientibus. Quid istud? Nempe signum singularis pontificii Petri, per quod non navem unam, ut ceteri quique suam, sed sæculum ipsum suscepit gubernandum. Mare enim sæculum est; naves, Ecclesiæ. Inde est quod altera vice instar Domini gradiens super aquas, unicum se Christi Vicarium designavit, qui non uni populo, sed cunctis præesse deberet. siquidem *aquæ multæ, populi multi.* Ita cum quisque ceterorum habeat suam, tibi una commissa

est grandissima navis ; facta ex omnibus ipsa universalis Ecclesia , toto orbe diffusa.

C A P U T I X.

Proprie nature considerationem commendat.

17. **E**N quis es : sed noli oblivisci etiam quid. Nam & ego non sum oblitus , id me promississe repetiturum in opportunitate. Quàm opportune cum eo qui es , etiam quod ante eras , consideras ! Quid dico , eras ? Et nunc es. Quid definas intueri , quod non desiisti esse ? Una sane consideratio est , quid fueris , & quid sis : nam quis sis factus , altera. Non oportet ut ista extundat illam in scrutinio tui. Es enim , ut dixi , adhuc quod eras : & non minus hoc es , quàm quod factus es post , forte & magis. Denique illud natus es , mutuatus hoc , non in hoc mutatus. Non rejectum illud , sed istud adjectum. Tractemus

Consideret
quis & quid
sit.

* *al. confi-
dera.*

utrumque simul. nam, ut præfatum me memini, collatæ ex invicem ambæ res utiliores fient. Dixi supra consideranti quid sis, naturam occurrere, qua es homo. nam homo natus es. Porro percunctanti quis, personæ respondebitur nomen, quod est Episcopus: quod quidem factus, non natus es. Quid tibi horum videtur ad purum esse tui, & ad te principalius pertinere? quod factus, an quod natus? Nonne quod natus? Hoc ergo consulo * consideres maxime, quod maxime es, hominem videlicet, quod & natus es.

18. Nec modo quid natus, sed & qualis natus, oportet attendas, si non vis tuæ considerationis fructu & utilitate fraudari. Tolle proinde nunc hereditaria hæc perizomata ab initio maledicta. Dirumpe velamen foliorum celantium ignominiam, non plagam curantium. Dele fucum fugacis honoris hujus, & male coloratæ nitorem gloriæ, ut nude nudum confi-

deres, quia nudus egressus es de utero *Job I. 21.*
matris tuæ. Numquid infulatus? num-
quid micans gemmis, aut floridus
sericis, aut coronatus pennis, aut suf-
farcinatus metallis? Si cuncta hæc,
veluti nubes quasdam matutinas, ve-
lociter transeuntes & cito pertransi-
turas, dissipēs, & exsuffles à facie con-
siderationis tuæ; occurreret tibi homo
nudus, & pauper, & miser, & mise-
rabilis; homo dolens quod homo sit,
erubescens quod nudus sit, plorans
quod natus sit, murmurans quod sit
homo natus ad laborem, non ad ho- *Job 5. 7.*
norem; homo natus de muliere, &
ob hoc cum reatu; brevi vivens tem- *Job 14. 1.*
pore, ideoque cum metu; repletus
multis miseriis, & propterea cum fletu.
Et vere multis, quia corporis & ani-
mæ simul. Quid enim calamitate va-
cat nascenti in peccato, fragili cor-
pore, & mente sterili? Vere ergo re-
pletus, cui infirmitas corporis, & fa-
tuitas cordis cumulatur traduce for-
dis, mortis addictione. Salubris co-

Humanæ
miseriæ
icon.

Magnati-
bus neces-
saria suæ
miseriæ co-
gitatio.

pula, ut cogitans te summum Ponti-
ficem, attendas pariter vilissimum ci-
nerem non fuisse, sed esse. Imitetur
cogitatio naturam; imitetur &, quod
dignius est, Auctorem naturæ, sum-
ma imaque consocians. Nonne natu-
ra in persona hominis vili limo vitæ
spiraculum colligavit? Nonne Auctor
naturæ in sui persona Verbum limum-
que contemperavit? Ita tibi sume for-
mam, tam de nostræ concretionem ori-
ginis, quàm de sacramento redem-
ptionis: ut altus sedens, non alta sa-
piens sis; sed humilia de te sentiens,
humilibusque consentiens.

C A P U T X.

*Tertium membrum considerationis sui,
nempe Qualis sit, exponit.*

Medium
ubique te-
nendum.

19. **P** Roinde si consideras quan-
tus es, cogita etiam qualis,
& maxime. Hæc te fane consideratio
tenet in te; nec à te avolare finit, non

ambulare in magnis, neque in mirabilibus super te. In te consistito. Non infra dejici, non attolli supra; non evadere in longius, non extendi in latius. Tene medium, si non vis perdere modum. Locus medius tutus est. Medium sedes modi, & modus virtus. Omnem extra modum mansionem

* sapiens exilium reputat. Propterea non est illi habitare in longo, quod ultra modum sit: sed ne in lato quidem, quod extra sit: porro nec in alto vel imo, quod alterum supra, alterum infra sit. Denique & longitudo exterminium habere solet, & dilatio scissuram, & altitudo ruinam, & profundum absorptionem. Dico hæc planius, ne me putes ea loqui quæ Apostolus comprehendere hortatur

* *al. habitationem.*

cum omnibus sanctis, longitudinem, latitudinem, sublimitatem, & profundum. quod alterius erit & disputationis, & temporis *. Nunc autem longum dico, cum sibi homo longiorem promittit vitam; latum, cum in

Ephes. 3.18.

* *infra lib.*

5. cap. 13.

14.

Longum, latum, profundum cavendum.

superfluas animus distenditur curas; altum, cum de se plus præsumit; profundum, cum se plus dejicit. Qui ergo longa sibi metitur tempora, nonne vere ingreditur iter exterminii, transiens vitæ terminos productioni sollicitudine? Inde est, quod homines in præsentia à sese exsules per oblivionem, in alia per inanem sollicitudinem migrant sæcula, non profutura, immo nec futura. Similiter animus distentus in multa, multis laceretur curis necesse est. Nempe immoderata extensio extenuationem, & extenuatio nimia scissionem facit. Jam vero alta præsumptio, quid nisi ruinosa præcipitatio est? Legisti namque, *Ante ruinam exaltatur cor*. Quid è regione nimiae pusillanimitatis dejectio, nisi desperata quædam absorptio est? In hanc fortis non dejicietur. Prudens longioris vitæ non abducetur incerto. Modestus moderabitur curas: temperabit à superfluis, non deerit necessariis. Porro justus altiora se non præsu-

Prov. 18.

12.

Virtutes
cardinales
huc neces-
sariæ.

met, sed loquetur cum justo: *Si justus fuero, non levabo caput.* Job 18. 15.

CAPUT XI.

Serium examen sui Pontifici serio commendat.

20. **T**U ergo in hac considera- Plus homo
sibi tribuit
duobus mo-
dis.
tione tui caute ambules, &
tota æquitate verferis, ut nec plus vero
tibi tribuas, nec plus justo parcas.
Porro plus vero tribuis, non modo
arrogando tibi quod non habes bo-
num, sed & quod habes adscribendo.
Vigilanter discerne, qualis ex te, &
qualis sis dono Dei, & non sit in spi-
ritu tuo dolus. Erit autem, nisi fideli-
ter partiens, tua tibi, & quæ sunt
Dei, Deo sine fraude resignes. Ex te
mala, bona à Domino esse, persua-
sum tibi non ambigo. Sane inter con-
siderandum qualis sis; etiam qualis
fueris, ad memoriam revocandum.
conferenda posteriora prioribus. Pro-

Quomodo
discernen-
dus pro-
fectus.

In zelo &
clementia
tria servan-
da.

fecerisne in virtute, in sapientia, in intellectu, in suavitate morum; an ab his forte (quod absit) defeceris. Patientior sis, an impatientior solito, iracundior leniorne, insolentior an humilior, affabilior an austerior, exorabilior an difficilior, pusillior animo an magnanimior, serius magis an plusculum dissolutus, timorator an forte fidentior quàm oportet. Quàm latus tibi patet campus in hoc genere considerandi! Memoro ego pauca, veluti quædam seminaria proferens; non tamen ipse ferens, sed dans semen ferenti. Oportet innotescat tibi zelus tuus, clementia tua, discretio quoque moderatrix earumdem virtutum; qualis videlicet in donandis injuriis, qualis sis in ulciscendis, quàm in utroque providus modi, loci, temporis observator. Prorsus considerata tria hæc in usu virtutum harum: ne non sint virtutes, si præter hæc reperiantur. nempe ejusmodi, non natura virtutes, sed usus facit. Nam ex se in-

differentes esse noscuntur. Tuum est, aut abutendo & confundendo facere vitia ; aut bene ordinateque utendo, virtutes. Solent discretionis oculo caligante alterutrum sibi præripere, loca, terminos occupare. Porro caliginis duæ sunt causæ, ira, & mollior affectus. Is iudicii censuram enervat, illa præcipitat. Quomodo ab altero non periclitetur, aut pietas clementiæ, aut zeli rectitudo ? Turbatus præ ira oculus clementer nil intuetur ; suffusus fluxa quadam & muliebri mollitie animi rectum non videt. Non eris innocens, si aut punias eum cui forte parcendum esset, aut parcas ei qui fuerat puniendus.

Caligo ex
ira & molli
affectu.

CAPUT XII.

Neque in prosperis animum nimis laxandum, neque in adversis deficiendum.

21. **I**N tribulationibus quoque qualem te inveneris, nolo dissi-

In adversis
suis & alie-
nis ut se
gerendum.

Difficile in
prosperis
servare mo-
dum.

Facilius in
adversis.

mules. Si constantem in tuis, condo-
lentem in alienis, gaude. Recti cor-
dis hoc; è regione perversissimi, si
cum in propriis deprehendaris for-
tasse impatiens, minime tamen in
alienis compatiens sentiaris. Quid in
prosperis? nihilne est quod confide-
rationem sollicitet? Est utique, si di-
ligenter attendas, quàm rarus semper
exstiterit, qui non vel modice in prof-
peritate animum relaxaverit à sui cu-
stodia & disciplina. Quando hæc in-
cautis non fuit ad disciplinam, quod
ignis ad ceram, quod solis radius ad
nivem vel glaciem? Sapiens David,
sapientior Salomon fuit: sed, blan-
dientibus nimis secundis rebus, alter
ex parte, alter ex toto desipuit. **M A-
G N U S**, qui incidens in adversa, non
excidit vel parum à sapientia: nec
minor, cui præsens felicitas si arrisit,
non irrisit. Quamquam facilius inve-
neris, qui sapientiam retinuerunt,
contraria sibi fortuna, quam qui pro-
pitia non perdiderunt. Præferendus

ille, & magnus * est, cui inter prospera saltem risus indecentior, aut sermo insolentior, aut immoderatio cura vestis vel corporis non irrepsit.

* al. magnis.

CAPUT XIII.

Ab otio & nugis, vanisque sermonibus Pontificem debortatur.

22. **E**T si recte Sapiens hortatur sapientiam scribi in otio, Eccli 38.25.
Otiositas
fugienda &
nugæ.
CAVENDUM & in otio otium est. Fugienda proinde otiositas, mater nugarum, noverca virtutum. Inter sæculares nugæ, nugæ sunt; in ore sacerdotis, blasphemix. Interdum tamen si incidant, ferendæ fortassis; referendæ numquam. Magis interveniendum caute & prudenter nugacitati. Prorumpendum sane in serium quid, quod non modo utiliter, sed libenter audiant, & supersedeant otiosis. Consecrasti os tuum Evangelio: talibus jam aperire illicitum, assuesce-

Malach. 2.
7.

Nec au-
diendæ.

re sacrilegum est. *Labia sacerdotis*, ait, *custodiunt scientiam*, & *legem requirunt de ore ejus*: non nugas profecto, vel fabulas. Verbum scurrile, quod facti urbanive nomine colorant, non sufficit peregrinari ab ore: procul & ab aure relegandum. Fœde ad cachinnos moveris, fœdius moves. Porro detrahere, aut detrahentem audire, quid horum damnabilius sit, non facile dixerim.

C A P U T X I V.

Personarum acceptionem in judiciis summopere vitandam.

Eugenius
ab avaritia
alienus.

23. **D**E avaritia non est quod tuum fatigem intuitum, cum pecuniam tamquam paleam dicaris habere. Non prorsus, non est quod pro illa timeatur à judiciis tuis. Sed est quod non minus sæpe, nec noxius minus infidiari judicantibus solet: de quo maxime, quid in tua lateat conscientia, latere te nolim. Quid illud

fit quæris? acceptio personarum. Non parvi te reum peccati existimes, si facies peccatorum fumis, & non potius causas dijudicas meritorum. Est item vitium, cuius si te immunem sentis, inter omnes quos novi ex his qui cathedras ascenderunt, sedebis me iudice solitarius: quia veraciter singulariterque levasti te supra te, juxta Prophetam. FACILITAS credulitatis hæc est, cuius callidissimæ vulpeculæ magnorum neminem comperi satis cavisse versutias. Inde eis ipsis pro nihilo iræ multæ, inde innocentium frequens addictio, inde præjudicia in absentes. Gratulor autem tibi (nec enim assentationis apud te vereor incurrere notam) gratulor, inquam, præsidere te usque adhuc absque horum omnium querela multa: an & sine culpa, tu videris. Nunc ad ea quæ sub te sunt, consideratio intendenda. At alterius principii hoc: siquidem tuis occupationibus sermo brevior competentior est.

Acceptio personarum Pontifici cavenda.

Thren. 3. 28.

Facilitas credendi, familiare vitium magnatibus.

LIBER III.

CAPUT I.

Pontificis esse, non tam ut omnes suo dominio subjiciat, sed ut omnes, quantum fieri potest, ad Ecclesiæ gremium perducatur.

Orbis totus
sub Ponti-
fice.

Mat. 16. 15.

I. **F**inis superioris libri huic principium ponit. Itaque juxta promissum illius considerata quæ sub te sunt. Quænam sint illa, non est quod à me quærendum putes, Sacerdotum optime Eugeni; rectius fortasse quæ non sint quæras. Orbe exeundum ei qui forte volet explorare quæ non ad tuam pertinent curam. Parentes tui destinati sunt, non aliquas regiones, sed ipsum debellaturi orbem. *Ite in orbem universum*, dictum est illis. Ipsi vero vendentes tunicas, emere gladios ignitum eloquium, & spiritum

spiritum vehementem, arma potentia Deo. Quo non pervenerunt victores inclyti, filii excussorum? Quo non sagittæ potentium acutæ cum carbonibus desolatoriis? & quidem in omnem terram exivit sonus eorum, & in fines orbis terræ verba eorum. Penetrabant & incendebant verba illa incensa igni, quem Dominus misit in terram. Occumbebant strenuissimi bellatores, sed non succumbebant: triumphabant & mortui. Nihilis confortatus est principatus eorum: constituti sunt principes super omnem terram. Eis tu successisti in hereditatem. Ita tu heres, & orbis hereditas. At quatenus hæc portio te contingit, aut contigerit illos, id sobria consideratione pensandum. Non enim per omnem reor modum, sed sane quodamtenus (ut mihi videtur) DISPENSATIO tibi super illum credita est, non data possessio. Si pergis usurpare & hanc, contradicit tibi qui dicit: *Meus est orbis terræ*,

Pf. 119. 4.

Pf. 18. 5.

Luc. 12. 49.

Pf. 138. 17.

Pf. 44. 17.
Apostolorum est heres.

Dispensatio ei competit, non possessio.

Pf. 49. 12.

Psalm. 103. 24. *Christo dominium triplici jure.* *Et plenitudo ejus.* Non tu ille, de quo Propheta : *Et erit omnis terra possessio ejus.* Christus hic est, qui possessionem sibi vindicat, & jure creationis, & merito redemptionis, & dono Patris. *Psalm. 2. 8.* Cui enim alteri dictum est, *Postula à me, & dabo tibi gentes hereditatem tuam, & possessionem tuam terminos terræ?* Possessionem & dominium cede huic: tu curam illius habe. Pars tua hæc: ultra ne extendas manum.

2. Quid, inquis? Non negas præesse, & dominari vetas? Plane sic. Quasi non bene præsit, qui præest in sollicitudine. Numquid non & villa villico, & parvus dominus subjectus est pædagogo? Nec tamen villæ ille, nec is sui domini dominus est. ITA & tu præsis ut provideas, ut consulas, ut procures, ut serves. Præsis ut profis; præsis ut fidelis servus & prudens, quem constituit Dominus super familiam suam. Ad quid? Ut des illis escam in tempore; hoc est, ut dispenses, non imperes. Hoc fac, & dominari ne

affectes hominum homo, ut non dominetur tui omnis iniustitia. At satis superque id intimatum supra, cum, quis sis, disputaretur. Addo tamen & hoc. nam **NULLUM** tibi venenum, nullum gladium plus formido, quàm libidinem dominandi. Certe ut multum tibi tribuas, si multum deceptus non es, nil te existimas plus accepisse à magnis Apostolis. Recordare nunc vocis illius: *Sapientibus & insipientibus debitor sum.* Et si non indebitam tibi ipsam censes, hoc quoque simul memento, debitoris molestum nomen servienti potius, quàm dominanti congruere. Servus in Evangelio audit: *Quantum debes domino meo?* Ergo si te agnoscis sapientibus & insipientibus, non dominatorem, sed debitorem; curandum summo-pere tibi, & tota vigilantia considerandum, quomodo & qui non sapiunt sapiant, & qui desipere resipiscant. At **NULLUM** genus insipientiæ infidelitate (ut sic loquar) in-

Dominandi libido maxime metuenda Pontifici.

Rom. I. 14.

Luc. 16. 5.

* *al.* Judæis
& Gentibus.

insipientius. Ergo & infidelibus debitor es, * Judæis, Græcis, & Gentibus.

Pontificis
cura in quo

3. INTEREST proinde tua, dare operam quam possis, ut increduli convertantur ad Fidem, conversi non avertantur, aversi revertantur: porro perversi ordinentur ad rectitudinem, subversi ad veritatem revo-centur: subverfores invictis rationibus convincantur, ut vel emendentur ipsi, si fieri potest; vel si non, perdant auctoritatem, facultatemque alios subvertendi. Non omnino & ab hoc insipientium genere pessimo tibi dissimulandum. Dico autem hæreticos, schismaticosque. nam hi sunt subversi, & subverfores; canes ad scissionem, vulpes ad fraudem. Erunt, inquam, hujusmodi maxime tuo studio aut corrigendi, ne pereant; aut ne perimant, coërcendi. Esto, de Judæis excusat te tempus: habent terminum suum qui præveniri * non poterit. Plenitudinem gentium præire oportet.

Circa hæreticos,
schismaticos & infideles.

* *al.* præteriri.

Sed de ipsis gentibus quid respondes? Immo quid tua consideratio responderet tibi percunctanti sic? Quid visum est patribus ponere metam Evangelio, verbum suspendere fidei, donec infidelitas durat? Qua ratione, putamus, substitit velociter currens sermo? *Psal. 147. 15.* quis primus inhibuit hunc salutarem cursum? Et illis causa forte, quam nescimus, aut necessitas potuit obstitisse.

4. Nobis quæ dissimulandi ratio est? Quæ fiducia, qua conscientia Christum non vel offerimus eis qui non habent? An veritatem Dei in iniustitia detinemus? Et quidem quandoque perveniat gentium plenitudo necesse est. Expectamus ut in eas incidat fides? Cui credere casu contigit?

Quomodo credent sine prædicante? Petrus ad Cornelium, Philippus ad Eunuchum missi sunt: & si exemplum recentius quærimus, Augustinus à beato Gregorio destinatus, formam fidei tradidit Anglis. Et de his tu ita

Rom. 10.

14.

Act. 8. 26.

Act. 10. 20.

Græcorum
schisma.

tecum. Ego addo & de pertinacia Græcorum, qui nobiscum sunt, & nobiscum non sunt; juncti fide, pace divisi. Quamquam & in fide ipsa claudicaverint à semitis rectis. Et item de hæresi, quæ clam pæne ubique serpit; apud aliquos sævit palam. Nam Parvulos Ecclesiæ passim & publice deglutire festinat. Quæris ubi sit hoc? Vestri*, qui terram Austri tam sæpe visitant, ecce hi sciunt, & possunt dicere tibi. Eunt & redeunt per medium illorum, aut transeunt secus: sed quid boni adhuc cum illis egerint, necdum audivimus. Et forsitan audissemus, nisi præ auro Hispaniæ, salus populi viluisset. Tuum est & plagæ huic remedium providere.

* *at. Viri.*

Virus Ecclesiæ est
quærere
quæ sua
sunt.

5. Sed est insipientia, quæ ipsam quoque jam propemodum stultam fecit sapientiam fidei. Quomodo & ipsam Catholicam pæne totam hoc virus infecit? Nam dum & in ipsa quique quæ nostra sunt quærimus, fit ut invicem invidentes, invicem

provocantes , exerceamur ad odia ,
animemur ad injurias , armemur ad
lites , cavillemur ad dolos , feramur
ad detractiones , prorumpamus ad
maledicta , opprimamur à fortioribus ,
opprimamus infirmiores. Quàm digne
& laudabiliter occupatur meditatio
cordis tui adversus tam pestilens infi-
pientiæ genus , quod corpus ipsum
Christi , quæ est multitudo creden-
tium , occupasse consideras ! O am-
bitio , ambientium crux ! quomodo
omnes torquens , omnibus places ?
Nil acerbius cruciat , nil molestius
inquietat ; nil tamen apud miseros
mortales celebrius negotiis ejus. An
non limina Apostolorum plus jam
ambitio , quàm devotio terit ? Annon
vocibus ejus vestrum tota die resultat
palatium ? Annon quæstibus ejus tota
legum , canonumque disciplina insu-
dat ? Annon spoliis ejus omnis Italica
inhiat inexplebili aviditate rapacitas ?
Quid ita , immo quid aliud tua ipsius
spiritualia studia non faltem intercêdit ,

Ambitio
crux.

Ambitio
plus quam
devotio A-
postolorum
limina te-
rit.

sed abscidit ? Quoties sancta ac fecunda tua abortiri otia fecit inquietum & inquietans malum ? Aliud est quod ab oppressis appellatur ad te , aliud autem quod ambitio in Ecclesia per te regnare molitur. Nec deesse illis, nec huic aliquatenus assentire oportet. Quàm vero inique fovetur illa , spernuntur illi ! utrisque tamen debitor es , illis ut erigas , istis ut reprimas.

C A P U T I I.

Quis modus in appellationibus ad Sedem apostolicam adhibendus sit.

6. **E**T quoniam incidit de appellationibus , prosequi aliquatenus non erit ab re. Magno in his & pio opus intuitu est ; ne quod magna fuit necessitate * provisum , male utendo reddatur inutile. Mihi videtur & in multam posse eas devenire perniciem , si non summo moderamine actitentur. Appellatur de toto mundo

* al. utilitate.

ad te. Id quidem in testimonium singularis primatus tui. At tu, si sapias, non primatu gaudebis, sed fructu. Apostolis dictum est: *In hoc nolite gaudere, quod spiritus subjiciuntur vobis.* Appellatur ad te, ut dixi: & utinam tam fructuose, quàm necessarie. Utinam cum oppressus clamat, sentiat oppressor; & non superbiat impius unde incenditur pauper. Quid tam decorum, ut ad invocationem tui nominis oppressi effugiant, versuti non refugiant? Quid è regione tam perversum, tam recti alienum, ut lætetur qui malum fecit; & qui tulit, inaniter fatigetur? Inhumanissime non moveris erga hominem, cui illatæ injuriæ cumulavere dolorem & labor itineris, & damna expensarum: sed nihilo minus ignavissime in illum non moveris, qui huic tot calamitatum partim auctor, partim exstitit causa. Evigila homo Dei, cum hæc contingunt: moveatur miseratio, moveatur & indignatio tua. Alteram læso, alte-

Appellatio
de toto
mundo ad
Pontif. te-
stimonium
primatus.

V. Bern.
ep. 237. &
238.
Luc. 10. 20.

Appellatio-
nes injustæ
ut corri-
gendæ.

teram lædenti debes. Consoletur ille
damnorum refarcitu suorum, satisfac-
tione injuriarum, sine calumniarum:
cum isto ita agatur, ut pœniteat fe-
cisse quod non timuit facere, & non
de pœnis innocentis rideat.

7. Arbitror idem debere pati illum,
qui sine causa forte appellavit. F O R-
M U L A M hanc justitiæ præfigit tibi
& divinæ incommutabilis ratio æqui-
tatis, &, ni fallor, ipsa appellationum
lex, ut illicite usurpata appellatio nec
profit appellanti, nec appellato ob-
sit. Ut quid enim frustra fatigatus
sit homo? Quàm plenum justitiæ, ut
sefe potius læserit qui voluit proxi-
mum? A P P E L L A S S E inique, ini-
quum est: inique & impune, iniqua-
rum appellationum fomes. I N I Q U A
autem omnis appellatio, ad quam ju-
stitiæ inopia non coëgit. Appellare,
non ut graves, sed si graveris, licet.
Appellandum à sententia. Ante sen-
tentiam improbe omnino, nisi ob
manifestum gravamen, præsumitur

appellatio. Qui igitur non gravatus appellat, liquet quia aut gravare intendit, aut tempus redimere. Non est autem suffugium appellatio, sed refugium. Quantos novimus appellasse pulsatos, quo interim liceret, quod numquam licet? Nonnullis etiam, quoad vixerunt, licuisse appellationis suffragio nefaria scimus, verbi gratia, incestum, adulterium. Quale est hoc, turpitudini patrocinari, quod vel maxime formidari à turpibus oportebat? Quousque murmur universæ terræ aut dissimulas, aut non advertis? Quousque dormitas? quousque non evigilat consideratio tua ad tantam appellationum confusionem atque abusum? Præter jus & fas, præter morem & ordinem fiunt. Non locus, non modus, non tempus non causa discernitur, aut persona. Præsumuntur leviter passim, plerumque & nequiter. Volentes malignari, nonne his potissimum terreri solebant? Nunc terrori ipsi ex his magis fiunt,

Quando-
nam appel-
latio licita.

Iniquorum
appellatio-
num mate-
ria.

atque id bonis. Antidotum verum
in venenum. Non mutatio dexteræ
Excelsi hæc.

8. Appellantur boni à malis, ut
non faciant bona: & supersedent à
voce tonitruui tui formidantes. Deni-
que appellantur Episcopi, ne illicita
audeant matrimonia solvere, vel pro-
hibere. Appellantur ne rapinas, ne
furta, ne sacrilegia, & quæ ejusmodi
sunt, punire ullatenus vel cohibere
præsumant. Appellantur, ne indignas
& infames personas à sacris officiis
beneficiisve repellere seu amovere
queant. Quod tu invenis remedium
morbo huic, ne quod repertum ad
remedium fuit, reperiatur ad mortem?
Zelatus est Dominus domum oratio-
nis factam speluncam latronum: tu
ejus minister dissimulas miserorum
refugium datum arma iniquitati?
Videas præripi passim partes oppresso-
rum, & prorumpere ad appellandum
non tam gravatos, quàm gravare
volentes. Quid hoc mysterii? Tuum

est considerare, non meum commentari istud. Et cur, inquis, male appellati non veniunt, ostensuri suam innocentiam, malitiam convicturi? Dico quod dicere ad hæc solent: Nolumus vexari frustra. In curia esse, qui proclivius faveant appellanti, foveant appellationes. Cessuris Romæ, domi cedere fatius.

9. Fateor me non omnino decredere his. Quem das mihi in tam crebris appellationibus quæ hodie fiunt, qui pro expensis itineris vel nummum restituerit illi, quem forte appellarit? Mirum vero si ita omnes & appellantes justī, & appellati rei vestro examine inventi sint. *Diligite*, inquit, *justitiam, qui judicatis terram*. Parum est justitiam tenere, nisi & diligas. Qui tenent, tenent; qui diligunt, zelantur. Amator justitiæ inquit justitiam, & prosequitur eam: porro omnem injustitiam persequitur. Nil tibi & illis, qui appellationes venationes putant. Pudet elogii, quod apud eth-

Sap. I. I.
Aliud tenere, aliud diligere justitiam.

* *al. novi-
n. us.*

nicos jam vertitur in parabolam: Duos movimus * cervos pingues. Ut mitius loquar, plus facetiæ quàm justitiæ hic. Tu si amas justitiam, appellationes non affectas, sed sustines. Verumtamen quid emolumentum affert ecclesiis Dei tua unius hominis justitia, ubi sententia prævalet aliter affectorum? At istud loci * illius erit, cum cœperint versari quæ circa te sunt.

* *lib. 4. de
confid. cap.
9.*

Appellatio-
nes non
usurpandæ.

io. Nunc vero non te existimes otiose vacare considerationi huic, qua appellationes ad legitimum, si fieri potest, revoces usum. Et si hinc mea quærat vel potius curetur sententia, dico appellationes ut non contemnendas, sic nec usurpandas omnino. Porro horum quid insolentius censeam, haud facile dixerim: nisi quod usurpatio quamdam videtur inducere contemptus necessitatem, ac per hoc forte acrius infectanda, quæ amplius nocet. Aut non vere nocentior est, mala in se, in partu pejor? Nonne ipsa est quæ ipsum jus quoque naturæ aut

extenuat, aut exterminat? Nam sæpe rebus etiam pretiosissimis pretii gratiam non modo demit, sed adimit. Quid Sacramentis acceptius? Usurpata tamen ab indignis, indigne tractata, minime acceptantur. Magis habent damnationem, quia debitam venerationem non habent. Fateor grande & generale mundo bonum esse appellationes: idque tam necessarium, quàm solem ipsum mortalibus. Revera quidam sol justitiæ est, prodens ac redarguens opera tenebrarum. Prorsus fovendæ & manutenendæ sunt: sed quas extorsit necessitas, non calliditas adinvenit. Usurpatoriæ sunt hujusmodi omnes, non subvenientes in necessitate, sed opulantes iniquitati. Quidni veniant in contemptum? Quanti ut talibus quoque deferrent, etiam de proprio cessere jure, ne longo & casto itinere fatigarentur? Plures tamen sua amittere non ferentes, appellationes minus opportunas, & celsa nomina im-

omallagga
Earum ne-
cessitas, &
utilitas.

hha la
-uig bit
9.11

portunius contempserunt.

Appellatio-
num abusus
exemplis
ostenditur.

* *al. add.*
Quid plu-
ra?

II. Dico aliquid quod ad rem per-
tinet, exempli causa. Quidam sibi
publice desponsaverat uxorem. Adest
dies celebris nuptiarum. Parata omnia,
invitati multi. Et ecce homo concu-
piscens uxorem proximi sui, in vocem
appellationis inopinatae prorumpit,
affirmans sibi traditam prius, suam
potius esse debere*. Stupet sponsus, hæ-
rent omnes: sacerdos non audet pro-
gredi, frustratur omnis ille apparatus;
descendit quisque in domum suam,
suam cœnam manducaturus: sponsa
à mensa & thalamo sponsi suspendi-
tur, quousque Roma reditum est.
Parisiis contigit hoc, nobili Gallia-
rum civitate, sede regia. Rursum in
civitate eadem quidam sibi despon-
sata uxore diem constituit nuptiarum.
Interim emergit calumnia, dicentibus
quibusdam non debere conjungi. Ad
judicium Ecclesiæ causa delata est:
sed non expectata sententia, appel-
latum est sine causa, sine gravamine,
solo

solo frustratoriae dilationis intuitu. At ille, sive perdere quæ pararat, sive dilectæ tamdiu frustrari consortio nolens, nihilo minus quod proposuerat, contempta sive dissimulata appellatione peregit. Quid illud quod in Autifiodorense ecclesia nuper à quodam adolescente præsumptum est? Nempe defuncto sancto Episcopo, volentibus clericis alium, ut moris est, eligere sibi; intervenit ille appellans, & vetans ne fieret, quousque isset & redisset ab Urbe. cui tamen appellationi nec ipse detulit. Nam cum videret se contemni, tamquam qui irrationabiliter appellasset; accitis quos potuit sibi, tertia die post factam ab aliis electionem, fecit suam.

12. Cum itaque ex his & innumeris talibus liqueat, non ex contemptu gigni usurpationem, sed ex usurpatione contemptum: videris tu, quid sibi velit, quod zelus vester assidue pæne vindicat illum, istam dissimulat. Vis perfectius coërcere contemptum?

Appellationum contemptus ut coërcendus.

Cura in ipso utero pessimæ matris præ-
focari germen nequam. quod ita fiet,
si usurpatio digna animadversione
mulctetur. Tolle usurpationem, &
contemptus excusationem non habet.
Porro inexcusabilitas ausum explodet.
Non sit proinde usurpator, & con-
temptor nullus erit, aut admodum ra-
rus. Bene facis tu, quod appellationum
negato suffragio, immo suffugio, multa
remittis negotia ad cognoscentes, vel
qui noscere citius possunt. Ubi enim
certior ac facilior notio, ibi decisio tu-
tior, expeditiorque esse potest. Quàm
plenum gratiæ, quàm multorum perin-
de per hoc & laboribus parcis, & sump-
tibus! At quibus sic credas, id tibi
omnimodis attendendum. Poteram
multa de eodem utiliter addere his:
sed memor propositi mei, contentus
interim occasionem dedisse, ad alia
transeo.



CAPUT III.

Præsules Ecclesiae non tam ut praesint, ac semetipsos pascant, quam ut aliis prosint, constitutos esse.

13. **E**T primum quod occurrit, Pontifici & principi subditorum commodum quaerendum, non proprium. minime transeundum reor. Præes, & singulariter. Ad quid? eget, tibi dico, consideratione. Numquid ut de subditis crescas? Nequaquam, sed ut ipsi de te. Principem te constituerunt, sed sibi, non tibi. Alioquin quo pacto te reputas superiorem his, à quibus beneficium mendicas? Audi Dominum: *Qui potestatem habent super eos, benefici vocantur.* ^{Luc. 22. 25.} At istud de his qui foris sunt. Quid ad nos? Tu id mendaciter diceris, si non tam beneficus esse, quam beneficiis praesse intendas. Parvi, dejectique animi est, de subditis non profectum quaerere subditorum, sed quaestum proprium. In summo praesertim omnium nihil

2. Cor. 12.
14.

Phil. 4. 17.

* lib. 2. cap.
4.

* al. pau-
perioribus.

* al. deti-
nuisse.

* al. refu-
git.

turpius. Quàm pulcre Magister gen-
tium parentes filiis, non filios debere
censuit thesaurizare parentibus. Non
mediocris gloriæ vox illa identidem
ipsius: *Non requiro datum, sed fructum.*
At jam transeamus & hinc, ne quis
moram in his meam, avaritiæ in te no-
tam interpretetur: quæ quàm longe
à te sit, libro superiori* testatus sum,
sciens quanta, & in quanta tua neces-
sitate respueris. Ad te proinde scrip-
serim ista, non propter te. Nempe
quod tibi scribitur, soli prodesse non
decet. Hic locus avaritiam carpit, a
quo vitio immunis satis tua opinio
est; an & opus, tu videris. Vidimus
tamen (ut oblata à pauperibus* ta-
ceam, quæ tangere non acquiescis)
Germanicos detumuisse* saccos, sed
pretio, non massa. Argentum repu-
tatum est fœnum. Summarii non le-
vatis farcinis, onusti nihilo minus re-
patriant vel inviti. Nova res! Quando
hactenus aurum Roma refudit*? Et
nunc Romanorum consilio id usur-

patum non credimus. Duo venerunt, ambo locupletes, & ambo rei. Siquidem unus Moguntinus, Coloniensis alter: alteri gratia gratis reddita est; alter, indignus credo cui gratia redderetur, audivit: Cum quali veste intrasti, cum tali egredieris. O vocem magnificam! vocem prorsus apostolicæ libertatis! Quid minus ab illa hæc habuit, *Pecunia tua tecum sit in perditionem*? Nisi quod in illa plus zeli, in ista plus modestiæ sonuit. Quid ille de transmarinis partibus pæne à finibus terræ, terra & mari currens pro episcopatu, suis & alienis facultatibus rursus emendo? Jam enim emerat prius. Tulit multa, sed retulit, non omnia tamen. Incidit miser in manus alias, accipere quàm dare potentiores*. Bene fecisti, tuas in utroque servans innoxias, nec imponere scilicet ambitioso, nec supponere iniquo mammonæ acquiescens. Non sic à paupere Episcopo continuisti, dans quod daret, ne immunificus notare-

Act. 8. 20.
Eugenium
laudat à fuga avaritiæ.

* *al. promptiores.*

tur : accepit clam , quod palam dedit.
 Sic de tuo facculo consultum est ve-
 recundiæ viri : sic quoque curiæ mo-
 rem gerens , tuo beneficio invidiam
 declinavit eorum , qui diligunt munera.
 Non potes abscondere : & factum no-
 vimus , & personam. Audire gravat ?
 Et ego eo libentius prædico , quo
 tu id molestius audis. si tibi sic expe-
 dit , & mihi sic. Tam non oportet
 Christi gloriam me filere , quàm nec
 te quærere tuam. Et si pergis murmu-
 rare adhuc , respondebitur tibi ex
 Marc. 7. 36. Evangelio : *Quanto eis præcipiebat ,*
tanto magis plus prædicabant , dicentes :
Bene omnia fecit.



C A P U T I V.

Gradus Ordinum ac dignitatum, quæ in Ecclesia sunt, non temere confundendos ac perturbandos. Hinc abusum querendi Privilegia ac Exemptiones perstringit.

14. **A** Udi aliud, si tamen aliud. Ad idem enim fortassis pertinere quis dicat. Tua consideratio viderit hoc. Mihi videtur non longe à vero dissentire, qui id forte inter avaritiæ species locandum putaverit. Ego vero illius aut speciem esse, aut speciem habere non negaverim. SANE interest tuæ perfectionis, & malas res, & malas pariter species devitare. In altero conscientiæ, in altero famæ consulis. Puta tibi non licere (etsi alias fortasse liceat) quicquid male fuerit coloratum. Denique interroga majores tuos, & dicent tibi : *Ab omni specie mala abstinete vos.* Sane minister

Pontifici
conscientiæ
& famæ
consulendum.

1. Thess. 5.
22.

Johan. 12. 26. Domini Dominum imitetur, quia ipse ait: *Qui mihi ministrat, me sequatur.* Et

Psal. 92. 1. habes de illo: *Dominus regnavit, decorem induit, induit Dominus fortitudi-*

nem. Tu quoque esto fortis in fide,

decorus in gloria; & probasti te imi-

tatorem Dei. FORTITUDO tua, fi-

ducia fidelis conscientiae: decor tuus,

splendor bonae opinionis. Ita quaeso,

induere fortitudinem; etenim gau-

dium Domini fortitudo tua. Porro spe-

cie tua & pulcritudine tua nihilo mi-

nus tamquam propria similitudine de-

lectatur. Induere vestimentis gloriae

tuae, vestire duplicibus, quibus dome-

Prov. 31. 2. sticos suos fortis illa mulier induere

confuevit. Non sit in conscientia nu-

tans infirmitas modicae fidei, non sit

in fama naevus malae speciei; & ve-

stieris duplicibus: & gaudebit spon-

sus super sponsam animam tuam, &

gaudebit super te Deus tuus. Miraris

quorsum haec, ignarus usque adhuc

quid dicere velim. Non te tollo diu-

tius. Murmur loquor & querimoniam

Exemptio-
nes nimias
improbat.

ecclesiarum. Truncari se clamitant ac demembrari. Vel nullæ, vel paucæ admodum sunt, quæ plagam istam aut non doleant, aut non timeant. Quæris quam? Subtrahuntur Abbates Episcopis, Episcopi Archiepiscopis, Archiepiscopi Patriarchis five Primatibus. Bonane species hæc? Mirum si excusari queat vel opus. Sic factitando probatis vos habere plenitudinem potestatis, sed justitiæ forte non ita. Facitis hoc, quia potestis: sed utrum & debeatis, quæstio est. Honorum ac dignitatum gradus, & ordines quibusque suos servare positi estis, non invidere, ut quidam vestrorum ait: *Cui honorem, honorem.*

Rom. 13. 7.

15. Spiritualis homo ille, qui omne dijudicat, ut ipse à nemine judicetur, omne opus suum trina quadam consideratione præveniet. Primum quidem an liceat, deinde an deceat, postremo an & expediat. Nam etsi constet in Christiana utique philosophia non decere nisi quod licet, non

1. Cor. 2.

15.

Triplici
considera-
tione opus
omne præ-
veniendum.

Indecens
Pontifici,
ex potesta-
te, non ra-
tione agere.

expedire nisi quod decet & licet: non continuo tamen omne quod licet, decere aut expedire consequens erit. Age, aptemus, si possumus, tria ipsa operi huic. At quomodo non indecens tibi voluntate pro lege uti; & quia non est ad quem appelleris, potestatem exercere, negligere rationem? Tunc major Domino tuo? qui *Johan. 6. 38.* ait: *Non veni facere voluntatem meam.*

Quamquam NON MINUS dejecti, quàm elati animi est, veluti rationis expertem, non pro ratione, sed pro libitu agere; nec judicio agi, sed appetitu. Quid tam bestiale? Et si indignum cuivis utenti ratione vivere ut pecus, quis in te rectore omnium tantam contumeliam naturæ, honoris injuriam ferat? Sic degenerando (quod absit) generale opprobrium fecisti proprium tibi: *Ps. 48. 13.* *Homo cum in honore esset, non intellexit; comparatus est jumentis insipientibus, & similis factus est illis.* Quid item tam indignum tibi, quàm ut totum tenens, non sis con-

tentus toto, nisi minutias quasdam, atque exiguas portiones ipsius tibi creditæ universitatis, tamquam non sint tuæ, satagas nescio quomodo adhuc facere tuas? Ubi etiam meminisse te volo parabolæ Nathan de homine, qui multas oves habens, unam quæ erat pauperis concupivit. Huc quoque veniat factum, immo facinus regis Achab, qui rerum summam tenebat, & unam vineam affectavit. Avertat Deus à te quod ille audivit: *Occidisti, & possedisti.*

2. Reg. 12.

1.

3. Reg. 21.

2.

Ibid. 19.

16. Nolo autem prætendas mihi fructum emancipationis ipsius. Nullus est enim, nisi quod inde Episcopi insolentiores, monachi etiam dissolutiores fiunt. Quid quod & pauperiores? Inspice diligentius talium ubique libertorum & facultates, & vitas, si non pudenda admodum & tenuitas in his, & in illis sæcularitas invenitur. Matris noxiæ libertatis gemina soboles hæc. Quidni peccet licentius vagum & male liberum vulgus, cum

Exemptionum qualis effectus.

Ezech. 3. 18.

* al. mur-
murat.Scandala
inde quan-
ta.

non sit qui arguat? Quidni licentius quoque spoliatur ac deprædetur inermis religio, cum non sit qui defendat? Quo enim refugium illis? Numquid ad Episcopos dolentes injuriam? Ridentibus profecto aspiciunt oculis, siue quæ faciunt mala, siue quæ patiuntur. Quæ demum utilitas in sanguine isto? Vereor ne illa, quam in Propheta comminatus est Deus: *Ille, inquiens, in iniquitate sua morietur, sanguinem autem ejus de manu tua requiram*. Si enim & extollitur qui subtrahitur, & qui subtrahitur uritur*; qui subtrahit, quomodo innocens? Parum est: involvimus ignem: audi apertius. Si is qui murmurat, secundum animam mortuus est: qui instigat, quomodo vivit? Quomodo vero non reus mortis amborum, & suæ pariter, qui gladium dedit, unde ambo morerentur? Hoc est quod dixeram: *Occidisti, & possedisti*. Adde quod qui audiunt, scandalizantur, indignantur, detrahunt, & blasphemant, hoc est vul-

nerantur ad mortem. Non est bona arbor faciens fructus tales, insolentias, dissolutiones, dilapidationes, similitates, scandala, odia; quodque magis dolendum, inter ecclesias inimicitias graves, perpetesque discordias. Vides quam verus sit sermo ille: *Omnia mihi licent, sed non omnia expediunt.* Quid si forte nec licet? Ignosce mihi: non facile adducor licitum consentire, quod tot illicita parturit.

I. Cor. 10. 22.

17. Tune denique tibi licitum censeas, suis ecclesias mutilare membris, confundere ordinem, perturbare terminos, quos posuerunt patres tui? Si iustitiæ est jus cuique servare suum; auferre cuiquam sua, iusto quomodo poterit convenire? Erras, si ut summam, ita & solam institutam à Deo vestram apostolicam potestatem existimas. Si hoc sentis, dissentis ab eo qui ait: *Non est potestas nisi à Deo.* Proinde quod sequitur, *Qui potestati resistit, Dei ordinationi resistit:* etsi principaliter pro te facit, non tamen

Potestas Apostolica, non sola à Deo instituta.

Rom. 13. 1.

*Ibidem.*Matth. 19.
6.Alias non
debet spo-
liare.1. Cor. 12.
28.Ephes. 4.
16.

singulariter. Denique idem ait : *Omnis anima potestatibus sublimioribus subdita sit.* Non ait sublimiori , tamquam in uno ; sed sublimioribus , tamquam in multis. Non ergo tua sola potestas à Domino ; sunt & mediocres , sunt & inferiores. Et quomodo quos Deus conjunxit , non sunt separandi : sic nec quos subjunxit , comparandi. Monstrum facis , si manui submovens digitum , facis pendere de capite , superiorem manui , brachio collateralem. Tale est si in Christi corpore membra aliter locas quàm disposuit ipse. Nisi tu putas alium esse , qui posuit in Ecclesia *quosdam quidem Apostolos , quosdam autem Prophetas , alios vero Evangelistas , alios doctores & pastores , ad consummationem sanctorum , in opus ministerii , in edificationem corporis Christi.* Atque hoc corpus , quod tibi ipse Paulus suo vere apostolico figurans eloquio , & capiti convenientissime aptans , *totum ex eo compactum perhibet , & connexum per om-*

nem juncturam subministrationis, secundum operationem in mensuram uniuscujusque membri, augmentum corporis faciens in ædificationem sui, in caritate.

Nec vilem reputes formam hanc, quia in terris est: exemplar habet è cælo. Neque enim Filius potest facere quicquam, nisi quæ viderit Patrem facientem, præsertim cum ei sub Moyse nomine dictum sit: *Vide omnia facias secundum exemplar, quod tibi in monte monstratum est.*

*Johan. 5.
19.*

*Exod. 25.
40.*

18. Viderat hoc qui dicebat: *Vidi civitatem sanctam jerusalem, novam descendentem de cælo, à Deo paratam.* Ego enim propter similitudinem dictum reor, quod sicut illic Seraphim & Cherubim, ac ceteri quique usque ad Angelos & Archangelos, ordinantur sub uno capite Deo; ita hic quoque sub uno summo Pontifice Prælates vel Patriarchæ, Archiepiscopi, Episcopi, Presbyteri, vel Abbates, & reliqui in hunc modum. Non est parvi pendendum, quod & Deum habet

*Apoc. 21.2.
Hierarchiæ
subordina-
tio.*

auctorem, & de cælo ducit originem. Quod si dicat Episcopus, Nolo esse sub Archiepiscopo; aut Abbas, Nolo obedire Episcopo: hoc de cælo non est. Nisi tu forte Angelorum quempiam dicentem audisti, Nolo sub Archangelis esse: aut ex alio quolibet inferiorum ordinum aliquem non ferentem subesse cuiquam, nisi Deo. Quid? inquis: prohibes dispensare? Non, sed dissipare. Non sum tam rudis, ut ignorem positos vos dispensatores, sed in ædificationem, non in destructionem. Denique quæritur inter dispensatores, ut fidelis quis inveniat. Ubi necessitas urget, excusabilis dispensatio est: ubi utilitas provocat, dispensatio laudabilis est. Utilitas, dico, communis, non propria. Nam cum nil horum est, non plane fidelis dispensatio, sed crudelis dissipatio est. Nonnulla tamen monasteria, sita in diversis episcopatibus, quod specialius pertinuerint ab ipsa sui fundatione ad Sedem apostolicam

1. Cor. 13.
10.

1. Cor. 4. 2.

Dispensationes quatenus licitæ.

licam pro voluntate fundatorum, quis
nesciat? Sed aliud est quod largitur
devotio, aliud quod molitur ambitio
impatiens subjectionis. Et hæc dicta
de his.

Exemptio-
nes quæ
probandæ.

C A P U T V.

*Summo Pontifici incumbere curam de
apostolicis decretis, & majorum insti-
tutis per totum orbem servandis.*

19. **S**uperest ut generaliter super
universum Ecclesiæ statum in-
tendat consideratio tua: si plebes cleri-
cis, si clerici sacerdotibus, si sacerdotes
Deo in ea, qua oportet, humilitate
subjecti sint; si in monasteriis & reli-
giosis locis servetur ordo, vigilet disci-
plina; si super prava opera & dogmata
censura ecclesiastica vigeat; si floreant
vineæ honestate & sanctimonia sacer-
dotum; si flores fructus parturiant
obedientiam * fidelium populorum;
si demum vestra ipsorum apostolica

Pontificis
materia
curæ.

* al. obe-
dientia.

mandata & instituta ea, qua dignum est, sollicitudine observentur, ne quid in agro Domini tui aut neglectu incultum, aut fraude subreptum inveniat. Posse inveniri ne dubites. Mihi in promptu est (ut multa & innumera prætermittam, quæ passim neglecta jacent) nonnulla etiam ex his quæ plantavit dextera tua, convulsa monstrare. Nonne os tuum in Remensi Concilio * subjecta capitula promulgavit ? Quis ea tenet ? Quis tenuit ? Falleris si teneri putas. Si non putas, ipse peccasti, aut statuens quæ non tenerentur, aut quod non tenentur dissimulans. Præcipimus, aisti *, ut tam Episcopi, quàm Clerici, neque in superfluitate, seu inhonesta varietate colorum, aut fiffura vestium, neque in tonsura, intuituentium (quorum forma & exemplum esse debent) offendant aspectum ; sed potius ita in suis actibus errata condemnent, & amorem innocentiae conversatione demonstrent,

Concilii
Remensis
decreta ne-
gligi que-
ritur.

* an. 1148.

* Can. 2.

sicut dignitas exigit ordinis clerico-
rum. Quod si moniti ab Episcopis
suis intra quadraginta dies non ob-
temperaverint, ecclesiasticis benefi-
ciis eorundem Pontificum auctoritate
priventur. Episcopi vero, si præfixam *
pœnam irrogare neglexerint, quia
inferiorum culpæ ad nullos magis re-
ferendæ sunt quàm ad desides negli-
gentesque rectores; tamdiu ab offi-
cio pontificali abstineant, donec pœ-
nam à nobis constitutam clericis sibi
subjectis imponant. * Illud etiam du-
ximus annectendum, ut nullus in
Archidiaconum vel Decanum, nisi
Diaconus & presbyter ordinetur. Ar-
chidiaconi vero, Decani, & Præpo-
siti, qui infra Ordines prænominatos
sunt, si inobedientes ordinari con-
tempserint, honore suscepto priventur.
Prohibemus autem ne adolescentibus,
vel infra sacros Ordines constitutis,
sed qui prudentia & vitæ merito cla-
rescunt, prædicti concedantur ho-
nores.

* al. præ-
fatam.

* Can. 94

Impunita-
tis & incuri-
æ mala.

20. Verba tua hæc : tu sanxisti. Quid effectui mancipatum ? Adhuc adolescentes , adhuc qui infra sacros Ordines sunt , in Ecclesia promoventur. Quod ad primum capitulum pertinet ; luxus vestium interdictus , sed non restrictus ; pœna dictata , sed minime secuta est. Jam quartus annus est , ex quo datum mandatum audivimus ; & neminem adhuc clericorum privatum beneficio , neminem Episcoporum suspensum ab officio luximus. At luctu amarissimo dignum quod secutum est. Quod hoc ? Impunitas incuriæ soboles , insolentiæ mater , radix impudentiæ , transgressionum nutrix. Et beatus , si omni satagas cura malorum omnium primam parentem cavere incuriam. Sed ad hoc tu operam dabis. Et nunc leva oculos tuos , & vide si non æque , ut prius , pellicula discolor sacrum Ordinem decolorat ; si non æque , ut prius , fissura enormis pæne inguina nudat. Solent dicere ; Num de vestibus cura est Deo & non magis

de moribus ? At forma hæc vestium, deformitatis mentium & morum indicium est. Quid sibi vult quod clerici aliud esse, aliud videri volunt ? Id quidem minus castum, minusque sincerum. Nempe habitu milites, quæstu clericos, actu neutrum exhibent. Nam neque pugnant ut milites, neque ut clerici evangelizant. Cujus ordinis sunt ? Cum utriusque esse cupiunt, utrumque deserunt, utrumque confundunt. *Unusquisque*, inquit, *in suo ordine resurget*. Isti in quo ? An qui sine ordine peccaverunt, sine ordine peribunt ? Aut, si summe sapiens Deus veraciter creditur à summo usque deorsum nihil inordinatum relinqueret ; vereor istos non alibi ordinandos, quàm ubi nullus ordo, sed sempiternus horror inhabitat. O miserandam sponsam, talibus creditam paranymphis ! qui assignata cultui ejus, proprio retinere quæstui non verentur. Non amici profecto sponsi, sed æmuli sunt. Et de his satis quæ sub te sunt,

Clericorum vestes & vicia notat.

I. Cor. 15.
23.

etsi non ad materiæ copiam, quæ est multa nimis; certe ad id quod proposui ego. Visenda jam quæ circa te sunt, sed ad ea ostium nobis quartus liber aperiet.

LIBER IV.

CAPUT I.

I. **S**I mihi plenius innotuisset, samantissime Eugeni, priora qualiter acceptâris; secundum hoc vel fidentius in reliquum processissem, vel cautius; aut certe substitissem omnino. Nunc vero quia ob locorum distantiam id minime datur, non mireris si prodit exilior sermo anceps, verecunde, fateor, ad medium veniens. Primis itaque considerationis partibus libris prioribus pertractatis, in manibus est de his addere, quæ circa te sunt. Et ipsa quidem sub te, sed quo propiora, eo importuniora

tibi. Nempe coram posita incuriam non admittunt, non dissimulationem, non oblivionem. Vehementius urgent, turbulentius irruunt: verendum ne obruant. Circa ejusmodi quàm sobria & intenta consideratione opus sit, proprio te experimento edoctum satis non ambigo. Alioquin, si non cauta opportunaque interveniat consideratio, occupatio continuabitur, & vexationis non erit modus, & sollicitudinis non erit finis. Non tempus vacuum, non liberum cor: plus laboris, & minus utilitatis. Dico autem, instantia illa tua quotidiana, ab urbe, à curia, à domestica ecclesia tua. Hæc, inquam, circa te sunt, clerus & populus tuus, cui specialiter episcoparis, ac per hoc specialis curæ teneris debitor. Hi quoque qui tibi quotidie assistunt seniores populi, orbis iudices; & qui item de domo & mensa tua sunt, capellani, cubicularii, ministri quique diversis deputati officiis in obsequium tui. Hi te fami-

Propinqua
& vicina
quàm caute
regenda.

Quænam
illa sint.

liarius visitant, frequentius pulsant,
molestiusque sollicitant. Hi sunt qui
non verentur suscitare dilectam, &
antequam ipsa velit.

C A P U T I I.

Vide Baron.
an. 1144.
n. 3. &
1145. n. 3.
& 7. & an.
1152. n. 1.2.

De cleri & populi Romani moribus agit,
& de veterum Pastorum cura
ac vigilantia.

Clericos
familiares
pontificis
quales esse
oporteat.

2. **E**T primo quidem Clerum il-
lum ordinatissimum esse de-
cet, ex quo præcipue in omnem Ec-
clesiam Cleri forma processit. Deinde
omne quod perperam agitur te præ-
sente, id tibi turpius. Interest gloriæ,
sanctitatis tuæ, ut quos præ oculis ha-
bes, ita ordinati, ita sint informati,
quatenus totius honestatis & ordinis
ipsi speculum, ipsi sint forma. Inve-
niantur præ ceteris oportet expediti
ad officia, idonei ad Sacramenta, ad
plebes erudiendas solliciti, circum-
specti ad sese custodiendos in omni

castitate. Quid de populo loquar? Populus Romanus est. Nec brevius potui, nec expressius tamen aperire de tuis parochianis quod sentio. Quid tam notum sæculis, quàm protervia & fastus * Romanorum? Gens infueta paci, tumultui assueta; gens immitis & intractabilis usque adhuc, subdi nescia, nisi cum non valet resistere. En plaga: tibi incumbit cura hæc, dissimulare non licet. Rides me forsitan, fore incurabilem persuasus. Noli diffidere: C U R A M exigeris, non curationem. Denique audisti, *Curam illius habe*; & non, Cura, vel sana illud. Verum dixit quidam:

Romani
populi mo-
res.

* al. cervi-
cositas.

A pastori-
bus cura
requiritur,
non cura-
tio.

Luc. 10.35.

*Non est in medico semper relevetur ut
ager.*

Ovid. 1. de
Ponto eleg.
10.

At melius propone de tuis tibi. Paulus loquitur: *Plus omnibus laboravi*. Non ait, Plus omnibus profui, aut plus omnibus fructificavi, verbum insolens religiosissime vitans. Alias autem noverat homo quem docuit Deus, quia unusquisque secundum suum la-

1. Cor. 15.
10.

borem accipiet, non secundum pro-
1. Cor. 3. 8. ventum. Et ob hoc in laboribus po-
 tius quàm in profectibus gloriandum
 putavit, sicut alibi quoque habes ip-
2. Cor. 11. 23. sum dicentem : *In laboribus plurimis.*
 Ita quæso fac tu quod tuum est : nam
 Deus quod suum est satis absque tua
 sollicitudine & anxietate curabit. Plan-
 ta, riga, fer curam ; & tuas expli-
 cuisti * partes. Sane incrementum,
 ubi voluerit, dabit Deus, non tu. Ubi
 forte noluerit, tibi deperit nihil, di-
Sap. 10. 17. cente Scriptura : *Reddet Deus mercedem*
laborum sanctorum suorum. Securus la-
 bor, quem nullus valet evacuare de-
 fectus. Et hoc dixerim absque præju-
 dicio divinæ potentiae & bonitatis. Scio
 induratum cor populi hujus : sed po-
 tens est Deus de lapidibus istis susci-
Joël. 4. tare filios Abraham. Quis scit si rever-
 tatur & ignoscat, convertat & sanet
 eos ? Sed non est propositi mei dictare
 Deo quid facere debeat : tibi utinam
 possim, quæ oportet & prout oportet,
 suadere.

* *al. explen-*
visti.

3. At locus dubius, & scrupulosa incidit disputatio. Nam ubi adoriar dicere quod sentio? Video satis quid imminet. Clamabitur infuetum: nam justum negari non poterit. Ego vero ne infuetum quidem assenserim. Nempe assuetum fuisse scio, ac per hoc in dissuetum potuisse venire: sed non redire in infuetum. An vero assuetum quis neget, quod constat non modo aliquando factum, sed aliquamdiu factitatum? Quid illud sit dicam, & non proderit. Cur? Quia non placebit satrapis, plus majestati quàm veritati faventibus. Fuerunt ante te qui se totos ovibus pascendis exponerent, pastoris opere & nomine gloriantes, nihil sibi reputantes indignum, nisi quod saluti ovium obviare putarent; non quærentes quæ sua sunt, sed impendentes. Impendêre curam, impendêre substantiam, impendêre & seipso. Unde unus illorum: *Et ego, ait, superimpendar pro animabus vestris. Et tamquam dicerent, Non venimus mi-*

Consuetudo frustra abusus & vitiis ob- tenditur.

v. sup. lib. I. cap. 9.

Quales olim pastores habuerit Ecclesia.

2. Cor. 12.

15.

nistrari , sed ministrare ; ponebant ; quoties oportuisset , sine sumptu Evangelium. U N U S erat de subditis quæstus , una pompa , unaque voluptas , si quo modo eos possent parare Domino plebem perfectam. Id omnimodis satagebant , etiam in multa contritione cordis & corporis , in labore & ærumna , in fame & siti , in frigore & nuditate.

Romano-
rum cupi-
ditas.

4. Ubi nunc , quæso , consuetudo hæc ? Subiit dissimilis valde ; longe in aliud mutata sunt studia , & utinam non in pejus. Cura tamen & anxietas , & æmulatio , & sollicitudo , fateor , perseverant. Translata hæc , non imminuta. Testimonium vobis perhibeo , quod nec substantiæ parcitis , non magis quàm ante. Diversa autem locatio dissimilitudinem facit. Magna abusio ! pauci ad os legislatoris , ad manus omnes respiciunt. Non immerito tamen. Omne papale negotium illæ * agunt. Quem dabis mihi de tota maxima urbe , qui te in Papam

* *al.* illi.

receperit , pretio seu spe pretii non interveniente ? Et tunc potissimum volunt dominari , cum professi fuerint servitutem. Fideles se spondent , ut opportunius fidentibus noceant. Ex hoc non erit consilium tibi à quo se arcendos putent , non secretum quo se non ingerant. Si stante pro foribus quoquam illorum , moram vel modicam fecerit ostiarius ; ego tunc pro illo esse nolo *. Et nunc experire paucis , noverimne & ego vel aliquatenus mores gentis. Ante omnia sapientes sunt ut faciant mala , bonum autem facere nesciunt. Hi invisi terræ & cælo , utrique injecere manus ; impii in Deum , temerarii in sancta ; seditiosi in invicem , æmuli in vicinos , inhumani in extraneos : quos neminem amantes amat nemo ; & cum timeri affectant ab omnibus , omnes timeant necesse est. Hi sunt qui subesse non sustinent , præesse non norunt ; superioribus infideles , inferioribus importabiles. Hi inverecundi ad pe-

Alii mores.

* Sic mss.
al. noluerim.

tendum, ad negandum frontosi. Hi importuni ut accipiant, inquieti donec accipiant, ingrati ubi acceperint. Docuerunt linguam suam grandia loqui, cum operentur exigua. Largissimi promissores, & parcissimi exhibitores: blandissimi adultores, & mordacissimi detractores: simplicissimi dissimulatores, & malignissimi proditores. Excurrimus usque huc, plenius te atque expressius admonendum putantes horum, quæ circa te sunt in hac parte.

Divitum
acceptio
præ pauperibus.
* *al. emunt.*

5. Jam ad ordinem recurramus.

Quale est, quod de spoliis ecclesiarum emuntur*, qui dicunt tibi, Euge, euge? Pauperum vita in plateis divitum seminatur. Argentum micat in luto: accurritur undique: tollit illud non pauperior, sed fortior, aut qui forte citius præcucurrit. A te tamen mos iste, vel potius mors ista non cœpit; in te utinam desinat. Sed reliqua prosequamur. Inter hæc tu pastor procedis deauratus, tam multa cir-

Pompæ ac
dignitatis
cura major
quàm sanctitatis.

cundatus varietate. Oves quid capiunt? Si auderem dicere; dæmonum magis, quàm ovium pascua hæc. Scilicet sic factitabat Petrus, sic Paulus ludebat? **V I D E** s omnem ecclesiasticum zelum fervere sola pro dignitate tuenda. **H O N O R I** totum datur, sanctitati nihil, aut parum. Si causa requirente paulo submissius agere, ac socialius te habere tentaveris; Absit, inquiunt, non decet, tempori non congruit, majestati non convenit; quam geras personam attendito. De placito Dei ultima mentio est; pro jactura salutis nulla cunctatio. nisi quod sublime est, hoc salutare ducamus: & quod gloriam redolet, id justum. Ita **O M N E** humile probro ducitur inter palatinos, ut facilius qui esse, quam qui apparere humilis velit, invenias. Timor Domini simplicitas reputatur, ne dicam fatuitas. Virum circumspectum & amicum propriæ conscientiæ calumniantur hypocritam. Porro amatorem quietis, & sibi

Curialium
mores &
perversæ
opinionēs.

interdum vacantem, inutilem dicunt.

C A P U T I I I.

De vestium pompa ressecanda, & zelo Pontifici necessario.

6. **Q**uid ergo tu? Evigilasne adhuc ad istos, qui circumderunt te laqueis mortis? Quæso, sustine paulisper, & supporta me. Immo da veniam, non tam temere, quàm timide hæc loquenti. Æmulor te æmulatione bona, & utinam quàm vehementi, tam utili. Scio ubi habitas; increduli & subverfores sunt tecum. Lupi, non oves sunt: talium tamen tu pastor. Utilis consideratio, qua forte inveneris, quomodo, si fieri possit, convertas eos, ne ipsi subvertant te. Quid diffidimus posse reverti in oves, è quibus everti in lupos potuerunt? Hic, hic, non parco tibi, ut parcat Deus. Pastorem te populo huic certe aut nega, aut exhibe.

NOTA zelum sancti

Non

Non negabis : ne cuius sedem tenes, te neget heredem. Petrus hic est, qui nescitur processisse aliquando vel gemmis ornatus, vel sericis; non tectus auro, non vectus equo albo, nec stipatus milite, nec circumstrepentibus sæptus ministris. Absque his tamen credidit satis posse impleri salutare mandatum : *Si amas me, pascere oves meas.* In his succedisti, non Petro, sed Constantino. Consulo toleranda pro tempore, non affectanda pro debito. Ad ea te potius incito, quorum te scio debitorem. Etsi purpuratus, etsi deauratus incedens, non est tamen quod horreas operam curamve pastorem, Pastoris heres : non est quod erubescas Evangelium. Quamquam si volens evangelizes, inter Apostolos quidem etiam gloria est tibi. Evangelizare, pascere est. **F A C O P U S** Evangelistæ, & pastoris opus implesti.

Pompam & splendorem nescivit Petrus.

Joan. 21^d 15.

7. Dracones, inquis, me mones pascere, & scorpiones, non oves.

Gladius
Pontificis
duplex.

Johan. 18.
11.

Luc. 22. 38.

Propter hoc inquam magis , aggredere eos , sed verbo , non ferro. Quid tu denuo usurpare gladium tentes , quem semel jussus es reponere in vaginam ? Quem tamen qui tuum negat , non satis mihi videtur attendere verbum Domini dicentis sic : *Converte gladium tuum in vaginam.* Tuus ergo & ipse , tuo forsitan nutu , etsi non tua manu evaginandus. Alioquin si nullo modo ad te pertineret & is , dicentibus Apostolis , *Ecce gladii duo hic ; non respondisset Dominus , Satis est ; sed , Nimis est.* Uterque ergo Ecclesiæ , & spiritalis scilicet gladius , & materialis ; sed is quidem pro Ecclesia , ille vero & ab Ecclesia exserendus : ille Sacerdotis , is militis manu , sed sane ad nutum Sacerdotis , & jussu Imperatoris. Et de hoc alias. Nunc vero arripe , qui tibi ad feriendum creditus est ; & vulnera ad salutem , si non omnes , si non vel multos , certe quos possis.

8. Non sum , inquis , melior quàm

patres mei. Quem illorum domus exasperans, non dico, audivit, sed non irrisit? Ideo tu insiste magis, si forte audiant, & quiescant: insiste & resistantibus. Dicendo hæc, forte nimius dicar. Num nostra illa vox: *Insta opportune, importune?* Hunc, si audes, nimium appellato. Prophetæ præcipitur: *Clama, ne cesses.* Ad quos, nisi ad sceleratos & peccatores? *An-nuntia, inquit, populo meo scelera eorum, & domui Jacob peccata eorum.* Prudenter adverte, & sceleratos perhiberi, & populum Domini. Puta de his idem. Etsi scelerati, etsi iniqui, vide ne audias: *Quod uni ex minimis meis non fecisti, nec mihi fecisti.* Fateor populum istum exstitisse usque adhuc dura fronte, & indomito corde; sed utrumne etiam indomabili, nescio unde liquido scire possis. Potest fore, quod necdum fuit. Si diffidis tu; sed apud Deum non erit impossibile omne verbum. Si dura fronte sunt, durato & tu è contra tuam. Nil tam durum,

Rebellibus
etiam præ-
dicare non
desisten-
dum.

2. Tim. 4. 2.

Isa. 58. 1.
Ibidem.

Matth. 25.
45.

Luc. 1. 37.
Quomodo
Pastori
cum duris
& refracta-
riis agen-
dum.

Ezech. 3. 8. quod duriori non cedat. Dominus
Luc. 4. 43. ad Prophetam : *Dedi frontem tuam
 duriores frontibus eorum.* Unum est
 quod te absolvit, si egisti cum populo
 illo, ut possis dicere : Popule meus,
 quid tibi debui facere, & non feci?
 Si sic fecisti, nec profecisti; est de-
 mum quod facias, & quod dicas. Exi
 de Hur Chaldæorum, & dicito, quia
 oportet me & aliis civitatibus evange-
 lizare. Puto nec pœnitebit exilii, orbe
 pro urbe commutato.

CAPUT IV.

*Quales collaterales & coadjutores à
 Pontifice adhibendi : ubi de virtutibus
 Prælatorum.*

9. **V**Eniamus ad collaterales &
 coadjutores tuos. Hi seduli
 tibi, hi intimi sunt. Quamobrem si boni
 sunt, tibi potissimum sunt : si mali,
 æque plus tibi. Ne te dixeris sanum,
 dolentem latera : hoc est, ne te dixeris

bonum, malis innitentem. Aut si bonus sis, bonitas tui solius quem fructum afferre potest? sicut in superiore libro * dixisse me memini. Quid, inquam, emolumentum affert ecclesiis Dei tua unius hominis iustitia, ubi sententia praevalet aliter affectorum? Sed nec tuta tibi tua bonitas obseffa malis, non magis quam sanitas vicino serpente. Non est quo te subducas malo intestino. Et è regione, bonum domesticum eo amplius, quo saepius juvat. Sed sive levent, sive gravent, cui rectius imputandum quam tibi, qui tales aut elegisti, aut admististi? Non de omnibus dico: nam sunt quos non elegisti, sed ipsi te. At potestatem non habent, nisi quam tu eis aut tribueris, aut permiseris. Ad idem ergo revertimur. Tibi imputa quicquid patieris ab eo, qui sine te potest facere nihil. His exceptis, de cetero non inconsiderate (ut vides) eligendi quique seu colligendi sunt in opus ministerii hujus. Tuum est

* lib. 3.
num. 9.

Non sufficit Prælatum esse bonum, nisi tales habeat collaterales.

*Num. 11.
16.
Cardinales
quales eli-
gendi.*

*Rogans ex-
cludendus.*

*Clericus
requentans
curiam am-
bitionis sus-
ceptus.*

undecumque evocare & adsciscere tibi, exemplo Moyfi, senes, non juvenes; sed senes non tam ætate quàm moribus, quos tu nosti, quia senes populi sunt. Annon eligendi de toto orbe, orbem judicaturi? Sane huic negotio non se ingerat rogans. Consilio, non prece agendum est. Sunt quæ necessario à nobis rogantium aut extorquet importunitas, aut necessitas meretur. At istud in his quæ nostra sunt. Ubi autem non licet quod volo facere, quis locus roganti? Nisi forte qui me rogat, hoc rogat, ut quod vult, velle liceat mihi, & non magis ut velim. Alius pro alio, alius forte & pro se rogat. Pro quo rogaris, fit suspectus; qui ipse rogat pro se, jam judicatus est. Nec interest, per se, an per alium quis roget. Clericum curiam frequentantem, qui non sit de curia, ad idem noris pertinere ambientium genus. Adulantem, & ad placitum cujusque loquentem, unum de rogantibus puta, etiamsi

nihil rogaverit. Scorpioni non est in facie quod formides : sed pungit à cauda.

10. Si ad talium blanditias cor tuum, ut affolet, molliri senseris, memineris scriptum : *Omnis homo primum bonum vinum ponit ; cum autem inebriatus fuerint, tunc id quod deterius est.* Pari pondere æstimaveris ejus humilitatem qui timet, & ejus qui sperat. VIRI CALLIDI & dolosi proprium esse solet tunc prætere humilitatem, cum aliquid obtinere voluerit. de quolibus dicit Scriptura : *Est qui se humiliat nequiter, & interiora ejus plena sunt dolo.* De vobis ipsis sume sententiæ hujus evidens ac familiare exemplum. Quantos quos supplices admisti, postmodum sustinuiſti graves, insolentes, contumaces, rebelles? Quod quidem interius malum tegunt principia, posteriora produnt. VERBOSULUM adolescentem, & studentem eloquentiæ, cum sapientiæ sit inanis, non aliud quàm justitiæ hos-

Johan. 2. 10.
Ambientium subdola humilitas.

Eccl. 19. 23;

Verborum & eloquentiæ studiosi cavendi.

1. Tim. 5.
22.

tem reputes. Pro hujusmodi falsis fratribus dicit tibi Magister: *Manus cito nemini imposueris.*

Inconsulte
nihil faciendum.

Eccles. 32.
22.

Probos recipit curia,
non efficit.

II. Excluso itaque universo hoc pestilenti genere hominum, curæ tibi maxime sit introducere tales, quos postmodum introduxisse non poeniteat. TURPE est tibi sæpius retractare quod feceris, & iudicium tuum frequenter periclitari non decet. Diligenter proinde omne quod faciendum erit, tracta apud te, & cum his qui te diligunt. TRACTA ante factum, quia post factum fera retractatio est. Sapientis consilium est: *Omnia fac cum consilio, & post factum non poenitebis.* ET HOC tibi persuade, qui admittendi sunt, difficile in curia posse probari. & ideo, si fieri potest, viros probatos oportere deligi, non probandos. Nos in monasteriis omnes recipimus spe meliorandi: at curia bonos facilius recipere, quam facere consuevit. Quod si plures in ea defecisse bonos, quàm malos profecisse

probavimus ; quærendi fane quibus nec defectus timeatur , nec profectus optetur , utpote jam perfectis.

12. Itaque non volentes , neque currentes assumito , sed cunctantes , sed renuentes : etiam coge illos , & compelle intrare. In talibus , ut opinor , requiescet spiritus tuus , qui non sint attritæ frontis , sed verecundi , sed timorati :

Ambientes
rejiciendi ,
fugientes
assumendi.

qui præter Deum tantum timeant nihil , nihil sperent nisi à Deo. Qui adventantium non manus attendant , sed necessitates. Qui stent viri-

Cardinales
quales esse
oporteat.

liter pro afflictis , & judicent in æquitate pro mansuetis terræ. Qui sint com-

V. epist. 188.

positi ad mores ; probati ad sanctimoniam , parati ad obedientiam , mansueti ad patientiam , subjecti ad disciplinam , rigidi ad censuram , catholici ad fidem , fideles ad dispensationem , concordēs ad pacem , conformes ad unitatem. Qui sint in judicio recti , in consilio providi , in jubendo discreti , in disponendo industrii , in agendo strenui , in loquendo modesti , in

Dotes &
conditio-
nes.

adversitate securi, in prosperitate devoti, in zelo sobrii, in misericordia non remissi, in otio non otiosi, in hospitio non dissoluti, in convivio non effusi, in cura rei familiaris non anxii, alienæ non cupidi, suæ non prodigi, ubique & in omnibus circumspecti. Qui legatione pro Christo fungi, quoties opus erit, nec jussi renuant, nec non jussi affectent. Qui quod verecunde excusant, obstinatius non recusent. Qui missi post aurum non eant, sed Christum sequantur: qui quæstum legationem non æstiment, nec requirant datum, sed fructum. QUI REGIBUS Johannem exhibeant, Ægyptiis Moysem, fornicantibus Phinees, Eliam idololatriis, Elifæum avaris, Petrum mentientibus, Paulum blasphemantibus, negotiantibus Christum. QUI VULGUS non spernant, sed doceant: divites non palpent, sed terreant: pauperes non gravent, sed foveant: minas principum non paveant, sed contemnant.

Quales Legatos Apostolicos.

Qui non cum turba * intrent, nec cum ira exeant: qui ecclesias non spolient, sed emendent. Qui marsupia non exhauriant, sed corda reficiant, & crimina corrigant; famæ provideant suæ, nec invideant alienæ. QUI ORANDI studium gerant, & usum habeant, ac de omni re orationi plus fidant, quàm suæ industriæ vel labori. Quorum ingressus pacificus, molestus exitus sit. quorum sermo ædificatio, quorum vita justitia, quorum præsentia grata, quorum memoria in benedictione. Qui se amabiles præbeant, non verbo, sed opere: reverendos exhibeant, sed actu, non fastu. Qui humiles cum humilibus, & cum innocentibus innocentes; du-ros dure redarguant, malignantes coërceant, reddant retributionem superbis. QUI NON DE DOTE viduæ, & patrimonio Crucifixi se vel suos ditare festinent; gratis dantes quod gratis acceperunt, gratis facientes judicium injuriam patientibus,

* id est,
cum tumultu.

Num. II.
16.

vindictam in nationibus, increpationes in populis. Qui de tuo denique spiritu, illorum instar septuaginta Moyfi, accepisse cernantur, per quem siue absentes, siue præsentes contendant placere tibi, placere Deo. Qui ad te redeant fatigati quidem, sed non suffarcinati: simul & gloriantes, non quod curiosa seu pretiosa quæque terrarum attulerint, sed quod reliquerint pacem regnis, legem barbaris, quietem monasteriis, ecclesiis ordinem, clericis disciplinam, Deo populum acceptabilem, sectatorem bonorum operum.

C A P U T V.

Exemplis commendatur abstinentia munerum; & arrogantia ministrorum Papæ perstringitur.

Exemplum
memora-
bile Marti-
ni Cardina-
lis.

13. **D**ignum reor ad medium venire factum dulcis memoriæ Martini nostri. Nosti hoc; sed an

memineris, ignoro. Is cardinalis presbyter, functus aliquando legatione in Dacia, tam pauper remeavit, ut pæne expensis & equis deficientibus, vix perveniret Florentiam. Ibi Episcopus loci donavit ei equum, quo Pisas usque, ubi eramus tunc, pervectus est. Postridie, credo, secutus Episcopus (erat enim illi causa cum adversario, & agendi aderat dies) cœpit requirere suffragia amicorum. Cumque per singulos sollicitarentur, ventum est ad Martinum. Fiducia erat major in illo, qui non posset immemor esse recentis beneficii. Tum Martinus : Decepisti me, inquit. nesciebam tibi imminere negotium. Tolle equum tuum, ecce in stabulo est. Et hora eadem resignavit illi. Quid dicis, mi Eugeni ? Nonne alterius sæculi res est, redisse Legatum de terra auri sine auro ? transiisse per terram argenti, & argentum nescisse ? donum insuper, quod poterat esse suspectum, ilico rejecisse ?

Aliud e-
xemplum
Gaufridi
Carnoten-
sis.

14. Sed, ô mihi locum suavem, ubi incidit occasio memorandi & nominandi suavissimi odoris virum, episcopum loquor Carnotensem Gaufridum, qui legationem in partibus Aquitaniæ propriis sumptibus strenue administravit, idque annos plures. Rem loquor, quam vidi ipse. Eram cum eo in terra illa, cum à quodam presbytero præsentatus illi est piscis, quem vulgo vocant sturgionem. Percunctatus Legatus quanti venierit; Non accipio, inquit, nisi receperis pretium. & resignavit solidos quinque invito & verecundo. Item cum essemus in quodam oppido, domina illius oppidi obtulit ei pro devotione cum manutergio duas vel tres parop-fides pulcras, ligneas tamen. quas aliquamdiu intuens homo scrupulosæ conscientiæ, laudavit eas, sed non acquievit accipere. Quando * argenteas recepisset, qui ligneas refutavit? Non fuerunt qui possent Legato dicere: *Ditavimus Abraham.* Ipse vero

* al. quomodo.

cum Samuële libere concionabatur ad omnes : *Loquimini de me coram Domino, & coram Christo ejus, utrum bovem cujuspiam tulerim aut asinum ; si quempiam calumniatus sum ; si oppressi aliquem, si de manu cujusquam munus accepi ; & contemniam illud hodie, vobisque restituam.* O si talium daretur virorum copia, quales perstrinximus nunc ! Quid te felicius, quid illo jucundius sæculo ? Nonne secunda ab æternitate illorum tibi temporum beatitudo videretur, cum te, quaquaversum procedens, stipatum videres tam inclyto agmine beatorum ?

15. Si te novi, hæres, & altum trahens suspirium *, tecum loqueris : Putas fore posse quod dicitur ? Putas hic sumus, quousque hæc fiant ? Quis det vivere, ut videre contingat ? O si viderem in vita mea Ecclesiam Dei talibus innixam columnis ! O si Domini mei sponsam cernerem tantæ commissam fidei, tantæ creditam puritati ! Quid me beatius, quidve secu-

* *al. spiritum.*

Eugenii
votum pro
bonis mi-
nistis.

rius, cum ejusmodi circa me vitæ meæ & custodes spectarem simul & testes? Quibus omnia mea secreta secure committerem, communicarem consilia; quibus me totum refunderem, tamquam alteri mihi. Qui, si vellem aliquatenus deviare, non finerent, frenarent præcipitem, dormitantem excitarent. Quorum me reverentia & libertas extollentem reprimeret, excedentem corrigeret. quorum me constantia & fortitudo nutantem firmaret, erigeret diffidentem. quorum me fides & sanctitas ad quæque sancta, ad quæque honesta, ad quæque pudica, ad quæque amabilia & bonæ famæ provocaret. Et nunc reduc oculos, mi Eugeni, ad eum qui nunc est curiæ sive Ecclesiæ statum, & studia prælatorum, eorum præsertim, qui sunt in circuitu tuo.

Arrogan-
tiam minis-
trorum Pa-
pæ retun-
dit.

16. Sed de his hætenus. Ego palpavi, non fodi parietem. Tibi licet fodere & videre, utpote prophetæ filio. Mihi progredi non est fas. Unum dico

dico quod in facie est. Ridicule ministri vestri vestris se compresbyteris anteferre conantur. Non hoc ratio habet, non antiquitas habuit, non consentit auctoritas. Et si de sua consuetudine calumnia struitur, melius profecto illa, quàm summus Ordo contemnitur. Frivolum tamen satis, unde maxime obtinere id volunt. Nos sumus, inquiunt, qui in omni celebritate domino Papæ conjunctiores assistimus, sedenti propiores assistemus, procedentem posteriores præcedimus. Hoc totum non dignitatis privilegium, sed sedulitatis debitum est, diaconi nomen sollemni ipsa administratione interpretans. Denique presbyteris ordinata confessione ambientibus majestatem, vos ad pedes sedetis. Propiores assistitis, ut habeat paratiores. In evangeliiis legimus, quia *facta est contentio inter discipulos, quis eorum videretur esse major.* Beatus esses, si sic circa te cetera tenerentur.

Luc. 22. 24.

CAPUT VI.

*Pontifici non convenire, utpote gravioribus intento, rei domestica curam; proindeque alteri potius Oecono-
mocommittendam.*

17. **T**ædet jam curiæ: exeundum palatio; domi expectant nos. Hi non modo circa, sed quodam modo intra te sunt. Non est supervacua consideratio, qua intendis dis-
ponere domui tuæ, providere his qui in sinu tuo & in gremio tuo sunt. Ego
1. Tim. 3.5. dico & necessariam. Paulum audi: Si
quis domui suæ præesse nescit, quomodo
2. Tim. 5.8. Ecclesiæ Dei diligentiam habebit? item,
Si quis suorum, & maxime domestico-
rum, curam non habet, fidem negavit,
& est infideli deterior. Et hæc dicens,
non te moneo summis occupatum
intendere infimis, & quasi minutum
fieri; minimis impendere quod maxi-
mis debes. Quid te intrices, unde te

eripuit Deus? *Hæc*, inquit, *omnia adjicientur vobis*. Verumtamen & hæc oportet facere, & illa non omittere. At illa per te agens, per te etiam oportet provideas, qui pro te de his provideant. Nam si unus è servis per se non sufficit simul & custodiæ jumentorum, & curæ mensarum: tu per te quomodo intendere valeas & tuæ domui, & Domini pariter? de qua scriptum est: *O Israël, quàm magna est domus Domini!* VACUUM prorsus à sollicitudine rerum minorum & vilium oportet esse animum, tam magnis & tam multis intentum rebus. Oportet liberum, quem nulla sibi vindicet violenta occupatio. Oportet ingenuum, quem nulla deorsum trahat indigna affectio. Oportet rectum, quem nulla seorsum avertat sinistra intentio. Oportet cautum, quem nulla subeat furtiva suspicio. Oportet vigilem, quem nulla ab sese abducat peregrina & curiosa cogitatio. Oportet firmum, quem nulla concutiat repentina

Matth. 6.

33.

Non decet Pontificem occupari in minimis.

Baruch. 3.

24.

Pontificis animum qualem esse oporteat,

turbatio. Oportet invictum, quem nulla fatiget vel continua tribulatio. Oportet amplum, quem nulla coarctet rei temporalis amissio.

18. His te non dubites & bonis privandum, & feriendum malis, si animum dividens, & Dei rebus, & tuis pariter reculis volueris impertiri. Procurandus quem implices, qui pro te molat. Pro te dico, non tecum. Quædam per te facies; quædam per te & alios simul; quædam per alios & absque te. Quis sapiens, & intelliget hæc? Non est quod inter ista dormitet consideratio tua. Ego vero agenda domus tuæ sub eo genere, quod novissimum posui, locanda censuerim. Per alium, ut dixi, illa facies. At is, si fidelis non fuerit, fraudabit: si non fuerit prudens, fraudabitur. Quærendus proinde fidelis & prudens, quem constituas super familiam tuam. Adhuc inutilis est, si tertium desit. Quæris quid hoc? auctoritas. Quid enim prodest ei velle, & scire quæque dis-

Oeconomi
tres condi-
tiones.

ponere, prout necesse est, si quod scit
& vult, non potest? Danda ergo fa-
cultas agendi pro libitu. Si in præju-
diciu[m] rationis putas hoc fieri, me-
mento fidelem, qui agere nihilo minus
pro ratione volet: attende prudentem,
qui agere nihilo minus pro ratione
sciet. Sed fidelis sollersque voluntas
tunc proderit, cum ei affatim suppe-
tet, unde tota facilitate mancipetur
effectui, cunctis sine cunctatione pa-
rentibus. Subdendi igitur omnes.
Nullum patiatur contradictorem. Ne-
mo qui dicat, cur fecisti sic? Potesta-
tem habeat excludere & admittere
quos voluerit, mutare ministros, trans-
ferre ministeria ad quos, & quando
voluerit. Ita timori sit omnibus, ut
sit & utilitati. Præsit omnibus, ut om-
nibus pro[fi]t, & de omnibus. Clan-
destinas & sufurratas delationes non
recipias adversus eum: magis detrac-
tiones censueris. **ET HANC** velim
generalem tibi constituas regulam,
ut omnem, qui palam veretur dicere

Regula ge-
neralis in
delatores.

quod in aure locutus est, suspectum habeas. Quod si te judicante dicendum coram ille renuerit, delatorem judices, non accusatorem.

Fidelis servus an præferendus prudenti.

19. Itaque unus omnibus facienda injungat, & uni omnes respondeant.

Tu illi habeas fidem, vacans tibi & Ecclesiæ Dei. Si quo minus aut fidelis inveniat, aut prudens, fideli potius committendum. Sane è duobus tu-

Intendere rebus domesticis Episcopo indignum.
Johann. 6. 12.

tius hoc. Quamquam si idoneus non reperitur, et si minus fidelem, sustinere potius consulo, quàm te immergere labyrintho huic. Memento Salvatorem Judam œconomum habuisse.

QUID EPISCOPO TURPIUS, quàm incumbere suppellectili, & substantiæ suæ: scrutari omnia, sciscitari de singulis, morderi suspicionibus, moveri ad quæque perdita vel neglecta? Ad verecundiam dico quorundam ejusmodi, scrutantium quotidie omnem substantiam suam, numerantium singula, de minutis & quadrantibus exigentium rationem.

Non ita ille Ægyptius, qui Joseph Gen. 39. 6.

omnibus traditis, ignorabat quid haberet in domo sua. ERUBESCAT Item sua nolle credere servo Christiano.

Christianus, Christiano sua non credens. Homo sine fide; fidem tamen habuit servo, super omnia bona sua constituens eum: & hic erat alienigena.

20. MIRA RES! Satis superque Episcopi ad manum habent, quibus animas credant: & cui suas committant facultatulas, non inveniunt. Optimi videlicet æstimatores rerum, qui magnam de minimis, parvam aut nullam de maximis curam gerant. Sed, ut liquido datur intelligi, patientius ferimus Christi jacturam, quam nostram. QUOTIDIANAS expensas

quotidiano reciprocamus scrutinio, & continua Domini gregis detrimenta nescimus. De pretio escarum & numero panum cum ministris quotidiana discussio est: RARA admodum cum presbyteris celebratur collatio de peccatis populorum. Cadit

Rationes temporalium præferri rationibus spiritualium.

1. Cor. 6. 7.

asina, & est qui subleuet eam: perit anima, & nemo est qui reputet. Nec mirum, cum nec nostros quidem assiduos sentiamus defectus. Nonne ad singulas supputationes istas irascimur, urimur, anxiamur? Quam tolerabilius rerum, quam mentium sustineremus jacturam! *Quare*, inquit, *non magis fraudem patimini?* Quæso tu qui alios doces, doce teipsum, si tamen jam non docuisti, pluris te habere, quam tua. Transitoria ista, quæ stare tibi nullo pacto queunt, fac ut à te transeant, non per te. Rivus qua fluit, cavat terram: sic discursus temporalium conscientiam rodit. Si potest torrens in agros excurrere sine læsione satorum: & tu te ista sine vulnere mentis posse tractare confidito. Omnimodis consulo studeas avertere à te concursum horum. Multa nescias, plurima dissimules, nonnulla obliviscaris.

Res temporales sine detrimento spirituali vix tractari possunt.

21. Sunt tamen quæ ignorare te nolim, mores quorumque & studia.

Non oportet ut vitia domus tuæ ultimus scias : quod quamplurimis novimus contigisse. Quapropter, ut dixi, alius alia dispenset : de disciplina tu provide ; illud nemini credas. Si insolentior coram te vel sermo sonuerit, vel habitus apparuerit : manus tua super ejusmodi ; tu ulciscere injuriam tuam. Impunitas ausum parit, ausus excessum. DOMUM Episcopi decet sanctitudo, decet honestas : horum disciplina custos. Sacerdotes domestici, aut ceteris honestiores, aut fabula omnibus sunt. In vultu, in habitu, in incessu illorum qui circa te sunt, nihil residere impudicum, nihil indecens patiaris. Discant à te coepiscopi tui comatulos pueros & comptos adolescentes secum non habere. Certe inter mitratos discurrere calamistratos non decet. Et memento quod Sapiens admonet : *Filiæ tibi sunt ? noli faciem tuam hilarem ad eas ostendere.*

Disciplina
tamen fa-
miliæ Pon-
tifici non
negligenda.

Eccl. 7. 26.

Familiari-
tati gravi-
tas miscen-
da, quo-
modo.

22. Nec austeritatem tamen sua-
deo tibi, sed gravitatem. Illa infir-

miores fugat, hæc reprimit leviores. Illa, si adfit, odibilem; hæc, si defit, contemptibilem reddit: in omnibus tamen modus melior. Ego nec severius velim, nec dissolutius. Quid hac mediocritate gratius, ut nec de severitate sis oneri, nec de familiaritate contemptui? In palatio Papam, domi te patremfamilias exhibe. Ament te domestici tui: si non, facito ut timeant. Utilis semper custodia oris, quæ tamen affabilitatis gratiam non excludat. Ergo ubique frenanda lingua præceps, maxime autem in convivio. **I L L E** convenientior habitus, si tu actu quidem severus sis, vultu serenus, verbo serius. Capellani, & qui tecum jugiter divinis interfunt officiis, non sint sine honore. Tuum est tales tibi providere, qui digni sint. Serviatur eis ab omnibus, tamquam tibi. Necessaria de manu tua accipiant. His contenti sint quæ tu provideris illis: tu vide ne egeant. Super hoc quem forte ab adventantibus petere

Capellanis
honor ha-
bendus.

Avaritia à
domesticis
refecanda.

deprehendes, judica Gieзитam: id de
 ostiariis, id de ceteris officialibus de-
 cernendum. Verum hoc ex abundan-
 ti: nam formam istam jam olim à re-
 positam recordamur. Quid tuo dig-
 nius apostolatu? quid salubrius ad
 conscientiam, honestius ad famam,
 utilius ad exemplum? Optimus canon,
 qui projicit avaritiam ex calumnia, &
 non à conscientia tantum.

4. Reg. 5.
20.

CAPUT VII.

*Epilogus seu summa eorum, quæ in Pon-
 tifice requiruntur.*

23. **L**ibet jam & hunc claudere
 librum: sed in calce aliqua
 velim vel ante dicta quasi epilogando
 repetere, vel addere prætermissa. Con-
 sideres ante omnia sanctam Roma-
 nam ecclesiam, cui Deo auctore
 præes, ecclesiarum MATREM esse,
 non dominam: te vero NON DOMI-
 NUM episcoporum, sed unum ex

Pontifici
 utilia mo-
 nita.

Pontificis
dotes.

ipsis ; porro fratrem diligentium
Deum , & participem timentium eum.
De cetero oportere te esse considera
formam justitiæ , sanctimonix specu-
lum , pietatis exemplar , assertorem
veritatis , fidei defensorem , docto-
rem gentium , Christianorum ducem ,
amicum sponsi , sponsæ parany-
mum , cleri ordinatorem , pastorem
plebium , magistrum insipientium ,
refugium oppressorum , pauperum
advocatum , miserorum spem , tuto-
rem pupillorum , judicem viduarum ,
oculum cæcorum , linguam mutorum ,
baculum senum , ultorem scelerum ,
malorum metum , bonorum gloriam ,
virgam potentium , malleum tyran-
norum , regum patrem , legum mo-
deratorem , canonum dispensatorem ,
sal terræ , orbis lumen , sacerdotem
Altissimi , vicarium Christi , christum
Domini : postremo deum Pharaonis.
Intellige quæ dico : dabit tibi Domi-
nus intellectum. UBI malitiæ juncta
potentia est , aliquid tibi supra homi-

nem præsumendum. Vultus tuus super facientes mala. Timeat spiritum iræ tuæ, qui hominem non veretur, gladium non formidat. **T I M E A T** orationem, qui admonitionem contempsit. Cui irasceris tu, Deum sibi iratum, non hominem putet. Qui te non audierit, auditurum Deum, & contra se paveat. Quod reliquum est, de his quæ supra te sunt, incumbit jam disputatio: quam uno libro, Deo adjuvante, solvere spero, & me pariter absolvere promissione mea.



LIBER V.

CAPUT I.

De his quæ supra nos sunt, id est de Deo rebusque divinis, considerationem instituit, ad quas modo per creaturas erigimur.

Confidera-
tio maxi-
me divina
spectat.

Mens no-
stra toties
peregrina-
tur, quo-
ties divina
non cogi-
tat.

I. **L**ibri superiores, etsi de con-
sideratione inscribantur, plu-
rimum tamen habent actionis admix-
tum, dum res aliquas non confide-
randas tantum, sed agendas docent
vel monent. At qui in manibus modo
est, sola in consideratione versabitur.
Quæ enim supra sunt (id quidem in-
stat) actu non indigent, sed inspectu.
Non est quod in eis actites, quæ uno
modo semper sunt, & in æternum;
porro aliqua & ab æterno. Et hoc
velim follerter advertas, vir sagacissi-
me Eugeni, quia TOTIES pere-

grinatur consideratio tua, quoties ab illis rebus ad ista deflectitur inferiora & visibilia, sive intuenda ad notitiam, sive appetenda ad usum, sive pro officio disponenda vel actitanda. Si tamen ita versatur in his, ut per hæc illa requirat, haud procul exsulat. Sic considerare, repatriare est. Sublimior iste præsentium ac dignior usus rerum, cum juxta sapientiam Pauli, *invisibilia Dei per ea quæ facta sunt, intellecta conspiciuntur*. Sane hac scala cives non egent, sed exsules. Quod vidit ipse hujus sententiæ auctor, qui cum diceret invisibilia per invisibilia conspici, signanter posuit, *à creatura mundi*. Et vere quid opus scalis tenenti jam solium? Creatura cæli illa est, præsto habens per quod potius ista intueatur. Videt Verbum, & in Verbo facta per Verbum. Nec opus habet ex his quæ facta sunt, Factoris notitiam mendicare. Neque enim ut vel ipsa noverit, ad ipsa descendit: quæ ibi illa videt, ibi longe melius sunt quàm

*Rom. I.
20.*

*Creaturæ
scala ad
Deum.*

*Secus in
Beatis.*

in seipsis. Unde nec medium requirit ad ea corporis sensum : sensus ipsa sibi , seipsa sentiens. Optimum videndi genus , si nullius egueris , ad omne quod * libuerit , te contentus. Alioquin juvari aliunde , obnoxium fieri est , minusque à perfecto istud , & minus liberum.

* *al. add.*
nosse.

2. Quid quod & inferioribus eges ? Nonne præposterum hoc & indignum ? Plane superiorum quædam injuria est , inferiorum operam desiderare : à qua injuria nemo hominum perfecte vindicabitur , nisi cum quisque evaserit in libertatem filiorum Dei. Nempe erunt hi omnes docibiles Dei , & nulla interveniente creatura , solo beati Deo. Repatriasse erit hoc , exisse de patria corporum in regionem spirituum. Ipsa est Deus noster , maximus spiritus , maxima mansio spirituum beatorum : & ne quid hic sibi usurpet sensus * seu imaginatio , veritas est , sapientia est , virtus , æternitas , summum bonum. Unde *

Johan. 6.
45.

* *al. carnis*
sensus.

* *al. à quo*

interim

interim absumus : & ubi sumus , val-
lis est lacrymarum , in qua sensua-
litas regnat , & consideratio exsu-
lat : in qua libere quidem & pote-
stative se exferit sensus corporeus ,
sed intricatus caligat oculus spiritua-
lis. Quid igitur mirum , si ope in-
digenæ advena indiget ? Et felix se-
cundum tempus viator , qui civium
beneficium , sine quo transire non po-
test , in obsequium convertere potuit,
utens , non fruens ; urgens , non pe-
tens ; exactor , non supplex.

C A P U T I I.

*Assignat varios considerationis
gradus.*

3. **M**agnus ille , qui usum sen- Activa vi-
ta.
suum , quasdam veluti ci-
vium opes , expendere satagit , dispen-
sando in suam & multorum salutem.
Nec ille minor , qui hunc sibi gra- Media
dum ad illa invisibilia philosophando

Contem-
plativa.

constituit. nisi quod hoc dulcius, illud utilius : hoc felicius, illud fortius esse constat. At omnium maximus, qui spreto ipso usu rerum & sensuum, quantum quidem humanæ fragilitati fas est, non ascensoriis gradibus, sed inopinatis excessibus, avolare interdum contemplando ad illa sublimia consuevit. Ad hoc ultimum genus illos pertinere reor excessus Pauli. Excessus, non ascensus : nam raptum potius fuisse, quàm ascendisse ipse se perhibet. Inde est quod dicebat : *Sive mente excedimus, Deo*. Porro hæc tria ita contingunt, cum consideratio, etsi in loco peregrinationis suæ, virtutis studio, & adjutorio gratiæ facta superior, sensualitatem aut premit ne insolescat, aut cogit ne evagetur, aut fugit ne inquinet. In primo potentior, in secundo liberior, in tertio purior. Puritatis siquidem & alacritatis pariter alis fit ille volatus.

2. Cor. 12.
14.

2. Cor. 5.
13.

Alæ ejus
duæ.

Tres con-
sideratio-
nis species.

4. Vis tibi has considerationis spe-

cies propriis distingui nominibus? Dicamus, si placet, primam dispensativam, secundam æstimativam, tertiam speculativam. Horum nominum rationes definitiones declarabunt. Dispensativa est consideratio sensibus sensibilibusque rebus ordinate & socialiter utens ad promerendum Deum. Æstimativa est consideratio prudenter ac diligenter quæque scrutans & ponderans ad vestigandum Deum. Speculativa est consideratio se in se colligens, &, quantum divinitus adjuvatur, rebus humanis eximens ad contemplandum Deum. Puto vigilanter advertitis aliarum hanc esse fructum: ceteras, si non referantur ad istam, quod dicuntur, videri posse, sed non esse. Et prior quidem absque intuitu hujus multa ferit, & nihil meretur: sequens vero nisi ad istam se dirigat, vadit, sed non evadit. Ergo quod prima aptat, secunda odorat, tertia gustat. Ad quem tamen gustum perducunt & ceteræ, etsi tardius: nisi quod

S. Bernardi Abbatis
primâ laboriosius, secundâ quietius
pervenitur.

C A P U T I I I.

*Ea quæ supra nos sunt, Deum scilicet &
Angelos, investigari opinione,
fide, & intellectu.*

Dixisti, inquis, satis quâ ascen-
datur: etiam quò ascen-
dendum, dicere habes. Falleris, si id
speras: ineffabile est. Tu me existimas
loqui quod oculus non vidit, nec au-
ris audivit, & in cor hominis non
ascendit? Nobis, inquit, *revelavit*
Deus per spiritum suum. Ergo quæ su-
pra sunt, non verbo docentur, sed
spiritu revelantur. Verum quod sermo
non explicat, consideratio quærat,
oratio expetat, mereatur vita, puritas
assequatur. Sane eorum admonitus
quæ supra sunt, non te existimes mitti
à me suspicere solem, lunam, stellas,
non ipsum firmamentum, non aquas

Isa. 64. 4.
1. Cor. 2.
10.

Deus inef-
fabilis ut
quæren-
dus.

quæ super cælos sunt. Ista siquidem omnia, etsi supra loco, pretio infra sunt, & dignitate naturæ: sunt enim corpora. Tui portio spiritus est, quo superius quippiam frustra quæris, quod non sit spiritus. Porro spiritus est Deus, sunt & Angeli sancti, & hi supra te. Sed Deus natura, Angeli gratia superiores sunt. Unum siquidem tui & Angeli optimum, ratio est: Deus vero non sui aliquid optimum habet, unum optimum totus. Is, & qui cum eo sunt beati spiritus, tribus modis, veluti viis totidem, nostra sunt consideratione vestigandi, opinione, fide, intellectu. Quorum intellectus rationi innititur, fides auctoritati, opinio sola veri similitudine se tuetur. Habent illa duo certam veritatem: sed fides clausam & involutam, intelligentia nudam & manifestam: ceterum opinio certi nihil habens, verum per veri similia quærit potius, quàm apprehendit.

Tres modi
speculandi
divina.

6. Omnino in his cavenda confu-

Cavenda in
illis tribus
confusio.

fio, ne aut incertum opinionis fides figat, aut quod firmum fixumque est fidei, opinio revocet in quæstionem. Et hoc sciendum, quia opinio, si habet assertionem, temeraria est: fides, si habet hæitationem, infirma est: item intellectus, si signata fidei tentet irrumpere, reputatur effractor, scrutator majestatis. Multi suam opinionem intellectum putaverunt, & erraverunt. Et quidem opinio potest putari intellectus; intellectus opinio non potest. Unde hoc accidit? Profecto quia hæc falli potest, ille non potest: aut si falli potuit, intellectus non fuit, sed opinio. Verus nempe intellectus certam habet non modo veritatem, sed notitiam veritatis. Possumus singula hæc ita definire. Fides est voluntaria quædam & certa prælibatio necdum propalata veritatis. Intellectus est rei cujuscumque invisibilis certa & manifesta notitia. Opinio est quasi pro vero habere aliquid, quod falsum esse nescias. Ergo, ut dixi, fides am-

Definitio-
nes illo-
rum.

biguum non habet; aut si habet, fides non est, sed opinio. Quid igitur distat ab intellectu? Nempe quod etsi non habet incertum, non magis quàm intellectus; habet tamen involu-
lucrum, quod non intellectus. Denique quod intellexisti, non est de eo quod ultra quæras: aut si est, non intellexisti. Nil autem malumus scire, quàm quæ fide jam scimus. Nil supererit ad beatitudinem, cum quæ jam certa sunt nobis fide, erunt æque & nuda.

CAPUT IV.

Angeli quomodo considerandi.

7. **H**is ita expeditis, age jam dirigatur consideratio in eam quæ sursum est Jerusalem mater nostra, ac totis tribus memoratis viis caute & vigilanter vestigemus investigabilia: quatenus tamen licet, vel magis quatenus nobis donabitur. Et primo quidem cives spiritus esse illic

Angelo-
rum confi-
deratio.

potentes, gloriosos, beatos, distinctos
 in personas, dispositos in dignitates,
 ab initio stantes in ordine suo, per-
 fectos in genere suo, corpore æthe-
 reos, immortalitate perpetuos, impas-
 sibiles non creatos, sed factos, id est
 gratia, non natura; mente puros, af-
 fectu benignos, religione pios, casti-
 monia integros, unanimitate indivi-
 duos, pace securos, à Deo conditos,
 divinis laudibus & obsequiis deditos.
 Hæc omnia legendo comperimus, fi-
 de tenemus. Quamquam de corpori-
 bus horum non modo unde sint, sed
 an aliquatenus sint, hæret sententia
 aliquorum. Unde si quis inter opina-
 bilia magis id ponendum censuerit,
 non contendo. Porro intellectu præ-
 ditos, non fide, non opinione, sed
 intellectu capimus: quia non possunt
 hujus expertes, & Dei simul partici-
 pes esse. Sunt & nomina quædam nota
 nobis similiter ex auditu, per quæ ha-
 rum beatitudinum, etiam quæ non
 liquido mortalium percepit auditus,

De nomini-
 bus, offi-
 ciis, & di-
 stinctione
 Angelo-
 rum,

officia, merita, gradus, ordines, utcumque à nobis conjici & discerni queunt. Sed enim quod ex auditu non est, jam non ex fide: nam fides ex auditu. Itaque opinando ista dixerimus. Ad quid enim cælestium nomina innotuerunt, si ne opinari quidem salva fide aliquid licet de rebus, quarum nomina sunt? Angeli, Archangeli, Virtutes, Potestates, Principatus, Dominationes, Throni, Cherubin, & Seraphin, hæc nomina. Quæ significata eorum? Nullane inter illos spiritus, qui simpliciter Angeli, & eos qui Archangeli nuncupantur, distantia?

Rom. 10.

17.

8. Quid ergo sibi vult gradualis distinctio hæc? Putemus Angelos dici (nisi tu convenientius aliquid considerasti) qui singuli singulis hominibus dati creduntur: *missi in ministerium*, secundum Pauli doctrinam, *propter eos qui hereditatem capiunt salutis*. de quibus Salvator: *Angeli eorum semper vident faciem Patris*. Pute-

Nominum
ratio.

Hab. 1. 14.

Matth. 18.

10.

mus his præesse Archangelos, qui conscii mysteriorum divinorum, nonnisi ob præcipuas & maximas causas mittuntur. E quibus magnus ille archangelus Gabriel missus legitur ad Mariam, ob causam utique, qua major esse non potuit. Putemus super istos Virtutes esse, quorum nutu vel opere signa & prodigia in elementis, five ex elementis facta apparent ad commotionem mortalium. Inde est fortassis, quod cum in Evangeliiis legas, *Erunt signa in sole, & luna, & stellis,* paulo post habes: *Nam Virtutes celorum movebuntur;* hi nimirum spiritus, per quos signa fiunt. Putemus Potestates superiores istis, quarum virtute potestas tenebrarum comprimitur, & coercetur malignitas aeris hujus, ne quantum vult noceat; ne malignari, nisi ut profit, possit. Putemus Principatus his quoque prælatos, quorum moderamine & sapientia omnis in terris principatus constituitur, regitur, limitatur, transfertur, mutila-

Luc. 1. 26.

Luc. 21.
26.

tur, mutatur. Putemus Dominationes adeo cunctis supereminere præfatis ordinibus, ut respectu horum ceteri videantur omnes administratorii spiritus, & ad istos, tamquam ad dominos, referri regimina Principatum, tutamina Potestatum, operationes Virtutum, revelationes Archangelorum, curam & providentiam Angelorum. Putemus Thronos alto etiam ab his evolasse recessu, qui ex eo quod sedent, Throni dicuntur; & ex eo sedent, quod sedet in eis Deus. Neque enim sedere in eis, qui non sederent, posset. Quæris quid * illam * *al. quam.* sentiam sessionem? Summam tranquillitatem, placidissimam serenitatem, pacem quæ exsuperat omnem intellectum. Talis est qui sedet in Thronis Dominus Sabaoth, judicans omnia cum tranquillitate, placidissimus, serenissimus, pacatissimus. Et tales sibi constituit Thronos, simillimos sibi. Putemus Cherubin ex ipso sapientiæ fonte, ore Altissimi, haurien-

Psal. 45. 5.

tes , & refundentes fluentia scientiæ
universis civibus suis. Et vide ne is sit,
quem Propheta loquebatur , flumi-
nis impetus lætificans civitatem Dei.
Putemus Seraphin , spiritus totos di-
vino igne succensos , succendere uni-
versa , ut singuli cives singulæ sint
lucernæ ardentes & lucentes ; arden-
tes caritate , lucentes cognitione.

Quanta
jucunditas
caelestia
meditari.

Psal. 25. 8.

9. O Eugeni , quàm bonum est
nos hic esse ! quàm fore melius , si
quando tamen toti sequamur , quo ex
parte præcessimus ! Præcedimus ani-
mo , & ne ipso quidem toto , sed parte
modica nimis. Affectus jacent mole
corporea prægravati , & luto hæren-
tibus desideriis , sola interim arida &
tenuis consideratio prævolat. Et ta-
men ex tantillo quod jam datur , li-
bet exclamare : *Domine , dilexi decorem
domus tuæ , & locum habitationis glo-
riæ tuæ.* Quid si totam se colligat ani-
ma , & reductis affectibus è cunctis
locis , quibus captivi tenentur , timen-
do quæ non oportet , amando quæ

non decet, dolendo vane, gaudendo vanius; cum his ineat tota libertate volatum, pulset impetu spiritus, & in pinguedine gratiæ illabatur? Nonne cum cœperit circuire lucidas mansiones, & sinum illum etiam Abrahamæ curiosius perscrutari, & sub altari, quodcumque illud est, Martyrum revivere animas, in prima stola secundam patientissime expectantes, multo magis tunc instabit loquens cum Propheta: *Unam petii à Domino, hanc requiram, ut inhabitem in domo Domini omnibus diebus vitæ meæ, ut videam voluntatem Domini, ac visitem templum ejus?* Quidni ibi videatur cor Dei? quidni ibi probetur quæ sit voluntas Dei bona, & beneplacens, & perfecta? Bona in se, placens in effectibus, beneplacens fruentibus, perfecta perfectis, & nihil ultra quærentibus. Patent viscera misericordiæ, patent cogitationes pacis, divitiæ salutis, mysteria bonæ voluntatis; benignitatis arcana, quæ clausa mortalibus, etiam

ipsis electis suspecta sunt. Id quidem salubriter, ne desinant timere, dum necdum digne amare idonei inveniuntur.

In singulis
Angelo-
rum ordi-
nibus quid
confide-
randum.

10. Cernere est in his qui Seraphin appellantur, quomodo amet qui unde amet non habet, sed est & qui nihil horum quæ fecerit odit: quos salvandos fecit, quomodo foveat, quomodo provehat, quomodo amplexetur, quomodo delicta electæ juventutis, & paleas ignorantiarum ejus ignis ille consumens, ipsam purgatissimam & suo amore dignissimam reddat. Cernere est in Cherubin, qui plenitudo scientiæ dicuntur, Deum scientiarum dominum esse, qui solus solam nesciat ignorantiam; qui totus sit lux, & tenebræ in eo non sint ullæ; totus sit oculus, & qui minime aliquando fallitur, quia minime clauditur; qui extra se non quærat lumen, cui admoveatur ut videat, ipse qui videt, ipse unde videt. Cernere est in Thronis, quàm non suspectus omni innocentia

judex sedeat in his, qui circumvenire nolit, circumveniri non possit, quippe sic amans, & sic videns. Nec vacat sessio: tranquillitatis insigne est. De vultu tali iudicium meum prodeat opto, cui inest amor, error absit, absit & perturbatio. Cernere est in Dominationibus, quantæ sit Dominus majestatis, cujus nutu imperium constat, & imperio universitas atque æternitas termini sunt. Cernere est in Principatibus principium ex quo omnia; & quomodo à cardine ostium, sic ab ipso regi universitatem. Cernere est in Potestatibus, quàm potestative idem princeps quos regit, protegit, contrarias potestates arcens & propulsans. Cernere est in Virtutibus unam ubique æqualiter præsto esse virtutem, per quam omnia, vivificam, efficacem, invisibilem, immobilemque, omnia tamen moventem utiliter, tenentem fortiter. Quæ cum in minus usitata effecta apud mortales eruperit, miracula sive prodigia vocant.

1. Pet. 5. 7.

Cernere postremo & mirari est in Angelis & Archangelis veritatem atque experientiam vocis illius, *Quoniam ipsi cura est de nobis*; qui talium nos & tantorum non desinit jucundare visitationibus, instruere revelationibus, suggestionibus commonere, sedulitate solatiari.

CAPUT V.

Gratias ac dotes Angelorum à Deo in ipsos derivari.

Eorum virtutes à Deo.

II. **H**Æc omnia contulit illis spiritibus ipse qui condidit illos, unus atque idem summus Spiritus, dividens singulis prout voluit. Hæc operatur in illis, hæc dedit operari & illis, sed aliter. Ardent Seraphin, sed igne Dei, vel potius igne Deo. Quod præcipuum est in eis, amant: sed non quantum Deus, nec quomodo. Lucent Cherubin, & scientia eminent, sed participio veritatis; ac
per

per hoc non ut Veritas, nec quantum. Sedent Throni, sed infidentis beneficio. Judicant & ipsi cum tranquillitate, sed non ad mensuram modumve pacis pacantis, pacis quæ exsuperat omnem sensum. Dominantur Dominationes, sed sub Domino dominantur, serviunt pariter. Quid hoc ad summum, sempiternum, singulareque dominium? Præfunt Principatus, & regunt: sed reguntur & ipsi, ita ut regere jam non norint, si regi desierint. Præcellit in Potestatibus fortitudo: sed cui debent quod fortes sunt, & aliter est fortis, & plus; nec tam fortis quàm ipsa fortitudo est. Virtutes pro suo ministerio & potentatu satagunt excitare corda torpentia hominum innovatione signorum: virtus vero in eis manens, ipsa facit opera. Faciunt & illæ, sed in comparatione ejus non faciunt. Denique tantum interest, ut quasi singulariter Propheta dicat ad eum: *Tu es Deus qui* Psal. 76. 15. *facis mirabilia.* & idem de eo: *Qui* Pf. 135. 4.

facit mirabilia magna solus. Adfunt Angeli & Archangeli : sed ille germanior nobis , qui non modo adest , sed inest.

Zach. 1.14.

Quomodo
infit homi-
ni angelus ,
& quomo-
do Deus.

12. Quod si dicas posse inesse & Angelum , non inficior. Memini scriptum : *Et Angelus qui loquebatur in me.* Atqui differentia & in hoc. Inest Angelus suggerens bona , non ingrens : inest hortans ad bonum , non bonum creans. Deus sic inest , ut afficiat , ut infundat ; vel potius ut infundatur & participetur , ita ut unum perinde cum nostro spiritum esse dicere quis non timuerit , etsi non unam personam , unamve substantiam. Habes enim : *Qui adhæret Deo , unus spiritus est.* Angelus ergo cum anima , Deus in anima. Ille ut contubernalis animæ inest , Deus ut vita. Itaque sicut anima videt in oculis , audit in auribus , odorat in naribus , in faucibus gustat , tangit in toto reliquo corpore : sic Deus diversa in diversis spiritibus operatur ; verbi gratia , in aliis

1. Cor. 6.

17.

amantem se exhibens, in aliis agnoscentem, in aliis alia facientem, sicut unicuique datur manifestatio spiritus ad utilitatem. Quis est iste tam communis in vocibus, tam longe in rebus? quomodo quem nostris loquimur verbis, in sua reconditus majestate, nostros penitus & aspectus effugit, & affectus? Audi ipsum quid loquatur hominibus. *Sicut exaltantur celi à terra, sic exaltatae sunt viae meae à viis vestris, & cogitationes meae à cogitationibus vestris.* Dicimur amare, & Deus: dicimur nosse, & Deus: & multa in hunc modum. Sed Deus amat ut caritas, novit ut veritas, sedet ut æquitas, dominatur ut majestas, regit ut principium, tuetur ut salus, operatur ut virtus, revelat ut lux, assistit ut pietas. Quæ omnia faciunt & Angeli, facimus & nos: sed longe inferiori modo, non utique bono quod sumus, sed quod participamus.

1. Cor. 12.
7.

Isa. 55. 9.

Discrimen
inter actiones Dei,
Angelorum, & hominum.

CAPUT VI.

*Principii & essentiae rationem proprie
soli Deo convenire.*

13. **N**unc jam transi spiritus istos,
si forte cum sponsa dicere
possis & tu: *Paululum cum pertransissem
eos, inveni quem diligit anima mea.* Quis
est? Non sane occurrit melius, quàm
Qui est. Hoc ipse de se voluit responde-
ri, hoc docuit, dicente Moyse ad popu-
lum, ipso quidem injungente: *Qui est,
misit me ad vos.* Merito quidem. Nil
competentius æternitati, quæ Deus est.
Si bonum, si magnum, si beatum, si
sapientem, vel quicquid tale de Deo
dixeris, in hoc verbo instauratur,
quod est, *Est.* Nempe hoc est ei esse,
quod hæc omnia esse. Si & centum
talìa addas, non recessisti ab esse. Si
ea dixeris, nihil addidisti: si non di-
xeris, nihil minuísti. Jam si vidisti
hoc tam singulare, tam summum esse;

Cant. 3. 4.

*Deus quid
sit.*

Exod. 3. 14.

*1. Deus est
suum esse.*

nonne in comparatione hujus quicquid hoc non est, judicas potius non esse, quàm esse? Quid item Deus? Sine quo nihil est. Tam nihil esse sine ipso, quàm nec ipse sine se potest. Ipse sibi, ipse omnibus est. Ac per hoc quodam modo ipse solus est, qui suum ipsius est, & omnium esse. Quid est Deus? Principium. & hoc ipse de se responsum dedit. Multa in rebus dicuntur principia, sed respectu posteriorum. Alioquin si ad aliquid præcedens respicias, ipsum potius principium dabis. Quamobrem si quæras verum simplexque principium, invenias oportet quod principium non habuerit. Ex quo universum cœpit, ipsum profecto minime cœpit. Nam si cœpit, aliunde cœperit necesse est. A se enim cœpit nihil. Nisi forte quis putaverit, quod non erat, dare sibi potuisse, ut esse inciperet; aut fuisse aliquid, antequam esset. Quod utrumque quia ratio non consentit, constat nihil sibimet exstitisse principium.

2. Deus est esse omnium.

3. Deus solus Principium.

Johan. 8.

25.

Nihil sibi potest esse principium.

* *al. prin-*
cipium.

Quod vero aliud principium habuit, primum * non fuit. Verum ergo principium nequaquam cœpit, sed totum ab ipso cœpit.

4. Est æter-
nus.

14. Quid est Deus? cui sæcula nec accesserunt, nec decesserunt; nec coæterna tamen. Quid est Deus? *Ex*

Rom. II. 2.

5. Deus est
ex quo, per
quem, & in
quo sunt
omnia.

quo omnia, per quem omnia, in quo omnia. Ex quo omnia, creabiliter, non seminabiliter. Per quem omnia, ne alium auctorem atque alium opificem arbitreris. In quo omnia, non quasi in loco, sed quasi in virtute. Ex quo omnia, tamquam uno principio, auctore omnium. Per quem omnia, ne alterum inducatur principium artifex. In quo omnia, ne tertium inducatur, locus. Ex quo omnia, non de quo, quia non est materia Deus: efficiens causa est, non materialis. Frustra Philosophi materiam quærunt: non eguit materia Deus. Non enim officinam quæsivit, non artificem. Ipse per se, in se omnia fecit. Unde? De nihilo. nam si ex aliquo fecit, illud non fecit, ac per hoc

Materia
non eget.

nec omnia. Absit ut de sua incorrupta incorruptibilique substantia tam multa fecerit, etsi bona, corruptibilia tamen. Quæris si in ipso omnia, ipse ubi? Nihil minus invenio, quis capiat locus. Quæris ubi non sit? Nec hoc quidem dixerim. Quis sine Deo locus? Incomprehensibilis est Deus: sed non parum apprehendisti, si hoc tibi de eo compertum est, quod nusquam sit, qui non clauditur loco; & nusquam non sit, qui non excluditur loco. Suo autem illo sublimi atque incomprehensibili modo, sicut omnia in ipso, sic ipse in omnibus est. Denique (sicut ait Evangelista) *in mundo erat*. Alias vero, ubi erat antequam mundus fieret, ibi est. Non est quod quæras ultra ubi erat; præter ipsum nihil erat. Ergo in seipso erat.

6. Immen-
sus est.

Johan. I. 10.



CAPUT VII.

Deum & simplicem, & trinum esse.

7. Deus est
quo nil me-
lius.

Contra
quaternita-
tem Gil-
berti Por-
retani.

15. **Q**uid est Deus? Quo nihil me-
lius cogitari potest. Si ap-
probas, non oportet assentiaris esse
aliquid, quo Deus sit, & quod Deus
non sit. Hoc enim sine dubio me-
lius. Quomodo non melius Deo, si
Deus non est, quod dat Deo ut sit?
At melius illam divinitatem, qua di-
cunt Deum esse, non aliud quàm
Deum esse fatemur. Non est ergo in
Deo nisi Deus. Quid? inquiunt: ne-
gas Deum habere divinitatem? Non,
sed quod habet, hoc est. Negas di-
vinitate Deum esse? Non, sed non
alia, quam quæ ipse est. Aut si tu aliam
invenisti, adjuvet me Trinitas Deus,
adversus illam tota me contumacia
erigo. Quaternitas orbem determinat,
non signat deitatem. Deus Trinitas
est, Deus trium singula personarum.

Si quartam divinitatem adjicere placet; interim ego hanc, quæ Deus non est, persuasi mihi minime adorandam. Puto quod & tu. nempe *Domini-
num Deum tuum adorabis, & illi soli
servies.* Gloriosa vero divinitas, quæ sibi honorem non audeat arrogare divinum. At melius quartum hoc omnino respuimus, quam sine honore recipimus. Multa dicuntur esse in Deo, & quidem sane catholiceque, sed multa unum. Alioquin si diversa putemus, non quaternitatem habemus, sed centenitatem. Verbi causa, dicimus magnum, bonum, justum, & innumera talia: sed nisi omnia unum in Deo, & cum Deo confideres, habebis multiplicem Deum.

16. Mihi vero non deest quod cogitem melius ejusmodi Deo tuo. Quæris quid? Mera simplicitas. Vero iudicio, natura simplex multiplici antefertur. Scio quod ad hæc respondere solent. Non multa, inquiunt, sed unam tantum divinitatem, quæ om-

Luc. 4. 8.

In Deo
multa unū
sunt.

8. Simplex
est.

Perfectio-
nes omniū
rerum emi-
nenter in
Deo, non
divisim.

nia illa sunt, Deo ut sit conferre asse-
rimus. Asseritis ergo, etsi non multi-
plicem, duplicem Deum; & non ad
merum simplex pervenistis, neque ad
id, quo melius cogitari non potest.
Tam non est simplex, quod vel uni
fuerit obnoxium formæ, quàm nec
virgo vel uni cognita viro. Securus
loquor, ne is quidem qui vel du-
plex est, erit meus. Habeo enim me-
liorem. Esto quod hunc numerofo &
multiplici anteponam: sed plane præ
simplici sperno. Meus Deus ipse ca-
tholice est. Tam non habet hoc &
illud, quàm non hæc & illa. Est qui
est, non quæ est. Purus, simplex,
integer, perfectus, constans sibi; nihil
de temporibus, nihil de locis, nihil
de rebus trahens in se, nihil ex se
deponens in eis; non habens quod
ad numerum dividat, non quæ colli-
gat ad unum. Unum quippe est, sed
non unitum. Non partibus constat,
ut corpus; non affectibus distat, ut
anima: non formis substat, ut omne

quod factum est ; sed neque formæ, ut istis visum est. Magna laus videlicet Deo , ut se ab informitate vindicet, forma una esse contentum. Hoc est dicere , cetera pluribus , Deum non nisi uni debere quod est. Quid ? Cujus beneficio sunt quæ sunt , ipse pro suo esse alteri benefico inclinabit ? Laus ista (ut vulgo dicitur) blasphemiam valet. Annon pluris est nullo indigere, quàm uno ? Habe reverentiam Deo, ut quod pluris est , illi tribuas. Si cor tuum usque huc ascendere potuit , Deum tuum infra quomodo colloca- bis ? Ipse sibi forma , ipse sibi essentia est. In hoc interim gradu suspicio illum : & , si alter potior appareret , illum potius darem. Numquid verendum , ne cogitatio transvolet illum ? Quantumcumque in altum proficiat, ultra est. Infra quod homo cogitare possit, altissimum quærere, ridiculum est ; statuere , impium. Ultra, non citra quærendus est.

De Deo
semper op-
timum sen-
tiendum.

17. Ascende adhuc , si potes , ad cor

Eo sim-
plex, quo
unus.

altius, & exaltabitur Deus. Non est
formatus Deus: forma est. Non est
affectus Deus: affectio est. Non est
compositus Deus: merum simplex
est. Et ut liquido noveris, quid sim-
plex dicam: idem quod unum. Tam
simplex Deus, quàm unus est. Est
autem unus, & quo modo aliud nihil.
Si dici possit, unissimus est. Unus est
sol, quod non sit alter: una luna,
quod æque altera non sit. Atque id
quidem Deus, sed plus. Quid plus?
Unus est etiam sibi. Et hoc vis tibi
declarari? Idem est semper, & uno
modo. Non sic unus sol, non sic una
luna. Clamat uterque non esse unum
sibi; ille motibus, illa & defectibus
suis. Deus autem non modo unus sibi:
& in se unus est. Nihil in se nisi se
habet. Non ex tempore alterationem
habet, non in substantia alteritatem.

9. Deus
unus sibi &
in se.

Boëtius.

» Hinc de eo Boëtius: Hoc vere unum,
» in quo nullus est numerus, nullum in
» eo aliud præter id quod est. Neque
» enim subjectum fieri potest: forma

enim est. Compara huic uni omne
quod unum dici potest; & unum non
erit. Trinitas est tamen Deus. Quid er-
go? Destruimus quod dictum est de
unitate, quia inducimus trinitatem?
Non; sed statuimus unitatem. Dici-
mus Patrem, dicimus Filium, dicimus
Spiritus-sanctum; non tamen tres
Deos, sed unum. Quid sibi vult iste (ut
sic loquar) absque numero numerus? Si
tria, quomodo non numerus? si unum,
ubi numerus? Sed habeo, inquis, quid
numerem, & quid non numerem.
Substantia una est: personæ tres sunt.
Quid mirum? quid vel obscurum in
hoc? Nihil, si personæ seorsum à sub-
stantia cogitentur. Nunc vero cum
tres illæ personæ illa substantia sint,
& illa una substantia tres illæ personæ;
quis numerum neget? Nam veræ tres
sunt. Quis numeret tamen? Nam vere
unum sunt. Aut si tu facile explicatu
id putas, dicendo tres, dicito quid
numeraſti? Naturas? Una est. Essen-
tias? Una est. Substantias? Una est.

10. Deus
Trinitas.

Deus quo-
modo tri-
nus & unus.

Deitates ? Una est. Non hæc , sed personas numero , inquis , quæ non sint illa una natura , illa una essentia , illa una substantia , illa una divinitas. Catholicus es : minime hoc dabis.

CAPUT VIII.

Personarum pluralitatem in Deo consurgere ex proprietatibus ; essentiam tamen unam & simplicem esse.

18. **P**ersonarum proprietates non aliud quàm personas ; ipsasque non aliud quàm unum Deum , unam divinam substantiam , unam divinam naturam , unam divinam & summam maiestatem , Fides catholica confitetur. Numera ergo , si potes , aut sine substantia personas , quæ ipsa sunt ; aut sine personis proprietates , quæ ipsæ sunt. Aut si dividere quis conetur vel personas à substantia , vel proprietates à personis ; nescio quomodo Trinitatis se profiteri cultorem

possit, qui in tantam rerum numero-
sitatem excesserit. Dicamus itaque
tres, sed non ad præjudicium Unitatis : dicamus unum, sed non ad confusionem Trinitatis. Neque enim nomina vacua sunt, nec absque significantia cassæ voces. Quærit quis quomodo * illud, quod catholicum esse dicimus, possit esse ? sufficiat ei tenere sic esse. Atque hoc non rationi perspicuum, nec tamen opinioni ambiguum, sed fidei persuasum. Sacramentum hoc magnum est, & quidem venerandum, non scrutandum. Quomodo pluralitas in unitate, & hac unitate, aut ipsa in pluralitate ? SCRUTARI hoc temeritas est, credere pietas est, nosse vita, & vita æterna est. Unde si operæ præ-
Trinitatis
mysterium
sola fide
compre-
henditur.
* al. quomodo hoc
possit esse.
tium censes, ô Eugeni, percurrat
Unitatis
novem mo-
di.
nunc consideratio multa Una, quo
eminentia hujus singularis Unius fiat
evidentior. Est unitas, quæ collectiva
potest dici, cum verbi causa multi
lapides faciunt acervum unum. Est &

unitas constitutiva, cum multa membra unum corpus, vel multæ partes unumquodcumque totum constituunt. Est & conjugativa, qua fit ut duo jam non duo sint, sed una caro. Et est nativa, qua anima & caro unus nascitur homo. Est unitas potestativa, qua homo virtutis non instabilis, non dissimilis, sed unus sibimet semper nititur inveniri. Est consentanea, cum per caritatem multorum hominum est cor unum, & anima una. Est & votiva, cum anima votis omnibus adhærens Deo, unus spiritus est. Et est dignativa unitas, qua limus noster à Dei Verbo in unam assumptus est personam.

19. Verum hæc omnia quid ad illud summum, atque (ut ita dicam) unice Unum, ubi unitatem consubstantialitas facit? Huic Uni quodvis illorum si assimiles, erit quoquo modo unum: si compares, nullo. Igitur inter omnia quæ recte unum dicuntur, arcem tenet Unitas Trinitatis, qua
tres

tres personæ una substantia sunt. Secundo loco illa præcellit, qua è converso tres substantiæ una in Christo persona sunt. Porro hæc & quæcumque alia dici una possunt, summæ illius unitatis imitatione, non comparatione, Una appellari vera sobriaque probat consideratio. Nec abducimur ab hac unitatis professione assertione Trium: cum in hac Trinitate non recipiamus multiplicitem, sicut nec solitudinem in unitate. Quamobrem cum dico Unum, non me Trinitatis turbat numerus, qui essentiam non multiplicat, non variat, nec partitur. Rursum cum dico Tria, non me arguit intuitus unitatis, quæ illa quæcumque tria, seu illos tres, nec in confusionem cogit, nec in singularitatem redigit.

Super omnes unitas
Trinitatis,
tum Christi.



CAPUT IX.

Uti in Deo simplex natura est in tribus personis, sic contra in Christo plures naturas in unam personam coalescere.

In Christo
tres essen-
tiæ, per-
sonæ uni-
tas.

20. **I**dem me sentire fateor & de illa unitate, cui secundum ab ista inter cetera Una honorem dedi. Dico in Christo Verbum, animam, & carnem, sine confusione essentiarum unam esse personam, & item absque præjudicio personalis unitatis in sua numerositate manere. Nec negaverim hanc ad illud quoque genus unitatis pertinere, qua anima & caro unus est homo. Decuit quippe familiarius similiusque cum hominis convenire constitutione, quod pro homine constitutum est sacramentum. Decuit & cum summa, quæ in Deo est & Deus est, unitate congruere, ut quomodo ibi tres personæ una essentia; ita hic convenientissima quadam

contrarietate tres essentiae sint una persona. Videsne pulcre inter utramque unitatem hanc collocari ; in eoque utique qui constitutus est mediator Dei hominisque, homo Christus Jesus? Pulcherrima, inquam, convenientia, ut salutare sacramentum congrua quadam similitudine ambobus respondeat, & salvanti videlicet & salvato. Ita hæc unitas duarum consistens media unitatum, alteri succumbere, alteri præeminere cognoscitur, quantum superiore inferior, tantum inferiore superior.

Media inter divinam & humanam.

21. Tantam denique, tamque expressam unionis vim in se præfert ea persona, in qua Deus & homo unus est Christus : ut si duo illa de se invicem prædices, non erraveris, Deum videlicet hominem, & hominem Deum vere catholiceque pronuntians. Non autem similiter vel carnem de anima, vel animam de carne, nisi absurdissime, prædicas, etsi similiter anima & caro unus sit homo. Nec

Communicatio idiomatum in Christo.

mirum, si non æque potis anima sit sua illa vitali, etsi non parum valida intentione connectere, atque suis affectibus adstringere sibi carnem, ut sibi divinitas hominem illum, qui prædestinatus est filius Dei in virtute. Longa catena & fortis ad stringendum, divina prædestinatio: ab æterno est enim. Quid longius æternitate? Quid divinitate potentius? Inde est quod nec morte incidente ullatenus intercîdi hæc unitas potuit, etsi carne & anima ab invicem separatis. Et fortassis hoc sensit ille, qui se indignum professus est solvere corrigiam calceamenti hujus*.

Mar. 1. 7.

* al. ejus.

C A P U T X.

Parabola, quæ est apud Matthæum de tribus satis, Christi personæ accommodatur.

Matth. 13.

33.

Luc. 13.

21.

22. **S**ed & illa tria fata de Evangelio, mixta & fermentata

in panem unum, si quis ad hæc tria dixerit pertinere, non incongrue id mihi facere videbitur. Quàm bene ea mulier fermentavit, ut nec divisione quidem facta carnis & animæ, à carne vel anima Verbum divideretur! Mansit & in separatione inseparabilis unitas. Nec enim quæ ex parte contigit separatio, potuit unitati præscribere, permanenti in totis tribus. Sive conjunctis, sive disjunctis duobus, nihilo minus perseveravit in tribus unitas personalis. Æque unus Christus unaque persona, Verbum, anima, & caro, etiam mortuo homine perduravit. In utero Virginis (ut sentio ego) commixtio hæc & fermentatio facta est : & ipsa mulier quæ miscuit, & fermentavit. Nam fermentum non immerito fortasse dixerim fidem Mariæ. Plane beata, quæ credidit, quoniam perfecta sunt in ea, quæ dicta sunt ei à Domino. Perfecta autem non essent, si quo minus juxta verbum Domini esset fermentatum totum, &

Verbum in triduo mortis non fuit separatum à corpore & anima.

Luc. 1. 45.

perpetuo fermentatum, servans nobis
tam in morte, quam in vita pariter
unum atque integrum mediatorem
Dei & hominum cum sua deitate, ho-
minem Christum Jesum.

In myste-
rio Incar-
nationis
novum,
antiquum,
æternum.

23. Advertere est in hoc admirabili
sacramento juxta numerum satorum,
miræ & decentissimæ distinctionis gra-
dus, novum, antiquum, æternum.
Novum, animam, quæ de nihilo
tunc creata creditur, cum infusa: an-
tiquum, carnem, quæ à primo usque
hominum, id est ex Adam, traducta
cognoscitur: æternum, Verbum, quod
ab æterno Patre coæternum illi geni-
tum indubitata veritate asseritur. Et
in his triplex (si diligenter advertas)
divinæ potentiæ genus: quod factum
sit de nihilo aliquid, de vetusto no-
vum, æternum beatumque de dam-
nato & mortuo. Quid hoc ad no-
stram salutem? Multum per omnem
modum. Primum quidem, quod pec-
cato redacti in nihilum, per hoc quo-
dam modo iterato creati sumus, ut

Quid illud
ad nostram
salutem.

sumus initium aliquod creaturæ ejus.
 Deinde quod ex vetusta servitute in
 libertatem filiorum Dei translati, in
 novitate spiritus ambulantes. Postre-
 mo, quod de potestate tenebrarum
 vocati ad regnum claritatis æternæ, in
 quo jam & confedere nos fecit in
 Christo. Alieni sint à nobis, qui Christi
 à nobis carnem alienare conantur,
 novam creatam in Virgine, & non
 de Virgine sumptam, impie asseren-
 tes. Pulcre propheticus spiritus longe
 ante occurrit huic sententiæ, immo
 blasphemiam impiorum: *Egredietur*, Isa. II. 12
inquit, virga de radice Jesse, & flos
de radice ejus ascendet. Dixisse poterat,
 & flos de virga, sed maluit, *de radice*:
 ut unde virgam, inde florem duxisse
 originem demonstraret. Inde igitur
 sumpta caro, unde orta Virgo: nec
 nova in Virgine, quæ prodiit ex radice.

Hæreti-
 corum er-
 ror.



CAPUT XI.

Continuatio considerationis de Deo.

Numquam
Deus fru-
stra quæ-
ritur.

Thren. 3.
25.

Deus quid.

24. **F**Orte substomacharis, si adhuc pergimus quærere, quid est Deus? tum quia toties jam quæsitum est, tum quia diffidis inventum iri. Dico tibi, Pater Eugeni, solus est Deus, qui frustra numquam quæri potest, nec cum inveniri non potest. Doceat te de hoc experimentum tuum; aut si non, experto credito, non mihi, sed sancto, qui ait: *Bonus es, Domine, sperantibus in te, animæ quærenti te.* Quid ergo est Deus? Quod ad universum spectat, finis: quod ad electionem, salus: quod ad se, ipse novit. Quid est Deus? Voluntas omnipotens, benevolentissima virtus, lumen æternum, incommutabilis ratio, summa beatitudo; creans mentes ad se participandum, vivificans ad sentiendum, afficiens ad appetendum,

dilatans ad capiendum , justificans
ad promerendum ; accendens ad ze-
lum , fœcundans ad fructum , diri-
gens ad æquitatem , formans ad be-
nevolentiam , moderans ad sapien-
tiam , roborans ad virtutem , visitans
ad consolationem , illuminans ad co-
gnitionem , perpetuans ad immorta-
litate[m] , implens ad felicitatem , cir-
cumdans ad securitatem.

CAPUT XII.

*Deum & bonorum operum pium remu-
neratorem , & scelerum æquissimum
vindicem esse.*

25. **Q**uid est Deus ? Non minus Deus pœ-
na perverso-
rum. poena perversorum , quàm
humilium gloria. Est enim rationa-
bilis quædam æquitatis directio incon-
vertibilis atque indeclinabilis , quippe
attingens ubique : cui illisa omnis pra-
vitas conturbetur necesse est. Quidni
in hanc omne tumidum , vel distor-

tum impingat, & conquassetur? Væ universo, quod obvium forte offenderit cedere nescia rectitudo. nam & fortitudo est. Quid iniquis voluntatibus tam contrarium & adversum, quàm semper conari, impingere semper, & frustra *? Væ oppositis voluntatibus, solam suæ profecto aversionis referentibus pœnam. Quid tam pœnale, quàm semper velle quod numquam erit? Quid tam damnatum, quàm voluntas addicta huic necessitati volendi nolendique, ut ad utrumlibet jam, sicut non nisi perverse, ita non nisi misere moveatur? In æternum non obtinebit quod vult; & quod non vult, in æternum nihilo minus sustinebit. Digne omnino, ut qui ad nihil afficitur umquam quod deceat, ad nil umquam quod libeat, evadat. Quis hoc facit? Rectus Dominus Deus noster, qui & cum perverso pervertitur. Numquam recto pravoque conveniet. Hæc enim sibi invicem adversantur, etsi non invicem lædant. Læ-

* *al. frustra.*

Damnatorum voluntas Deo opposita.

V. Opusc. 9. num. 31.

fio alterius est : absit ut Dei. *Durum tibi est*, inquit, *contra stimulum calci- trare* ; hoc est, non stimulo durum, sed calcitranti. Est & turpium pœna Deus : Lux est enim. Et quid tam in- visum obscœnis flagitiosisque menti- bus ? Profecto *omnis qui male agit, odit lucem*. Sed dico : numquid non pote- runt declinare ? Minime omnino. Lu- cet ubique, etsi non omnibus. Deni- que in tenebris lucet, & tenebræ eam non comprehendunt. Videt tenebras Lux, cui hoc est videre, quod lucere : sed non vicissim à tenebris ipsa vide- tur, quia tenebræ eam non compre- hendunt. Et videntur ergo, ut con- fundantur ; & non vident, ne con- solentur. Nec modo à luce : & in luce videntur. A quo, vel quibus ? Ab omni vidente, ut pro multitudine in- tuentium sit confusio multa. At nul- lus de tanta numerositate spectantium molestior oculus suo cujusque. Non est aspectus, sive in cælo, sive in ter- ra, quem tenebrosa conscientia suffu-

Act. 9. 5.

Deus tur-
pium pœ-
na.Johan. 3.
20.

Johan. 1. 5.

Qualis cis
lux.Malæ con-
scientiæ
tormen-
tum.

gere magis velit, minus possit. Non latent tenebræ vel seipsas. Se vident quæ aliud non vident. Opera tenebrarum sequuntur illas, nec est quo se abscondant ab illis, ne in tenebris quidem. Hic est vermis qui non moritur, memoria præteritorum. Semel injectus, vel potius innatus per peccatum, hæsit firmiter, nequaquam deinceps avellendus. Nec cessat rodere conscientiam, eaque pastus, esca utique inconsumptibili, perpetuat vitam. Horreo vermem mordacem, & mortem vivacem. Horreo incidere in manus mortis viventis, & vitæ morientis.

Vermis immortalis.

26. Hæc secunda mors, quæ numquam peroccidit, sed semper occidit. Quis det illis semel mori, ut non moriantur in æternum? Qui dicunt montibus, *Cadite super nos, & collibus, operite nos*, quid nisi mortem mortis beneficio aut finire, aut evadere volunt? Denique, *invocabunt mortem*, ait, *& non veniet*. Intuere id clarius.

Luc. 23.
30.

Apoc. 9. 6.

Constat immortalem animam esse, nec aliquando absque sua memoria vivere, ne non animam aliquando esse contingat. Itaque durante anima, durat & memoria. Sed qualis? Fœda flagitiis, horrida facinoribus, vanitate tumida, contemptu hispida & neglecta. Quæ priora, transierunt, & non transierunt. Transierunt à manu, sed non à mente. Quod factum est, factum non esse non potest. Proinde etsi facere in tempore fuit; sed fecisse in sempiternum manet. Non transit cum tempore, quod tempora transit. In æternum ergo necesse est cruciet, quod perperam te egisse in æternum memineris. Experiri erit hoc veritatem vocis illius: *Arguam te, et statuam contra faciem tuam.* Dominus locutus est, cui omne adversum & sibi adversari necesse est, ut sit sera querela: *O custos hominum, quare posuisti me contrarium tibi, & factus sum mihi metipsi gravis?* Ita est, ô Eugeni. **N O N P O T E S T** Deo esse contrarium quid,

Peccati
commissi
voluptas
transit,
fœditas
manet.

Psal. 49.
21.

Job 7.20.

Deo con-
trarius, fi-
bimet non
cohæret.

Turpibus
nihil de-
erit ad con-
fusionem.

* *al.* oppo-
siti.

Jerem. 17.
18.

& sibi met cohærere : sed qui argue-
tur à Deo , arguetur & à seipso. Non
est sane jam tunc quod aut veritatem
dissimulet ratio , aut rationis intuitum
anima declinet , membris avulsa cor-
poreis , & in sese collecta. Quo enim
id valeat, sopitis conclusisque in morte
sensibus , per quos utique curiosius
exire , & à se ire solebat in eam , quæ
præterit , mundi istius figuram ? Vides
turpibus nihil deesse ad confusionem,
cum producentur spectaculum fieri
Deo , Angelis , hominibus , sibi ipsis ?
O quàm male mali omnes locati sunt,
utique oppositi torrenti huic directæ
æquitatis , & huic lumini propalatæ ve-
ritatis * expositi. Nonne hoc est per-
petuo tundi , perpetuoque confundi ?
Duplici contritione , ait ille , *contere eos,*
Domine Deus noster.



C A P U T X I I I.

De longitudine , latitudine , profunditate , & sublimitate Dei profunde & eleganter differit.

27. **Q**uid est Deus ? Longitudo, latitudo, sublimitas, & profundum. Quid ? inquis. Tenemus te quaternitatis, quam abominatus es, professorem. Minime. Abominatus sum, & abominor. Visus sum protulisse plura, sed unum est. Unus Deus signatus est pro captu nostro, non pro suo statu. Divisus est hic, non ille. Voces diversæ, semitæ multæ : sed unum per eas significatur, unus quaeritur. Non divisiones substantiæ in quaternario isto expressæ sunt ; non dimensiones, quales in corporibus intuemur ; non distinctio personalis, qualem in Trinitate adoramus ; non numerus proprietatum, qualem personis ipsis inesse fatemur, etsi non

Intellectus
noster in
visione bea-
ta totus
feretur in
Deum sine
discursu.

Psal. 26. 3.

aliud à personis. Alioquin hoc singu-
lum horum in Deo, quod quatuor si-
mul; hoc quatuor ipsa, quod singu-
lum est. Nobis autem, quia non pos-
sumus cum Deo simplicitate conten-
dere, dum contendimus apprehen-
dere unum, occurrit veluti quadru-
plicatum. Facit hoc speculum & ænig-
ma, per quod solum interim videri
datur. Cum autem videbimus facie
ad faciem, videbimus sicuti est. Nec
enim jam tunc fragilis acies mentis
nostræ, quantumlibet vehementer in-
tendens, aliquatenus resiliet, diffi-
lietve in suam pluralitatem. Colliget
se se magis, adunabit, conformabit
que unitati illius, vel potius unitati
illi, ut una uni facies respondeat fa-
ciei. Nempe *similes ei erimus, quia vi-
debimus eum sicuti est*. Beata visio! ad
quam merito suspirabat, qui ait: *Ex-
quisivit te facies mea; faciem tuam,
Domine, requiram*. Et quia adhuc in
quærendo res est, interim ascenda-
mus quadrigam istam, utpote infirmi
&

& imbecilles, indigentes tali vehiculo, si forte vel sic apprehendamus, in quo apprehensi sumus, id est, hujus ipsius vehiculi rationem. Nam hoc monitum habemus ab ipso auriga & primo currus hujus exhibitore, ut studeamus *comprehendere cum omnibus* Ephes. 3. 18. *sanctis, quæ sit longitudo, latitudo, sublimitas, & profundum.* Comprehendere dixit, non cognoscere: ut non curiositate contenti scientiæ, tota cura fructui inhiemus. Non in cognitione est fructus, sed in comprehensione. Alioquin *scienti bonum, & non facienti,* 1ac. 4. 17. ut ait quidam, *peccatum est ei.* & ipse Paulus alio loco: *Sic currite,* 1. Cor. 9. 24. *inquit, ut comprehendatis.* Quid sit comprehendere, inferius declarabo.

28. Quid igitur est Deus? Longitudo, inquam. Quid ipsa? Æternitas. Hæc tam longa, ut non habeat terminum, non magis loci, quàm temporis. Est & latitudo. Et ipsa quid? Caritas. Quibus & ista terminis an-

Longitudo
est æterni-
tas Dei,
latitudo
caritas.

Math. 5.
45.

Ephes. 3.19.

gustetur in Deo, qui nihil odit eorum quæ fecerit? Denique solem suum oriri facit super bonos & malos, pluit super justos & injustos. Ergo & inimicos concludit sinus ille. Nec hoc quoque contentus, evadit in infinitum. Omnem non modo affectionem, sed & cognitionem excedit, adjiciente Apostolo & dicente : *Scire etiam supereminentem scientiæ caritatem Christi.* Quid plus dicam? Æterna est. Nisi quod hoc plus forsitan est, quia æternitas est. Vides tantam esse latitudinem, quantam & longitudinem? Utinam sic videas non tantam esse, sed ipsam : id esse unam quod alteram ; non minus unam quàm duas, nec plus duas quàm unam. Deus æternitas, Deus caritas est : longitudo sine protensione, latitudo sine distensione. In utroque pariter locales quidem excedit temporalesque angustias, sed libertate naturæ, non enormitate substantiæ. Tali modo immensus est qui

omnia fecit in mensura ; & quamvis immensus , hic tamen modus & ipsius immensitatis.

29. Quid item Deus ? Sublimitas & profundum. In altero supra omnia, in altero infra omnia. Liquet in deitate nusquam claudicare æqualitatem; stare eam undique firmiter , constare immobiliter sibi. Sublime , potentiam ; profundum , sapientiam ejus * considera. Ex æquo & ista respondent sibi , dum & sublimitas inattingibilis, & profunditas æque inscrutabilis cognoscatur , Paulo admirante & exclamante : *O altitudo divitiarum sapientiae & scientiae Dei , quam inscrutabilia sunt judicia ejus , & investigabiles viæ illius !* Libet & nos exclamare cum Paulo , horum utcumque intuentes in Deo , & cum Deo simplicissimam unitatem : O sapientia potens , attingens ubique fortiter ! ô potentia sapiens , disponens omnia suaviter ! Res una, effectus multiplex , operationesque diversæ. Et illa una res est longitudo

* *al. esse.*
Sublimitas
Dei poten-
tia est, pro-
fundum
sapientia.

Rom. II. 33.

Sap. 8. 1.

propter æternitatem , latitudo propter caritatem , sublimitas propter maiestatem , profunditas propter sapientiam.

C A P U T X I V.

Modum , quo prædicta secundum Apostolum comprehendere possimus , ostendit.

30. **N**ovimus hæc. Num ideo & arbitramur nos comprehendisse ? **N O N** EA disputatio comprehendit , sed sanctitas. si quo modo tamen comprehendendi potest quod incomprehensibile est. At nisi posset , non dixisset Apostolus : *Ut comprehendamus cum omnibus sanctis.* Sancti igitur comprehendunt. Quæris quomodo ? Si sanctus es , comprehendisti , & nosti : si non ; esto , & tuo experimento scies. **S A N C T U M** facit affectio sancta , & ipsa gemina : timor Domini sanctus , & sanctus amor. His

*Ephes. 3.
18,*

Sanctum
faciunt
sanctus ti-
mor , &
amor.

perfecte affecta anima, veluti quibusdam duobus brachiis suis comprehendit, amplectitur, stringit, tenet, & ait: *Tenui eum, nec dimittam.* Et timor quidem sublimi & profundo, amor lato & longo respondet. Quid tam timendum quàm potestas, cui non potes resistere; quàm sapientia, cui abscondi non potes? Poterat minus timeri Deus, alterutro carens. Nunc autem perfecte oportet timeas illum, cui nec oculus deest omnia videntis, nec manus potens omnia. Quid item tam amabile, quàm amor ipse, quo amas, & quo amaris? Amabilior tamen juncta æternitas facit: quæ dum non excidit, foras mittit suspicionem. Ama igitur perseveranter & longanimiter, & habes longitudinem: dilata amorem tuum usque ad inimicos, & latitudinem tenes. Esto etiam in omni sollicitudine timoratus, & sublime profundumque apprehendisti.

31. Aut si mavis quatuor æque tuis,

Cant. 3. 4.

Eorum
motiva in
Deo.

Animi affectus in Deum.

divinis quatuor respondere ; facis hoc, si stupes , si paves , si ferves , si sustines. Stupenda plane sublimitas majestatis : pavenda abyssus judiciorum. Fervorem exigit caritas , æternitas perseverantiam sustinendi. Quis stupet , nisi qui contemplatur gloriam Dei ? Quis pavet , nisi qui scrutatur profundum sapientiæ ? Quis fervet , nisi qui meditatur caritatem Dei ? Quis sustinet & perseverat in amore , nisi qui æmulatur æternitatem caritatis ? Nempe æternitatis quamdam imaginem perseverantia præfert. Denique sola est cui æternitas redditur, vel potius quæ æternitati hominem reddit, dicente Domino : *Qui perseveraverit usque in finem , hic salvus erit.*

Matth. 10.
22.

Contemplationis quatuor species.

32. Et nunc adverte in quatuor istis contemplationis species quatuor. Prima & maxima contemplatio est admiratio majestatis. Hæc requirit cor purgatum, ut à vitiis liberum , atque exoneratum peccatis , facile ad superna levet : interdum quoque vel

per aliquas morulas stupore & ecstasi
suspensum teneat admirantem. Se-
cunda autem necessaria est huic ; est
enim intuens judicia Dei. Quo sane
pavido aspectu , dum vehementius
concutit intuentem , fugat vitia , fun-
dat virtutes ; initiat ad sapientiam ,
humilitatem servat. Virtutum liqui-
dem bonum quoddam ac stabile fun-
damentum , humilitas. Nempe si nu-
tet illa , virtutum aggregatio nonnisi
ruina est. Tertia contemplatio occu-
patur , vel potius otatur circa memo-
riam beneficiorum ; & ne dimittat
ingratum , sollicitat memorantem ad
amorem benefactoris. De talibus di-
cit Propheta loquens ad Dominum :
Memoriam abundantiae suavitatis tuae ^{Psalm. 144.}
eructabunt. ^{7.} Quarta quæ retro sunt obli-
viscens , in sola requiescit expecta-
tione promissorum : quæ cum sit me-
ditatio æternitatis (siquidem quæ pro-
mittuntur , æterna sunt) longanimita-
tem alit , & perseverantiæ dat vigorem.
Puto jam facile est quatuor nostra hæc,

quatuor illis Apostoli assignare, dum
 longitudinem comprehendit medita-
 tio promissorum, latitudinem recor-
 datio beneficiorum, sublimitatem
 contemplatio maiestatis, profundum
 inspectio iudiciorum. Quærendus ad-
 huc fuerat, qui nec satis adhuc in-
 ventus est, nec quæri nimis potest:
 at orando forte quàm disputando dig-
 nius quæritur, & invenitur facilius.
 Proinde is sit finis Libri, sed non finis
 quærendi.



BREVES NOTÆ
IN QUINQUE LIBROS
DE CONSIDERATIONE.
IN LIBRUM PRIMUM.

IN PROLOGO, pag. 2. lin. II. *agnoscit filium & in infulis*. Infularum nomine non tantum mitram, sed universim pontificalia insignia Bernardus intelligit. De his inferius ad librum IV. num. 6.

IN CAP. I. pag. 5. lin. 6. *Invitus avelleris à tuæ Rachelis amplexibus*. Et id graviter ferebat Gregorius Magnus ex epistolis & prologo in dialogos. Hadriano etiam quarto quam gravis & molestus fuerit pontificatus, testis est Johannes Saresburiensis in Polycratici lib. 8. cap. 23.

IN CAP. III. pag. 12. lin. 6. *offendunt suos*, id est inveniunt: quod glossema in quibusdam codicibus, etiam scriptis, inductum in textum.

IN CAP. IV. pag. 13. lin. ult. *Leges Justiniani, non Domini*. Hic non culpantur absolute Justiniani leges, sed earum abusus: cum vel eis utuntur ecclesiastici, non ad finiendas, sed ad ferendas lites; vel eas præferunt legibus divinis. Hinc Bernardus merito indignatur, *silere illam, garrere istas*. Confer caput x.

IN CAP. VI. pag. 19. lin. 3. *ignorans primatum*. Ita scripti, præterquam in quodam codice Vaticano, in quo legitur, *personatum*; quem Vossius hic & in consequentibus secutus est, ubi eadem vox occurrit. Ibid. lin. 13. *erit illud*, nempe ut sedeant judicantes,

juxta illud Matthæi xix. 28. *Sedebitis & vos &c.*
 IN CAP. IX. pag. 30. lin. 4. *Quid tamen, si te*
&c. Aliis alia est interpunctio, *Quid tamen? Si*
te philosophiæ huic totum repente devoveris, præde-
cessores tui, &c. Quidam habent, *Quid tum?*

IN LIBRUM SECUNDUM.

IN CAP. I. pag. 37. lin. 13. *tempus grave.* Scili-
 cet cum homines hujus sæculi conquerebantur
 de infelici eventu sacre expeditionis, Bernardo
 hortante anno MCXLVI. susceptæ, quæ post tres
 annos infeliciter cessit.

Ibid. pag. 38. lin. 5. *Effusa est contentio.* Locus de-
 sumtus ex vitiosa lectione versus 40. psalmi CVI.
 ubi Bernardi tempore legebatur *contentio*, ut
 apud Willelmum Tyrensem lib. 16. cap. 21. pro
 eo quod genuina lectio habet, *contemptio*, in græco
 ἐξέδωκεν.

Ibid. pag. 42. lin. 1. *Parcendum verecundiæ meæ.*
 Scilicet non sustinet prædicare miracula, quibus
 Deus approbavit ejus prædicationem & hortatio-
 nes ad expeditionem sacram, de quibus in lib. 4.
 de ejus vita cap. 5. & seqq. vide sis epistolam 242.
 ad Tolosanos.

IN CAP. VIII. p. 64. lin. 13. *Tibi universi crediti,*
uni unus. Magis arridet hæc lectio, quam Vossia-
 na: *Tibi universos credidit uni unus.*

IN CAP. XIII. pag. 77. lin. 12. *Inter seculares*
nugæ &c. Ejusmodi sales, facetias, dicacitates,
 tamquam inanium verborum pestes, reprobat
 etiam Petrus Damiani ante Bernardum, qui eas
 censet ferendas aliquando, referendas numquam.
 Eodem spectat Gregorius Magnus homilia xi. in
 Ezechielem. Ambrosius ante hos omnes, *licet*
interdum honesta joca, inquit, ac suavia sint, ta-
men ab ecclesiastica abhorrent regula, lib. 1. de
 officiis cap. 4.

IN CAP. XV. pag. 78. lin. 16. *fatigem intuitum*.
Vossius notat in quibusdam legi *animum*. at Bernardus *intuitum* scripsit, id est considerationem, qui titulus operis est.

IN LIBRUM III.

IN Cap. I. pag. 86. lin. 7. *Parvulos ecclesia... deglutire festinent*. Id intelligendum de Henricianis, qui parvulos à baptismo excludebant, de quibus in epistola 61. & in sermonibus 65. & 66. super Cantica. Terra Austri videtur dici Hispania, ex qua qui revertebantur in Italiam Romani, transibant per agrum Tolosatensem, ubi tum Henriciani maxime grassabantur. Dicta *terra austri* Hispania, quod quodam modo Gallia australis sit, aut certe allusione facta ad terram austri, ex qua regina Saba cum thesauris processit ad invisendum Salomonem.

IN CAP. II. pag. 89. lin. 13. *non refugiant*, id est non confugiant. quo sensu verbum *refugere* familiare est apud probos etiam auctores. Hinc vox *refugium*.

Ibid. pag. 90. lin. 16. *quo voluit proximum*, supple *ledere*, quod alii temere in textu addunt.

Ibid. pag. 94. lin. 17. *nec usurpandas omnino*, id est, vitio captandas, aut admittendas.

Ibid. pag. 97. lin. 9. *Defuncto sancto episcopo*. Scilicet Hugone, qui ex abbate Pontiniacensi creatus fuerat episcopus Autisiodorensis: post cujus mortem, quæ anno MCLII. accidit, gravis contentio de eligendo successore orta est, qua de re legendæ Bernardi epistolæ 276. 277. & 280.

IN CAP. III. pag. 100. lin. 21. *Summarii*, alii *Saumarii*, rectius *Sagmarii*, à græco *σάγμα*, id est equi clitellarii seu farcinarii, gallis *Sommiers*, unde formatum *Summarii*.

Ibid. pag. 101. lin. 3. *Unus Moguntinus, Coloniensis*

alter. Henricus scilicet Moguntinus, eo nomine primus, Arnoldus Coloniensis: hic simoniæ accusatus, ille violatæ castitatis. In utrumque sententia depositionis lata. Moguntinus, in cuius gratiam Bernardus epistolam 202. scripsit, purgatus & absolutus: Coloniensis, etsi plurima pro sua absolutione obtulisset, indulgentiam impetrare non potuit.

Ibid. lin. 13. *ille de transmarinis partibus.* Forte Willelmus, intrusus in sedem Eboracensem, de quo Bernardi epistolæ 235. & 238. & seqq. His adde quæ de Eugenio III. refert Johannes Saresberiensis in Polycratici lib. 5. cap. 5. ubi Eugenius laudatur, quod *nullum omnino munus hominis litigantis recipiebat, aut cui credebat litteram imminere.*

I N L I B R U M I V.

IN C A P. II. pag. 125. lin. 16. *utrique iniecere manus*, id est terræ & cælo, quod mox explicat. Hæ turbæ contigere incentore Arnaldo hæretico, qui Romanis auctor fuit, ut Romæ antiquum reip. statum restituere molirentur, unica sacrorum cura Pontifici relicta. quam ob rem Eugenius ex Urbe migrare coactus fuit. Hæc fuse in Bernardi epistola 243. & apud Baronium.

IN C A P. III. pag. 129. lin. 5. *vectus equo albo.* Observa morem tunc fuisse, ut Pontifex equo albo uteretur. quod etiam probat Sugerius in libro de vita Ludovici Grossi apud Chesnium to. 4. pag. 318.

Ibid. lin. 14. *etsi purpuratus.* Petrus Damiani Pontifici *rubram cappam* tribuit in lib. I. epist. 20. Hadrianus IV. apud Johannem Saresberiensensem in Polycratici lib. 8. cap. 23. ait, *coronam & phrygium* (quod alio nomine *regnum* vocant)

clara merito videri, quia ignea sunt. De phrygio Innocentii I I. vide Sugerium loco mox allato.

Ibid. pag. 130. lin. 14. *Uterque Ecclesiae, spiritualis scilicet gladius & materialis.* De utroque gladio confer Bernardi epistolam 256. ad Eugenium, & Johannem Saresberiensem lib. 4. cap. 3. & Sixtum Senensem lib. V I. annot. 72. ubi hunc Bernardi locum explicat.

I N C A P. I V. pag. 132. lin. 17. *ad collaterales tuos.* Johannes Saresberienfis in lib. 5. cap. 10. agit de lateribus potestatum, his scilicet, qui principibus debent assistere.

Ibid. pag. 134. lin. 5. *An non eligendi de toto orbe.* His consonat Concilium Tridentinum sess. 24. cap. 1. de reformatione. Quanta fuerit Alexandri I I I. cura & sollicitudo ad perquirendos ex omnibus Ecclesiae catholicae partibus viros pios & doctos, qui ad cardinalatum promovendi essent, argumento est Petri tit. sancti Chrysogoni presbyteri Cardinalis epistola ad ipsum.

Ibid. pag. 137. lin. 4. *neque currentes assumito.* Praeclare ad haec Gregorius M. in lib. V I. epist. 4. *Sicut locus regiminis desiderantibus negandus est, ita fugientibus offerendus.* Ad hunc quoque modum Leo imperator l. 31. C. de episc. & cleric. *Tantum ab ambitu debet esse sepositus antistes, ut queratur cogendus, rogatus recedat, invitatus effugiat: sola illi suffragetur necessitas excusandi.* Profecto enim indignus est sacerdotio, nisi fuerit ordinatus invitus.

Ibid. pag. 139. lin. 11. *molestus exitus.* Ita plerique scripti, in quibusdam *non molestus*, Vossio *modestus*. at praefenda nostra lectio, ut sensus sit, quorum exitus seu mors tristitiam ac maerorem affert.

I N C A P. V. pag. 140. lin. ult. *Martini nostri*. Is presbyter cardinalis ab Innocentio II. creatus anno 1130. & ab eo in Daciam missus. Hoc factum ex Bernardo laudat Johannes Saresberienensis in lib. 5. cap. 15. uti & sequens Gaufridi episcopi Carnotensis.

Ibid. pag. 145. lin. 12. *sedenti propiores assidemus*. Ita hic locus ex codicibus scriptis restitutus ; & recte. nam Romano more servi dominum præcedunt, digniores postremi sequuntur. In editis , *priores sequimur procedentem*.

I N C A P. V I. pag. 150. lin. 16. *Quid Episcopo turpius* &c. Huc spectat Concilium Carthaginense I V. can. 20. *Ut episcopus nullam rei familiaris curam ad se revocet : sed lectioni & orationi & verbi Dei predicationi tantummodo vacet*. quod intelligendum de scrupulosa & minutiori rei familiaris cura , non de generali inspectione , quæ episcopo non male convenit , nisi is adsit minister , qui hanc curam omnino suppleat. quod raro invenias. Adi Gregorium Nazianzenum in carmine de vita sua , & Possidium de vita S. Augustini cap. 24.

I N C A P. V I I. pag. 155. lin. pænult. *Non Dominum episcoporum*. Hoc spiritu animatus erat Gregorius M. Eulogio Alexandrino scribens in hunc modum : *Ego enim*, inquit , *non verbis quero prosperari , sed moribus ; nec honorem esse deputo , in quo fratres meos honorem suum perdere cognosco. Meus namque honor est honor universalis Ecclesiae ; meus honor est fratrum meorum solidus vigor*. Ita vir re , ut nomine Magnus lib. 7. epist. 30. indict. 1.

IN LIBRUM V.

IN CAP. I. pag. 158. lin. 14. *id quidem instat.*
sic legendum, non *constat.* id est, id modo exsequendum restat.

IN CAP. IV. pag. 168. lin. 4. *corpore æthereos.* Dubitanter hac de re loquitur Bernardus Sermone V. in Cantica, hancque quæstionem versat in omnes partes, quæ antiquis Patribus admodum ambigua & difficilis visa est. adeo ut Magister sententiarum non ausus sit quidquam hac de re definire. Nunc recepta sententia est, Angelos esse incorporeos. Adi Estium in lib. 2. sentent. dist. 8. & Sixtum Senensem lib. 5. annot. 8.

Ibid. pag. 173. lin. 7. *Sub altari, quodcumque illud est.* Ex his verbis patet, Bernardum Sermone 2. in Festo Omnium Sanctorum non ita sensisse de altari illo, quasi intellectu aut fide id sibi constaret: sed tantum opinative sententiam suam dixisse.

IN CAP. VI. pag. 183. lin. 5. *Nihil minus invenio, quis capiat locus.* Necessaria hæc dispositio. Alii habent, *Nihil minus invenio. Quis capiat locus?* Ex sensu hujus loci & sequenti membro apparebit necessitas nostræ restitutionis.

IN CAP. VII. pag. 184. lin. 6. *esse aliquid, quo Deus sit.* Mendose in antehac editis, *quod Deus sit.* Ratio ex consequentibus perspicua. Infra: *Negas divinitate Deum esse, aliis male divinitatem.*

Ibid. lin. 10. *qua dicunt Deum esse.* Scilicet Gilbertus Porretanus episcopus Pictavenfis, ejusque sequaces, damnati in Concilio Remensi sub Eugenio III. anno 1148.

Ibid. pag. 190. lin. 2. *personas numero, inquis, quæ non sint illa una natura ... illa una divinitas.* Sic

emendanda disunctio, quæ hoc modo habet in aliis : *personas numero* , inquis. *Quæ non sint illa una natura. . . . illa una divinitas?*

Ex his omnibus facile quisvis intelliget , quàm vere hoc Bernardi opusculum *multæ utilitatis* vocet Ernaldus in libro 2. de ejus vita , in quo scilicet *tanta de natura divina* disseruit , *ut videatur in tertium calum assumptus* , & *audisse quædam verba* , *quæ non licet homini loqui* , & *Regem in decore suo vidisse*.

FINIS.



Bernard

De consideratione ad Eugenium Pap

Paris 1701

P.lat. 310

urn:nbn:de:bvb:12-bsb10742854-1